


國學基本叢書
衛藏通志
上





衛藏通志卷一

考證

謹案疑耳而信目者人之常情源遠而未分者學之流弊嘗考通典類函子史通鑑水經注諸書未嘗不載天竺西域諸國事蹟然所聞異辭所傳聞異辭疑信相參源末互異求其實實於人跡不到之區不可得也姑博採焉考諸古則存而勿論證之今則信而有徵

吐番在吐谷渾西南不知國之所由或云禿髮利鹿孤有子樊尼其主侮檀爲乞伏熾盤所滅樊尼率餘種依沮渠蒙遜其後子孫西魏時爲臨松郡丞與主簿皆得衆心因魏末中華擾亂招撫羣羌日以強大遂改姓爲宰敦野至今其人號其主曰贊府貴臣曰主簿又或云始祖贊普自言天神所生號鶻隄悉補野因以爲姓

宰敦野與悉補野言譌其實一也或云本姓棄蘇農也

其國出鄯城五百里過烏海入吐谷渾部落彌

多彌蘇毗及白蘭等國至吐番界

謹案

烏海即今青海吐谷渾即今青海蒙古部札薩克王公台吉由西甯出口赴藏大路

其國都號邏娑城。用法嚴整。議事則自下而起。因人所利而行之。此其所以能強且久也。重壯賤老。母拜于子。重兵死。惡疾終。以累代戰沒者爲甲門。臨陣奔北者。懸狐尾於其首。表其似狐之怯。其贊普弄贊。雄霸西羌。隋開皇中。其主論贊。率弄贊都。牂牁西匹播城。以五十國西南與婆羅門接。

謹案。贊普。卽藏布弄贊。卽今羅卜藏。婆羅門。卽今藏西南大西門也。

唐貞觀十五年正月。以宗室女封文成公主。降於吐番贊普。命禮部尙書江夏王道宗送之。弄贊親迎於河源。見王人執子壻禮甚謹。覩大國服飾禮儀之美。俯仰有愧沮之色。詣所親曰。我祖父未有通婚大國者。今我得尙公主。當築一城以誇後代也。

謹案。

今大招內有唐公主及贊普像。旁有巴勒布王女拜木薩像。乃贊普之妾。又大招北別有小招。乃唐公主自建修靜之所。東向。

武后如意初。武威軍總管王孝傑。大破吐番。復龜茲。于闐。疎勒。碎葉。四鎮。至萬歲通天初。又寇涼州。執都督許欽明。欽陵兄弟皆有才略。欽陵多居中。諸弟分領方面。諸番憚之。

二年。吐番大論欽陵。遣使請和。武太后遣前梓州通泉縣尉郭元振往。至野狐河。與陵遇。陵曰。大國久不許陵和。陵久不遣番使。以久無報命。故去秋有甘涼之鈔。斯實陵罪。今欲和好。能無懼乎。振乃謂曰。論先考東贊以宏才大略。服事先朝。結好通親。荷榮承寵。本期傳之永代。垂於無窮。論不慕守。

舊恩中致猜阻。無故自絕。日尋干戈。屢犯我河湟。且父通之。子絕之。豈爲孝乎。父事之。子叛之。豈爲忠乎。然論之。英聲籍甚。遐外各自爲主。奚爲懼乎。陵曰。今天恩旣許和好。其兩國戍守。咸請罷置。以便萬姓。豈不休哉。然以西十姓突厥四鎮諸國。或時附番。或時歸漢。類多翻覆。乞拔去鎮守。分離諸國。各建侯王。使其國自爲君。人自爲守。旣不款漢。又不屬番。豈不人免憂虞。振曰。十姓四鎮本將鎮靜戎落。以撫甯西土。通諸大邦。非有他求。論今奚疑。而有憂虞乎。陵曰。然緣邊守將多好功名。見利而動。罕守誠信。此番國所爲深憂。振曰。十姓諸部與論種類不同。山川亦異。爰覽古昔。各自區分。復爲我編入。積有年歲。今論欲一言而分離數部。得非昧弱苟利乎。陵曰。使人豈不疑陵貪冒無厭。謬陳利害。窺竊諸部。以爲漢邊患耶。陵若愛漢土地。貪漢財幣。則青海湟川。實邇漢邊。其去中州蓋三四千里。必有窺羨。何不爭利於此中。而突厥諸部懸在萬里之外。磧漠廣莽。殊異中國。安有爭地於萬里外。而能爲漢邊患哉。捨近務遠。計豈然也。但中州人士深謀多計。天下諸國皆爲漢并。雖大海之外。窮塞之表。靡不磨滅。今吐番塊然獨在者。非漢不貪其土地。不愛其臣僕。實陵兄弟小心謹密。得保守之耳。往者高宗以劉審禮有青海之役。乃使黃仁素賈守義來和。和事曾未畢。以爲好功名。人崔知辯從五俟斤路。乘間隙瘡痍我衆。驅掠牛羊。蓋以萬計。自此陵之國人大危慄和事矣。今之此求。但懼好功名者之吞噬。冀此爲翰屏以虞之。實非有他懷焉。振曰。茲事漫汗體大。非末吏所能。

明論當發使奉章以聞。取裁於聖主。陵乃命郎宗乞恩。若爲使。振曰。今遣使之後。國不可更犯漢邊。且番使前後入朝。不時遣者。良以使去之後。兵仍犯漢。故朝廷躊躇曰。是給我也。以爲偵諜。不以爲使人。遂遷延無報。今若踵前陵塞。是故陷所去人使。孰謂請和也。陵俛前踟躇久之曰。陵與國人咸憾。崔知辯之前事。故嘗有此舉。以虞好功者之來侵。比實以選練騎士三萬分路出師。使人既有此言。今既於和事非便。安可相違。既罷兵散卒。遂指天爲信。

杜氏
通典

後漢書曰。明帝夢金人長丈餘。頭有光明。以問羣臣。或曰。西方有神。名曰佛。其形長丈六尺。面黃金色。帝於是遣使天竺問佛道法。遂於中國圖形像焉。

續漢書曰。天竺國一名身毒。在大月氏東南。修浮圖佛道以成俗。不殺伐。

謹案。

大月氏。卽今業爾羌回部。在藏之西北。有兩路通藏。一由和闐南山。一由沙雅爾。

宋元嘉起居注曰。阿羅單國王毗沙跋摩遣使云。諸佛世尊。常樂安隱。處雪山陰。雪水流注。百川洋溢。八味清淨。周而屈曲。從趨大海。一切衆生。咸得受用。又曰。師子國王遣使奉獻。詔答曰。此小乘經甚少。彼國所有。皆可寫送。釋道安西域志曰。波羅奈斯國佛轉法輪處。在此國也。

又曰。須刺國有五百沙彌真人寺。望晦日。寺前有方青石。天人來下石上。
又曰。摩訶賴國有阿耨達山王舍城。在山東南角。竹園精舍在城西。又有佛浴所。六年苦行處。
支僧載外國事曰。和訶條國在大海之中。地方二萬里。國有大山。山有石井。井中生千葉白蓮花。井
邊青石上有四佛足跡。合有八跡。月六齋日。彌勒菩薩與諸天神禮佛跡。竟便飛去。浮圖講堂皆七
寶。國王長者常作金樹銀花供養佛。

謹案。今藏西南通伽噶爾部落在海中。其地有
巴特瑪薩木巴娃佛。巴特瑪譯語蓮花也。

又曰。迦維羅越國今屬播黎越國。猶有優婆塞姓釋可二十餘家。是白靜王之苗裔。昔太子生時。有
二龍王。一吐冷水。一吐暖水。今有池。尚一冷一暖。

又曰。鳩留佛姓迦葉。生那訶羅國。

又曰。彌勒佛當生波羅奈國。在迦維羅越南。

又曰。罽賓國在舍衛之西。國王民人悉奉佛。道人及沙門到冬未中前。飲少酒。過中不復飯。

又曰。佛在拘私那竭國般泥洹。欲泥洹時。自然有寶牀從地出。有八萬四千國王。爭將佛歸。神妙天
人曰。佛應就此土。那竭王乃作金棺。梅檀車送喪。佛積薪不燒。自然王將舍利歸宮。八萬四千國與

兵爭舍利。婆羅門分之。用金升量舍利。得八斛四斗。諸國各得。還立浮圖。

扶南國記曰。頓遜國屬扶南。西出海中。國主名崑崙。有天竺胡五百家。兩佛圖婆羅門千餘人。頓遜人敬奉其道。以香花自洗。精進不捨晝夜。香有區撥。摩花冬夏不衰。日載數千車貨之。慘更香好。

南州異物志曰。天竺國地方三萬里。佛道所出。其國王城郭宮室。皆雕文刻鏤。

佛地論曰。佛者覺也。覺一切種智能開覺有情。如睡夢覺。故名爲佛。

普曜經曰。佛兜率天降神於西域迦維衛國淨梵王宮。摩耶夫人剖右脅而生。時多靈瑞。生而能言。本相經曰。牟尼佛年十九。踰城出家學道。勤行精進。禪定六年成道。具三十二相。八十種好。佛地論曰。姓釋迦。號牟尼佛。

謹案。

釋迦牟尼佛。唐古特

語名曰沙迦圖巴。

後魏釋老志曰。凡說教。大抵言生生之類。皆因行業。有三世識神不滅。凡爲善惡。必有報應。漸積盛業。陶冶麤鄙。經無數形。藻練神明。乃致無生。而得佛道也。其間階次心行。等級非一。皆緣淺以至深。藉微而爲著。在於積仁順。蠲嗜慾。習靈靜。而成通照也。其始修心。則依佛法僧之三歸。又有五誡。去殺盜淫妄言飲酒。大意與仁義禮智信同。

隋書經籍志曰。釋迦在世教化四十九年。乃至天龍人鬼並來聽法。弟子多有得道證果。後於拘尸那城婆羅雙樹間。二月十五日。入般涅槃。譯言滅度。亦言常樂我淨。弟子迦葉追撰述其教。爲十二部。後漢明帝夢金人飛行殿庭。以問於朝。而傅毅以佛對。帝遣使往天竺。得佛經及釋迦像。自後佛

法徧於中夏。以上唐類函

周秦西漢以上。無言佛者。魏書釋老志云。劉歆志七略。班固志藝文。釋氏之學。所未曾紀。隋書經籍志云。推尋典籍。自漢以上。中國未傳。或云。久以流布。遭秦湮沒。而辭而闕之者。則如北魏世祖詔云。漢人劉元真。呂伯彊之徒。乞胡之誕言。用老莊之虛假。附而益之。唐傅奕云。熾兒幼夫。摹擬莊老。宋宋祁作唐書李蔚傳贊云。華人之譎誕者。又攘莊周列禦寇之說。佐其高。皆以爲釋氏本於莊老。然自白馬馱經以來。貝葉流傳。於今具在。皆本橫行梵字。譯爲震旦之文。非剽竊老莊以成句也。願嘗詳讀內典。參求宗旨。與老氏則秦越。與列莊實伯仲。豈所謂三代之時。久已流布。遭秦湮沒之說。信與抑。是法不二。不隔華戎。有自然而合者歟。今周秦西漢。旣無言佛之書。可編錄。輒擇列莊之語。同於宗門者。著於篇。而每語各著其所以同者焉。

文中子或問佛子曰。聖人也。曰。其教何如。曰。西方之教也。中國則泥。

史記匈奴傳漢使驃騎將軍去病將萬騎出隴西過焉支山千餘里擊匈奴得休屠王祭天金人注金人卽金佛像是其遺法立以爲祭天主也魏書釋老志金人率長丈餘不祭祀但燒香禮拜而已此則佛道流通之漸也

史記大宛傳大夏東南有身毒國注索隱曰身音乾毒音篤孟康云卽天竺也所謂浮圖胡也正義曰萬震南州志云地方三萬里佛道所出左右諸大國凡十六皆供奉之以天地之中也浮圖經云臨毗國王生隱屠太子父曰屠頭邪母曰莫邪屠身色黃髮如青絲乳有青色爪赤如銅始莫邪夢白象而孕及生從母右脅出生有髮墮地能行七步又云太子生時有二龍王左右吐水一龍水暖一龍水冷遂成二池今猶一冷一暖初行七步處琉璃上有太子腳跡現在生處名祇洹精舍在舍衛國南四里是長者須達所起又有阿輸迦樹是夫人所攀生太子樹也括地志云沙祇大國卽舍衛國也在月氏南萬里卽波斯匿王浚處此國共九十種知身後事城有祇樹給孤園又云天竺國有東西南北中央天竺國國方三萬里去月氏七千里大國隸屬凡二十一天竺在崑崙山南大國也治城臨恆水又云阿耨達山亦名建末達山崑崙山水出一名拔扈利水一名恆迦阿卽今稱恆河者也自崑崙山以南多是平地而下溼土肥良多種稻歲四熟留役馳馬米粒亦極大又云佛上忉利天爲母說法九十日波斯匿王思欲見佛卽刻牛頭梅檀像置精舍內佛坐此像是衆像之始

後人所法也。佛上天青梯，今變爲石，沒入地，唯餘十二磴，磴間二尺餘。彼耆老言：梯入地盡，佛法滅。又曰：王舍國胡語曰：罪悅祇國，其國靈鷲山，是青石，頭似鷲鳥。胡語曰：耆闍崛山，耆闍鳥名，鷲也。崛山石也。山周四十里，外周圍水。佛於此坐禪，及諸阿難等俱在此坐。又云：小姑石，石上有石室者，佛坐其中。天帝釋以四十二事問佛，佛一一以指畫石，其跡尙存。又於山上起塔，佛昔將阿難在此上山四望，見福田疆畔，因制七條衣割截之法於此。今袈裟衣是也。

謹案

前藏羅卜微岡，乃達賴喇嘛洗浴之所，水自藏布江引入池。中池上有微樹，壁繪諸佛像及青石梯，六佛昇天之遺跡也。

後漢書西域傳論佛道神化地曰：身毒而二漢方志莫有稱焉。張騫但著地多暑溼，乘象而戰，班勇雖列其奉浮圖不殺伐而精文善法導達之功，靡所傳述。余聞之後說也。其國則殷乎中土，玉燭和氣，靈聖之所降集，賢懿之所挺生，神迹詭怪，則理絕人區，感驗明顯，則事出天外。而騫超無聞者，豈其道閉往運數開，叔葉乎不然，何誣異之甚也。漢自楚英始盛齋戒之祀，桓帝又修華蓋之飾，將微意未譯，而但神明之耶。其清心釋累之訓，空有兼遺之宗，道書之流也。且好仁惡殺，蠲敵崇善，所以賢達君子多愛其法焉。然好大不經，奇譎無已，雖鄒衍談天之辨，莊周蝸角之論，尙未足概其萬一。又精靈起滅，因報相尋，若曉而昧者，故通人多惑焉。蓋導俗無方，適物異會，取諸同歸，措夫疑說，則

迦維別名也。釋迦於四月八日生。姿相超異者三十二種。天降嘉瑞以應之。亦三十二。舊唐書僧元奘傳。元奘姓陳氏。洛州偃師人。大業末出家。博涉經論。嘗謂翻譯者多有譌繆。故就西域廣求異本以參驗之。貞觀初。隨商人往遊西域。元奘既辨博出羣。所在必爲講釋論難。著人遠近咸尊伏之。在西域十七年。經百餘國。悉解其國之語。仍採其山川。謠俗。土地。所有。撰西域記十二卷。貞觀十九年。歸至京師。太宗見之大悅。於是詔將梵本六百五十七部於宏福寺翻譯。釋法顯佛國記。在道一月五日。得到于闐。其國豐樂。人民殷盛。皆奉佛法。以法樂相娛。衆僧乃數萬人。多大乘學。皆有衆食。彼國民人星居。家家門前皆起小塔。最小者可高二丈許。作四方僧房。供給客僧。及餘所須。國王安堵法顯等於僧伽藍。僧伽藍名瞿摩帝。是大乘寺。三千僧共糞。槌食。入食堂時。威儀齋肅。次第而坐。一切寂然。器鉢無聲。淨人益食。不得相喚。但以手指麾。又曰。從四月一日。城裏便灑掃道路。莊嚴巷陌。其城門上張大帷幙。事事嚴飾。王及夫人采女皆往其中。瞿摩帝僧是大乘學。王所敬重。最先行像。離城三四里。作四輪像車。高三丈餘。狀如行殿。七寶莊校。懸繒幡蓋。像立車中。二菩薩侍。作諸天侍從。皆金銀雕瑩。懸於虛空。像去門百步。王脫天冠。易著新衣。徒跣持花香。翼從出城迎像。頭面禮足。散華燒香。像入城時。門樓上夫人采女搖散衆華。紛紛而下。如是莊嚴供具。車車各異。一僧伽藍則一日行像。四月一日爲始。至十四日。行像乃訖。行像

訖。王及夫人乃還宮耳。

又曰。到竭叉國。與慧景等合。值其國王作般遮越師。般遮越師。漢言五年大會也。會時。請四方沙門。皆來。雲集已。莊嚴衆僧坐處。懸繒幡蓋。作金銀蓮華。著繒座。後鋪淨坐具。王及羣臣如法供養。或一月二月。或三月。多在春時。王作會已。復勸諸羣臣。作供供養。或一日。或二日。三日。五日。供養都畢。王以所乘馬鞍勒自副。使國中貴重臣騎之。並諸白氎種種珍寶。沙門所須之物。共諸羣臣發願布施。布施已。還從僧贖。

謹案。

孟春上旬。達賴喇嘛下布達拉。赴大招。住錫齊。集遠近大小喇嘛於大招。各經一疑有脫字。嘗誦經約三萬餘衆。唐古特語謂爲磨羅木。漢人名曰攢招。乃宗喀巴之經會。佛經之波羅蜜也。或八九日。或十數日。攢招畢。則出大小喇嘛。請迺達爾佛像。載以四輪車。數百人曳之。即彌勒佛垂仲裝束。

前引導以鼓樂繞大招一匝。漢人謂之轉寺。

又曰。西行十六。由延便至那竭國界。醯羅城中。有佛頂骨精舍。國王敬重佛骨。慮人鈔奪。乃取國豪姓八人。人持一印。印封守護。清晨八人俱到。各視其印。然後開戶。開戶已。以香汁洗手。出佛頂骨。置精舍外高座上。以七寶圓氈。氈下琉璃鐘覆上。皆珠璣校飾。骨黃白色。方圓四寸。其上隆起。每日出後。精舍人則登高樓。擊大鼓吹螺。敲銅鈸。王聞已。則詣精舍。以華香供養。供養已。次第頂戴而去。從東門入。西門出。王朝朝如是。供養禮拜。然後聽國政。居士長者亦先供養。乃修家事。日日如是。初無

懈倦。供養都訖。乃還頂骨於精舍中。

又曰。佛從忉利天上來向下。下時。化作三道寶階。佛在中道七寶階上行。梵天王亦化作白銀階。在右邊。執白拂而侍。天帝釋化作紫金階。在左邊。執七寶蓋而侍。諸天無數從佛下。佛既下。三階俱沒於地。餘有七級。現後阿育王欲知其根際。遣人掘看。下至黃泉。根猶不盡。王益信敬。卽於階上起精舍。當中階作丈六立像。精舍後立石柱。高三十肘。上作獅子。柱內四邊有佛像。內外映徹。淨若琉璃。有外道論師與沙門諍此住處。時沙門理屈。於是共立誓。言此處若是沙門住處者。今當有靈驗。作是言已。柱頭獅子乃大鳴吼見證。於是外道懼怖。心伏而退。

又曰。阿育王弟得羅漢道。常住耆闍崛山。志樂閒靜。王敬心。請於家供養。以樂山靜。不肯受請。王語弟言。但受我請。當爲汝於城裏作山。王乃具飲食。召鬼神而告之曰。明日悉受我請。無坐席。各自齎來。明日。諸大鬼神各持大石來。辟方四五步。坐訖。卽使鬼神累作大石山。又於山底以五大方石作石室。可長三丈。廣三丈。高丈餘。窟前有四佛坐處。又諸羅漢各各有石窟坐禪處。動有數百。佛在石室前。東西經行。調達於山北。巖巖間橫擲其石。傷佛足指處。石猶在。佛說法堂已毀壞。止有磚壁基在。其山峯秀端嚴。是五山中最高。法顯於新城中。買香華油燈。倩二舊比丘送法顯上耆闍崛山。華香供養。然燈續明。慨然悲傷。收淚而言。佛昔於此說首楞嚴。法顯生不值佛。但見遺跡處所而已。卽

於石窟前誦首楞嚴。停止一宿。

又曰。復順恆水西行十二。由延到迦尸國波羅柰城東北十里許。得仙人鹿野苑精舍。此苑本有辟支佛住。常有野鹿棲宿。世尊將成道。諸天於空中唱言。白淨王子出家學道。後七日當成佛。辟支佛聞已。即般泥洹。故名此處爲仙人鹿野苑。世尊成道後。人於此起精舍。

又曰。法顯本求戒律。而北天竺諸國皆師師口傳。無本可寫。是以遠步乃至中天竺。於此摩訶衍僧伽藍得一部律。是摩訶僧祇衆律。佛在世時。最初大衆所行也。於祇洹精舍傳其本。自餘十八部。各有師資。大歸不異。於小小不同。或用開塞。但此最是廣說備悉者。復得一部鈔律。可七千偈。是薩婆多衆律。卽此秦地衆僧所行者也。亦皆師師口相傳授。不書之於文字。復於此衆中得雜阿毗曇心。可六千偈。又得一部經。二千五百偈。又得一卷方等般泥洹經。可五千偈。又得摩訶僧祇阿毗曇。故法顯住此三年。學梵書梵語寫律。道整旣到中國。見沙門法。則衆僧威儀。觸事可觀。乃追歎秦土邊地衆僧。戒律殘缺。誓言自今已去。至得佛願不生邊地。故遂停不歸。法顯本心欲令戒律流通漢地。於是獨還。

酈道元水經注。竺法維曰。波羅柰國在迦維衛國南千二百里。中間有恆河東南流。佛轉法輪處。在國北二十里。樹名春浮。維摩所處。

梁書扶南國傳俗事天神。天神以銅爲像。二面者四手。四面者八手。手各有所持。或小兒。或鳥獸。或日月。其王出入乘象。嬪侍亦然。王坐則偏踞翹膝。垂左膝至地。以白疊敷前。設金盆香爐於其上。舊唐書吐蕃傳。其人或隨畜牧。而不常厥居。然頗有城郭。其國都城號爲邏些城。屋皆平頭。高者至數十尺。貴人處於大氈帳。名爲拂廬。寢處污穢。絕不櫛沐。接手飲酒。以氈爲盤。捻麩爲碗。實以羹酪而食之。多事獯羗之神。人信巫覡。不知節候。以麥熟爲歲首。

謹案

邏些城。邏些城。今唐古特語名。前藏地爲拉薩蓋譯言之異也。

又曰。元鼎初見贊普於閩懼廬川。蓋贊普夏衙之所。其川在邏娑川南百里。臧河之所流也。

子史精華

謹案

唐古特俗。夏秋之交。無論男女。羣浴於藏布江之浹。以祓除癘疫。乃古秋祓之遺意。布達拉西南十五里。名羅卜嶺岡。達賴喇嘛浴於其地。二十餘日。還。

元文宗即位之初。以西僧贊真吃刺思爲帝師。帝師至上命朝臣一品以下咸郊迎。大臣俯伏進觴。帝師不爲動。惟國子祭酒李木魯翀舉觴立進曰。帝師釋迦之徒。天下僧人師也。予孔子之徒。天下儒人師也。請各不爲禮。帝師笑而起。舉觴卒飲。衆爲之懷然。

元武宗至大元年。以西僧教瓦班爲翰林學士承旨。

元英宗至治三年。敕寫金字藏經。

元恭帝奉定三年。禁西僧馳驛擾民。先是西臺御史李昌言嘗從平涼府靜會定西等州。見西番僧佩金字圓符。絡繹道途。馳騎累百。傳舍至不能容。奉元一路。自正月至七月。往返者百八十五次。用馬至八百四十餘匹。乞更正僧人給驛法。至是聞其擾民。禁之。

明成祖永樂五年。封西僧哈立麻爲大寶法王。前年冬。侯顯偕哈立麻至。帝令建齋於靈谷寺。爲高帝高后薦福。或言青雲甘露。青鳥白象之屬。連日畢見。帝大喜。侍臣多獻賦頌。乃封哈立麻萬行具足十方最勝圓覺妙智慧善普應祐國演教如來大寶法王。西天大善自在佛。領天下釋教。賜印誥。其徒三人亦封灌頂大國師。

明憲宗成化四年。加番僧封號。西僧劄巴堅參以祕密教得幸。封萬行莊嚴功德最勝智慧圓明能仁感應顯國光教宏妙大悟法王。西天至善金剛普濟大智慧佛。錫誥命者不可勝計。服食器用。僭擬王者。出入乘輿。衛卒執金吾仗前導。其他羽流加號真人高士者亦盈都下。

謹案

前藏西北山後大寺住錫噶爾瑪巴瑪圖克圖。係黑教喇嘛。雲南人也。卽明時所謂哈立瑪者。藏手卷一軸長二十餘丈。乃繪永樂初哈立瑪誦經靈谷寺圖。

明武宗正德五年六月。帝自稱大慶法王。帝於佛經梵語無不通曉。鑄大慶法王西天覺通圓明自在大定慧佛金印。自稱法王。其後帝習韃靼語。自名忽必烈。習回回語。自名妙吉敖爛。習番僧語。自

名領吉班丹。十年冬十二月。遣太監劉允使烏思。左右言西域番僧能知三世。遂命允往迎。以珠璣爲幡幢。黃金爲供具。餽賜鉅萬。所攜鹽茶又數十萬。允至臨清。漕艘爲之阻截。又峽江舟大難進。易以艍。相連二百餘里。至成都。又治入番器物。居歲餘。始行。兩月至其地。番僧恐中國誘害之。匿不出見。允脇以威。番人夜襲之。奪其寶貨器械。士卒死者數百人。

謹案

四川打箭爐喇嘛寺內藏唐時所遺儀仗器械。或當時所掠者。



衛藏通志卷二

疆域

謹案衛藏疆域。舊志所載。東至巴塘之南墩。東南至類伍齊番族。東北至青海屬之納木稱巴顏番族。南至格瑜茹巴怒江。西南至布魯克巴部落。北至草地。通回部沙雅爾。西北通回部和闐。仍照舊編纂。惟後藏極西邊界。壬子秋。廓爾喀投誠。遵照新定界址。設立鄂博地方編纂。乾隆五十七年九月。奉上諭。立定地界一事。已有旨令福康安等。應於藏內邊界。一一設立鄂博。毋許私行偷越。現在大兵將撤。此事最關緊要。福康安等宜趁此時詳細曉諭。申明約束。以熱索橋迤西。如協布魯雍雅東。覺堆補木帕朗古等處。皆經大兵攻克。本應卽以爲後藏邊界。今念爾悔罪投誠。仍行賞還。其熱索橋以內。濟隴聶拉木。宗喀等處。本屬藏地。前此雖經汝侵占。現經大兵收復。非如上次講和退還者可比。嗣後以濟隴聶拉木以外爲界。爾部落人等。不得尺寸擅越。如有私行偷越者。一經拿獲。卽行正法。爾部落遇有遣使進貢獻表等事。亦當先行稟明邊界將領。聽候知照。方准進口。如此明白曉諭。立定鄂博章程。庶可永斷葛藤。肅治邊界。欽此。

十二月大學士公福康安等會奏章程內開查西藏邊界如濟隴、聶拉木、絨轄、噶爾達薩喀、崑布等處均與廓爾喀道路相通。福康安等於濟隴外之熱索橋、聶拉木外札木地方之鐵鎖橋及絨轄邊界均已設立鄂博釐定疆域將巴勒布貿易之人及唐古忒番民零星商販已奏請立法稽查不許私相往來應交與駐藏大臣於巡視之便認真查察隨時派人堆砌不得日久廢弛致有偷越等因具奏奉旨依議欽此。

五十八年正月大學士公福康安工部尚書都統和琳等具奏爲接據廓爾喀王拉特納巴都爾稟稱蒙公中堂大將軍差穆大人前來聶拉木札木一帶分立地界小的卽差頭人前往穆大人已經分定辦理甚妥小的悅服卽照穆大人所立地界永遠遵奉不敢私毫有違自取罪戾還望公中堂大將軍在大皇帝前將小的一片誠心奏聞常常施恩感激不盡等語隨檄該王宣示大皇帝天恩赦爾等前罪爾等復將凍遵約束永矢恭順冀受大皇帝天恩等因具稟足見爾等一片誠心本大將軍回京時必將爾與爾叔感畏大皇帝恩威永爲藩服誠悃代爲陳奏自蒙聖明俯鑒渥施恩眷現在駐藏大臣工部尚書都統和大人爲大皇帝親信大臣特命來藏整飭鎮撫嗣後爾等如有稟呈事件當在和大人前稟明聽候指示卽將來更換之駐藏大人凡有應行曉諭事件爾等惟當一一遵奉毋稍違悞等因具奏奉硃批知道了欽此。

三月駐藏大臣工部尙書都統和琳奏爲接據廓爾喀王拉特納巴都爾稟稱前差穆大人定立地界極爲公道惟有廓爾喀東邊多羅卡界內拉結撒儻兩處地方原係廓爾喀所管此時該處營官不許小的管理懇求查明賞給等因又譯看寄班禪信內云從此以後兩家照舊和好永遠不敢滋事所有底瑪宗地方原係給了你們的可卽差人前來管理各等語臣當卽飭令噶布倫詳細查多羅卡邊界拉結撒儻兩處本係廓爾喀地方前經福康安差穆克登阿第巴前往定界時在熱隴橋設立鄂博爲界其多羅卡地界拉結撒儻兩處係在熱隴橋以外相距四五程途自應歸廓爾喀管理臣一面飭令絨轄營官遵照將熱隴橋以外之多羅卡拉結撒儻兩處地方仍聽廓爾喀管理不許占越滋事再查底瑪爾宗地方係廓爾喀所管因五十三年彼此說合廓爾喀願將此地方送與薩迦呼圖克圖作爲酬謝當時雖有此議並未收管臣伏思上次唐古忒許銀講和及廓爾喀許地酬謝俱屬不成事體廓爾喀旣經悔罪投誠將上次合同業已繳銷永不敢再提一字今該部長改悔前非雖欲與衛藏修好仍將前許之地讓還管理自屬恭順之意但思該部落旣附藩封歸入版圖卽與唐古忒無異未便仍照前次私議令薩迦呼圖克圖收受查歲琿堪布現在前藏臣面諭毋得差人前去收管併傳知班禪札飭薩迦呼圖克圖遵照一面檄諭廓爾喀部長今將底瑪爾宗旣在鄂博之外自應仰副皇上柔遠之意賞與該部長管理等因具奏奉硃批諸凡皆妥欣慰覽之

欽此。

六月駐藏大臣副都統成德自定結具奏。查閱後藏各邊界新設番兵及履勘鄂博情形。惟定日地方遼闊。爲聶拉木、宗喀、絨轄三處總匯之地。實爲緊要。查所通絨轄之小路。轄木多通宗喀大路。擦木達杏通聶拉木之小路。古喇噶木炯並宗喀。共計五處。均爲要隘。每處設定瑋一名。番兵二十五名。卽於定日現設番兵五百名內。就近派撥安設。似於聲勢更爲聯絡。亦不妨其隨時操演等因。具奏奉硃批。欣慰覽之。欽此。

七月駐藏大臣工部尙書都統和琳副都統成德具奏。查閱帕克哩定結各卡隘情形。所噶爾達地方卡隘二處。一名薩迦嶺。一名春堆。此二處均與廓爾喀相通。又定結地方卡隘一處。名擢拉山。此處與廓爾喀哲孟雄相通。又帕克哩地方卡隘三處。一名哲孟山。與布魯克巴相通。一名哈爾山。與布魯克巴小路相通。一名宗木山。與宗木相通。以上卡隘六處。均歸江孜前後藏大道。爲總匯要隘。臣成德親赴各處。逐一查勘。俱極嚴密。所有臣成德回藏日期及查閱情形。理合會銜具奏。奉硃批。知道了。欽此。

九月駐藏大臣工部尙書都統和琳副都統成德等具奏。哲孟雄作木郎二部落。在藏邊界外。不過每年與達賴喇嘛班禪額爾德尼通問書信。不聽藏中調遣。被廓爾喀侵占。已有十年。去歲經福康

安檄令協勦。又復藉稱天熱，畏懦不前。迨開廓爾喀歸順，復思藉天朝威勢，請斷還六輩達賴喇嘛所定舊界，並請添設番兵，由商上給與錢糧，代爲守禦。經福康安及臣和琳等窺其情僞，將懦弱無能，貪得便宜隱衷，逐一指駁。一面檄諭令廓爾喀約束手下人，毋許欺凌弱小，一面將邊外極邊小部落即可置之不問等情具奏，奉到硃批，所議皆妥，知道了。欽此。又旁批，可惡之見，不可從。欽此。自去年至今，一年有餘，該二部落自知理短辭曲，未敢復來懇乞。查廓爾喀王公叔姪，自歸化以來，諸事稟命而行，實爲小心恭順。昨於六月初，特遣頭人哈斯達爾薩野等至界，稱有面稟事件。據聶拉木營官稟報前來，臣等因發給路票，差人護送到藏。據哈斯達爾薩野等將其國王請安稟帖及土儀鎗刀各一件呈遞。稟稱該國王及其叔巴都爾薩野、凜遵大皇帝諭旨，並將軍大人們教導，愛惜百姓，和睦鄰封，從未多滋事端。惟作木朗哲孟雄二部落之人，素來不安本分，往往造言生事，誠恐他們在大人們面前架說是非，又爭地界。那時大人聽信一面之辭，小的國王就擔不是，所以差小的等前來回明。哲孟雄營官寨，並喇嘛廟，及其餘各寨落，俱被我們占了。已有十年。現在哲孟雄只贖了日尼杵及崗多二處。我們現係天朝子民，固不敢妄自動兵，亦不肯令其覆滅。目下皆係各守境土。又作木朗亦係廓爾喀占了多年，只贖該部長之叔蘇班色一名。本係壞人，現在聞他往各部落借兵，希圖恢復。各部落皆未曾幫助。我們亦未窮追，誠恐蘇班色造言來告。小的國王求大人們

都不要聽他的話。並請差官定立交界等語。臣久知哲孟雄作木朗二處並非藏屬。爲廓爾喀侵占已久。且該處番民窮苦。貪占便宜。較唐古忒爲尤甚。隨傳噶布倫等詳細查問。委係被廓爾喀侵占已有十年。噶布倫所知情形。亦與哈斯達爾所說無異。是該二部落與藏中毫無關涉。而噶布倫及無知僧人。轉稱此二處雖不屬藏內管理。向來與達賴喇嘛相好。彼處廟宇。俱是經典上有的。今廓爾喀畏懼天朝。既來請示。求大人們趁此機會。仍照六輩達賴喇嘛所定地界割斷。豈不兩便等語。臣等因唐古忒人本糊塗。貪得便宜。不知事理輕重。固不值深加責備。當卽告以該二部落既係經典上有的。當初廓爾喀侵占之時。你們不去幫助。今廓爾喀既已恭順天朝。卽屬大皇帝臣民。與唐古忒一樣。况該國王侵占哲孟雄作木朗地方。在歸順天朝以前。本欽差焉有不爲屬國。反斷還不屬藏內管轄部落之理。反覆窮詰。俱各俯首。臣等公同商酌。廓爾喀恭順小心。既來請示。固不可令其欺凌弱小。亦不值代爲分定疆界。自當遵照前奏。置之不問。隨於次日。傳集哈斯達爾等面諭。哲孟雄作木朗二部落雖非藏內統轄。究屬與達賴班禪二喇嘛從前相好。既稱爾國侵占已有十餘年之久。本欽差斷不肯仍然令爾退還。但哲孟雄現在僅有日尼杵崗多二處棲身。作木朗亦僅有蘇班色一人。爾等當體大皇帝好生之心。不可過於追迫。各安本分。歸告爾王。總以凜遵大皇帝諭旨。和睦鄰封。愛惜百姓。方不負大皇帝成全爾國至意。至於邊外地方。本欽差亦不值差官代定交

界當據哈斯達爾伏地叩頭感激悅服之情形於顏色。臣等隨酌量賞與盤費。派員護送起行。並與拉特納巴都爾緞錦等件。以爲酬答。一面嚴飭各邊界頭人。亦不得容留該部落之人。致滋事端也。等因具奏。奉硃批。所辦得理好。欽此。

十一月初五日。奉上諭。和琳等奏廓爾喀差頭人哈斯達爾薩野到藏請安遞稟一摺。所辦得理。已於摺內批示矣。廓爾喀因侵占鄰近部落地方。惟恐其希圖恢復。差人赴藏稟明。並又續請差官定界。設遇胥無定見之人。又必聽從所請。率爲割斷邊界。又致生事端。卽如藏中噶布倫及僧人等。俱以該二處雖不屬藏內管理。向與達賴喇嘛相好。彼處廟宇。俱係經典所有。請仍照六輩達賴喇嘛所定地界。爲之割斷。此等愚昧無知之人。經該部落侵凌。卽懦弱無能。紛紛逃散。及仰仗天朝兵威平定之後。又復藉勢貪佔便宜。妄求定界。今和琳並不聽信噶布倫等浮辭。實屬可嘉。卽向廓爾喀頭人明諭。既不准其欺凌弱小。亦不復更爲分定疆界。既不聽藏中覬覦之心。亦足以悅服廓爾喀之心。而哲孟雄等部落。聞知天朝割斷公允。亦必益加感畏。實爲得當。嗣後接任之員。遇有此等事件。俱當堅持定見。仿照辦理。切勿爲浮言所惑。邊界自可永遠甯謐也。將此諭令知之。欽此。

五十九年正月。駐藏大臣工部尙書都統和琳。副都統成德等具奏。爲籌辦藏界。補立鄂博。以期久遠事。查有藏屬薩喀邊外。作木朗以東。洛敏湯地方一處。人戶三四百家。向來頭人。係其自立自廢。

既非藏屬。又不屬作木朗管理。閒嘗差人與達賴喇嘛呈遞哈達。或送銀錢五六十圓。以爲布施。五
十三年以前。亦被廓爾喀侵占。每年卽與廓爾喀當差。仍送商上銀錢五六十圓不等。自五十七年
大兵進勦時。洛敏湯便不與廓爾喀交納錢糧。去年廓藩貢使到藏面稟。應歸於何處管轄。臣等詳
細查明。委係另有一小部落。與藏中毫無關涉。但離薩喀邊界止有三天路程。恐唐古忒退有後言。
臣等曾面與達賴喇嘛噶布倫等商議。洛敏湯一處。固非藏內地方。然離邊界較近。爾等如以地方
緊要。本欽差卽不許廓爾喀侵佔。廓爾喀亦必不敢不從。但既歸藏內管理。其頭人出缺。自應歸駐
藏大人及達賴喇嘛揀放。錢糧亦應交納商上。未有三四百戶。只交銀錢五六十圓者之理。且屬朋
情布施。亦難向廓爾喀啓齒。據達賴喇嘛噶布倫等僉稱。洛敏湯頭人向來俱係其自立。不屬藏中
管轄。彼處百姓亦皆桀驁難馴。斷不服管。商上亦不藉伊五六十圓銀錢用度等語。臣等仍遵前旨。
仿照辦理。哲孟雄作木郎之例。面諭該貢使。以洛敏湯係邊外極邊小部落。並非藏內管轄。應聽爾
自行辦理。歸告爾王。總以凜遵諭旨。和睦鄰封。愛惜百姓。毋得稍有越佔。致負天恩等語。該貢使叩
頭感於辭色。臣等因思濟隴。聶拉木。絨轄各邊界業經臣福康安俱已派員酌中立有鄂博。而藏界
西南通外番地方。如薩喀。定結。帕克哩等處。均未定有鄂博。難保日久不無爭端。查遊擊張志林熟
於邊務。令其帶領營官。先行前往各邊。會同各營官。自薩喀起。酌於緊要處所。將應立鄂博地方。繪

圖貼說。毋得草率從事。三月閒。卽應駐藏大臣巡邊操演漢番官兵。臣和琳於二月底起身到彼。計張志林可以辦竣。統俟。臣親自酌定。眼同堆立鄂博。實爲一勞永逸之計。是藏中皆有定畧。嗣後邊外各部落。設與廓爾喀少有爭競。總與藏中無涉。廓爾喀亦斷不敢妄踰一步。唐古忒人雖糊塗。亦有遵循。可期永遠無事等因具奏。奉硃批。知道了。欽此。

五月。駐藏大臣工部尙書都統和琳奏。爲定日閱兵完竣。隨帶遊擊張志林、噶布倫丹津、那木結戴、琿拉旺策卜丹等。攜帶噶廈底案。由薩迦宗喀、聶拉木、絨轄、定結、帕克哩沿邊一帶。率同該處營官。悉心講求。查對底冊。張志林所擬應立鄂博處。所均與噶廈底冊及年老番民稟告相符。查各處路徑崎嶇。雪山重疊。臣分派營弁。眼同各該處營官。將舊有瑪尼堆者。加高添砌。其全無形迹者。一律堆設整齊。所有唐古忒西南與外番布魯克巴、哲孟雄、作木朗、洛敏湯、廓爾喀各交界。均已劃然清楚。再查定結屬下有噶爾達一處。亦係通廓爾喀小道。向屬阿哩公管理。而阿哩公駐劄前藏。每年遣一人前往收取租息。臣查五十三年。郭爾喀卽由此回巢。原不屬營官管轄。是以毫無阻滯。今臣飭噶布倫將商上非屬緊要莊田。核其所得租息。撥與阿哩公一處兌換。將噶爾達歸於定結營官管轄。以重邊防等因。

西界

西至廓爾喀部落爲界。由前藏西行。經聶黨格。過鐵鎖橋。至于壩拜爾吉。過于布拉。

即西崑崙

至羊卓白

地。沿海行走。由仁蚌至日蓋子。卽札什倫布。仍仲甯翁結巴寺後山。自札什倫布西行十日。至三桑。乃阿哩界。由三桑過崗得寨。入阿哩噶爾渡界。一由三桑墨雨拉。經脅噶爾。至聶拉木交巴爾布界。

此係舊

志所載案。新定界址。自札什倫布西行。由拉孜。至脅噶爾。定日。宗喀。薩喀。通狹巴嶺山。鍋拉納山。畢

都納山。朗古山頂。納汝克喀山頂。朗雜山頂。均設立鄂博。此內爲唐古忒境。此外爲洛敏湯。作木朗。二部落境。又自宗喀通濟噶。至熱索橋。設立鄂博。此內爲西藏境。此外爲廓爾喀境。又自定日通聶拉木。至鐵鎖橋。設立鄂博。此內爲西藏境。此外爲廓爾喀境。又自拉孜通絨轄。至波底山頂。設立鄂博。此內爲西藏境。此外爲哲孟雄境。又自定結。至薩熱喀山頂。臥龍支達山頂。羊珊山頂。設立鄂博。此內爲西藏境。此外爲哲孟雄境。又自干壩。至洛納山頂。丈結山頂。雅納山頂。設立鄂博。此內爲西藏境。此外爲哲孟雄境。又自帕克哩。至支木山頂。臧猛谷山頂。日納。宗官察。設立鄂博。此內爲西藏境。此外爲哲孟雄。布魯克巴。二部落境。又臧曲大河南。本係哲孟雄地界。被廓爾喀侵佔已久。臧曲大河以外。俱係廓爾喀境。

西南界

西南至布魯克巴、巴勒布二部落爲界。

巴勒布、今屬廓爾喀。

一由納格爾行八日至帕爾。與布魯克巴交界。山川

險阻。難以出入。一由業爾奇木樣納山業朗地方至結隆。與哲孟雄宗里口交界。一由業爾斯卡祿納山業朗寨爾交廓爾喀界。俱係險道。西南又自怒江北哨義桑昂却宗。瀾滄江各處。至阿布拉。通南墩大道。

南界

南至狍獮茹巴之怒江爲界。由拉撒東南行一日。過鍋噶拉大山。至宋布堡。過宗噶拉山、札拉山。至押噶。交藏江。至怒江。其地廣闊無垠。不能悉載。怒江之水。不知其源。江闊數里。兩岸石壁峭立。中流急湍。不可以舟楫。其地亦名工布。

東南界

東南由前藏朗陸山轉出達則。經珠貢寺。及沙金塘草地。古樹邊卡。至春奔色。接類烏齊界。通察木多大道。

東界

東至巴塘之南墩甯靜山爲界。雍正三年。松潘鎮總兵周瑛勘定。疆址始定。於南墩甯靜山嶺上建

立界牌。嶺東之巴塘、裏塘屬四川。嶺西屬西藏。其中察卡中甸。由前藏東行十里許。過機楮河。即藏江至墨竹工路皆平坦。自此經拉哩碩板多。察木多。乍了。江卡。至南墩。跬步皆山。崎嶇險仄。計程三千五百零五里。

東北界

東北至西甯所管之那木稱巴彥等番族爲界。由前藏北行十五里。向色拉山東。過鍋拉山。至浪宕。由隆竹松過彭多河。有鐵鎖橋。過河。由角孜拉山。呼正寺。增頂工。至木嚕烏蘇。通西甯大道。又由玉樹接西甯。松潘。泰甯三處大道。又通略隆宗。類烏齊地方。

北界

北至草地爲界。由前藏西行。出羊巴井口。至新橋。即平川。西通後藏。東接噶勒丹。北行草地。至木嚕烏蘇。噶爾藏骨岔。交青海界。

西北界

西北亦係草地。有克哩野大山。納克產隘口。北通哈具得卜特爾。又北直至木嚕烏蘇渡口。仍交西甯大道。其東接玉樹界。又羊巴井至桑沱洛海。過紅塔爾小山。過拉納根山。即騰格哩諾爾。即天池也達

木地方係每年出防處。由吉札卜至價格物角隘口。東北至噶爾藏骨岔。阿爾坦諾爾一帶俱通沙雅爾、和闐、回疆地方。

衛藏通志卷三

山川

謹案西南番地山川山海經所不載。水經注亦未傳。第引法顯佛國記爲阿耨達五天竺之證。率誕詭不經。唐元奘法師遊西域十有七年。撰記十二卷。世不傳其書。且山川名目古今音譯尤多訛舛。未得方言之真。茲閱四川通志。又詳考一統志。并雜志家所載。依次編纂。

康熙六十年二月。奉上諭。朕於地理從幼留心。凡古今山川名號。無論邊徼遐荒。必詳考圖籍。廣詢方言。乃得其真。故遣使臣至崑崙山西番諸處。凡大江、黃河、黑水、金沙、瀾滄諸水發源之地。目擊詳求。載入輿圖。今大兵得藏。邊外諸番悉歸仁化。三藏阿哩之地。俱入版圖。其山川名號。番漢異同。當於時考證明核。庶可傳信於後。大概中國諸水。皆發源於東南內外大幹。其原委可得而縷晰也。黃河之源。出西甯徼外庫爾坤山之東。衆泉流出。沮洳渙散。不可勝數。望之燦如列星。蒙古名鄂敦塔拉。西番名蘇羅木。譯言星宿海也。是爲河源。匯爲查靈、鄂靈二湖。東南行折北。復東行。由歸德堡。積石關入蘭州。岷江之源。出於黃河之西。巴顏哈拉嶺。七七勒哈納。番名岷捏蘇。漢書所謂岷山。在西徼外。江水所出是也。而禹貢導江之

處在今四川黃勝關外名楮山

番語謂水爲楮

古人謂江源與河源相近禹貢岷山導江乃引其流非源斯言實

有可據其水自黃勝關流入灌縣分數十歧至新津縣復合爲一東南流至鉞州府金沙江入之金沙江

之源自達賴喇嘛東北烏泥烏蘇流出烏尼烏蘇譯言乳牛也其水名烏魯烏蘇東南流入喀木地

喀木即康

也今名察木多

又東南流逕中甸入雲南塔城關名金沙江至麗江府亦名麗江至永北府北會達沖河東流經

武定府入四川界至鉞州府合岷江流經夔州府入湖廣境由武昌府與漢江合漢江之源出陝西甯羌州北嶓冢山名漾水東流至南鄭縣爲漢水入湖廣界東南流至漢陽縣漢口合岷江此諸水自東南大幹之內故發源於西番流入中國也瀾滄江有二源一源於喀木之噶爾機雜噶爾山名雜楮河一源於喀木之濟魯肯他拉名敖木楮河二水會於察木多廟之南名拉克楮河流入雲南境爲瀾滄江南流至車里宣撫司爲九龍江流入緬國瀾滄之西爲哈拉烏蘇卽禹貢之黑水今雲南所謂潞江也其水自達賴喇嘛東北哈拉諾爾流出東南入喀木界又東南流入怒夷界爲怒江入雲南大唐隘名潞江南流經永昌府潞江安撫司境入緬國潞江之西爲龍川江龍川江之源從喀木所屬春多嶺流出南流入大唐山隘西流爲龍川江至漢龍關入緬國此諸水在東南大幹之外故皆流入南海也又雲南邊境有檳榔江

者。其源發自阿里斯之東。

阿里斯即今之阿哩。自後藏札什倫布西行十日。乃阿哩地方交界。由三桑至岡得塞入阿哩噶爾渡地方。西北乃納達克會長得領那木札爾地土。

達木珠喀巴普山。

譯言馬口也。有泉流出。爲雅木藏布江。從南折東流。經藏危地。過日噶共遙爾城旁。合噶爾諾木倫江。又南流。經工部地。入雲南古勇州。爲檳榔江。出鐵壁關。入緬國。而岡底斯之南。有山名朗卜切喀巴普。譯言象口也。有泉流出。入瑪匹木達賴諾爾。又流入朗喀諾爾。兩湖之水西流。至桑納池。岡底斯之北。有山名僧格喀巴普。譯言獅子口也。有泉流出。西亦至桑納池。二水合而南行。又折東行。至那克拉蘇木多地。與岡底斯西。瑪卜加喀巴普山之水會。瑪卜加喀巴普者。譯言孔雀口也。其水南行。至那克拉蘇木多地。會東行之水。東南流。至額納特克國。爲岡噶木倫江。卽佛書所謂恆河。佛國紀載。魏法顯順恆河入南海。至山東之渤海入口。應卽此水矣。梵書言四大水出於阿耨達山。下有阿耨達池。以今考之。卽岡底斯是也。唐古忒稱岡底斯者。猶言衆山水之根。與釋典之言相合。岡底斯之南。有二湖接連。相傳爲西王母瑤池。意卽阿耨達池也。又梵書言普陀山有三。一在額納特克之正南海中。山上有石天宮。觀自在菩薩遊舍。是乃真普陀。一在浙江之定海縣海中。謂善才第二十八參觀音菩薩說法處。一在圖伯特。今番名布達拉山。亦爲觀音化現之處。釋氏之書。本自西域。故於彼地山川。頗可引爲據也。禹貢導黑水至於三危。舊註以三危爲山名。而不知其所在。朕今始考其實。三危者。猶中國之三省也。打箭爐之西南。達賴喇嘛所

屬拉里城之東南為喀木地方。

即康也。

達賴喇嘛為危。

烏斯與危衛同音也。

班禪呼圖克圖為藏地。合三地為三危耳。哈

拉烏蘇由其地入海。故曰導黑水。至於三危。入於南海也。至於諸番名號。與史傳不同。而亦有可據者。今之圖伯特。即唐之突厥。唐太宗時。以公主下降。公主供佛像於廟。今番人名詔詔者。譯言如來也。其地猶有唐時中國載去佛像。明成化時。烏斯藏大寶法王來朝。辭歸時。以半駕鹵簿送之。遣內監護行。內監至四川邊境。即不能前進。而留其饑仗於佛廟。至今往來之人。多有見之。此載於明實錄者。爾等將山川地名詳細改正具奏。欽此。

衛藏。

今以布達拉為前藏。札什倫布為後藏。統名曰衛藏。

布達拉山。

前藏地方。四面皆崇山峻嶺。不生草木。殆古所云鐵圍也。其中原隰平衍。南北約六七十里。東西約二百餘里。中通藏江。自東北繞西南流。藏江之北。北山之南。平地突起一石山。圍五六里。高一里許。名布達拉依山。壘砌層樓十三

層。為達賴喇嘛坐牀之所。見寺廟門。唐古忒語。

凡山名布達。普陀之轉音也。山曰拉。水曰榑。後倣此。

招拉筆洞山。

布達拉西南。山勢起伏相連。中嶺鑿斷。接砌石塔。中通道。山極陡峻。亦似平地突起。高二里許。南鄰藏江。山頂壘砌層樓。業醫喇嘛居之。見寺廟門。

磨盤山。

招拉筆洞之西北。亦似起伏相連。形如磨盤。故名。

羅卜嶺岡。布達拉西南十五里。藏江南岸。其北岸平野叢林。開砌池沼。引藏江水灌之。亭船具備。爲達賴喇嘛暑月澡浴之所。乃清幽勝境也。

牛魔山。藏江之南。高二百餘丈。爲布達拉屏障。達賴喇嘛每歲送老工夾布於其上。

僧格拉山。前藏南。連絡重疊。崎嶇難行。唐古忒語謂獅曰僧格。以山形似獅故名。

札拉山。與僧格拉相連。路不甚險峻。

鍋噶拉山。前藏南行二日。桑葉地方。山高積雪不消。中多瘴氣。

奔巴拉山。前藏東南。唐古忒語謂瓶曰奔巴。山形如奔巴瓶故名。

洞噶拉山。布達拉西三十里。崢嶸連雲。高四百餘丈。唐古忒語謂海螺曰洞噶。山形似螺。故名。近藏江北岸。中設關卡。爲布達拉關隘。

業黨山。前藏西南行三十里。名登龍岡。過大橋。又西南折。山勢陡峻。爲前藏西面屏障。通後藏大道。

根柏山。布達拉北面屏障。與別蚌寺後山相連。

札羊宗山。前藏山南。上建多爾濟札古寺。山有石門。

色拉山。布達拉北二十里。色拉寺後。唐古忒謂金曰色。其山產金。故名。達賴喇嘛派人封閉。

浪黨山。色拉寺後。平險。參半。上下約三十里。

角子拉山。前藏東北。上建呼正寺。俗名熱正寺。路徑曲折。鳥獸寂然。如喇嘛振鐸呼之。山禽獐鹿畢集。

郎路山。前藏東北。

乳牛山。前藏東北。

沙羽克岡拉山。前藏北。

喇根拉山。前藏北。

噶勒丹山。俗名甘丹山。前藏東。噶勒丹寺後。

克哩野拉山。前藏北途長淤沙積雪。煙瘴逼人。自羊八井入草地。至巴彥圖河。皆大山難踰。

墨雨拉山。前藏西高峻。積雪多瘴。

鳴木布拉山。俗名甘不拉。前藏西行一百七十里。至曲水。渡藏江。通後藏大道。即西崑崙山也。

岡巴則山。離曲水五十里。由溝內登陟。過嶺南。即西海子。亦頗側難行。

札什倫布山。過春堆四十里。入山口。亦平原宏敞。有山自西北蜿蜒而結成平槽。形如蟹蓋。名札什倫布。依山建寺。為班禪額爾德尼住錫之所。四面皆平遠。岡巒列嶺。拱抱。惟北面有崇巖疊嶂。高不可測。

岡底斯山。即大霧山池。阿哩地方之東北。周一百四十餘里。峯巒陡絕。積雪如懸崖。山頂百泉聚流。至麓即伏。實諸山之祖脈。梵書所謂阿耨達山也。

達木殊喀巴普山。岡底斯山之東。唐古忒帶。達馬也。達木殊馬王也。喀口也。巴普盛食糌粑木盒也。山形似馬口。有泉流出。故名。

朗卜切喀巴普山。岡底斯山之南。唐古忒語。朗卜切。象也。山形似象口。有泉流出。故名。

僧格喀巴普山。岡底斯山之北。唐古忒語。僧格。獅子也。山形似獅子口。有泉流出。故名。

瑪卜加喀巴普山。岡底斯山之西。唐古忒語。瑪卜加。孔雀也。山形似孔雀。口有泉流出。故名。梵書所云阿耨達山四大水。即出此四山也。

通拉大山。後藏西南十餘里。峯巒峻峭。積雪不消。由定日通濟拉木大道經此。

狹巴嶺山。鍋拉納山。畢都納山。朗古山。納汝克喀山。

朗雜山。札什倫布西。由魯噶爾、定日、宗喀、薩喀等處通此數山。此外為廓爾

境。略

波底山。由絨轉通此山。此外為哲孟雄境。

杏撒熱喀山。臥龍支達山。羊瑪山。由定結通此數山。此外為哲孟雄境。

洛納山。丈結山。雅納山。由甘孛通此數山。此外為哲孟雄境。

支木山。臧猛谷山。由帕克哩通此二山。此外為哲孟雄、布魯克巴二部落境。

圖巴鄂色山。登龍岡之西。

嘛哩噶布山。桑黨之西。

札克洞山。曲水之東。

甘壩山。過巴則嶺。

札什岡。

甲錯山。過拉子一站。

紫日山。協噶爾。

佳納山。弄拉木。

薩爾山。宗喀赴薩迦寺大道。

常桑山。常桑。

浪噶山。札什倫布之西。

噶拉山。

日洞山。曲水。

噶如山。宜椒。

納雅山。由花藥子赴彭錯嶺大道。

羅羅山。過拉子兩站。

達爾結嶺。弄拉木。

工湯拉山。宗喀。

江納山。湯谷。

拉喀山。俱在噶喀。

日蚌山。昔喀。

拉古囉古山。過務庸官寨。

洋卓雍錯海。下甘壩山。

熱水塘。過拉子兩站。

普出河。定日。

鹿馬河。宗喀。

熱水塘。熱噶。

廓拉海。星克宗。

熱水塘。羊八井。

藏布江。

舊志載其源有三。田自三壩。經流至熱正寺。歷湯家古索。合流白楮河。一出自剛喇山。經流至竹貢寺。噶定。合三壩水。會於白楮河。三江之水聚為匯。過達克則。德慶。至西藏門首。有木船度船為渡。又名機楮河。按藏江原委。不見史冊。

碩布山。碩布巴拉。

雅納臧布大河。

彭楚河。協噶爾。

納錯海。距宗喀一站。

補泥海。宗喀赴薩迦大路。

甲木海。熱噶。

碩布河。碩布巴拉。

鹽海。

今考錢坫西番水地記一卷悉遵照
皇輿圖大清一統志編輯謹纂入

大金沙江番名雅魯藏布江源出番西界卓書特部落西北達木楚克哈巴布山三源俱東北而合

折東南

有庫木岡前山水自西南來會又東北流加蘇木拉河自西北來會其水源出卓書特西北沙庫雅拉山麻拉山及佳拉山捏立嶺四水合流而爲一又南合西來之查爾河東流入藏布江江水又東有阿拉楚河自北來會其水源出沙

拉木岡前山南流入藏布江江水又折南流又東北有那烏克藏布必拉自東北來會水在卓書特西南源出東北桑里池西流受北來尙里噶巴嶺及木克陸山二水南來拉主克山阻崙山羊巴木山三水由羊巴木嶺西折南流又受西北來雅拉嶺大克陸山二水又南入藏布江江水又東南有郭永河自東南來會水在卓書特東南有四源一出昂則嶺名陸列河一出蓋楚岡前山名蓋楚克河一出賽丹山名珠克河一出拉魯岡前山名拉魯河俱東流合而爲一又東北入藏布江江水又東南有一水自西南來會又東南折東北又東南有一水自西南尼雅陸岡前山來會又東有薩楚河自東北來會水在薩噶部落西南源出岳落岡千諾山有六水俱南流會爲加巴蓋河又南合西北拉主克阻倫羊巴木山三水又合西南昂色昂勒宗山二水又東南折西南又合東北查噶貢噶爾他拉山二水西南捏木山及六色立羊鼓山二水爲薩楚藏布河西南入藏布江江水又東南有二水自北來會又東有鹽楚河自南來會水在薩噶部落西南有四源一出西南札木東塔拉泉一出南圖克麻爾塔拉泉一出南那木噶山北三源合而東北流一出東南大克拉塔泉西流與三源合北流入藏布江江水又東有式爾底河自南來會水在薩噶部落西南有三源一出西南沙盤嶺一出南舒拉嶺俱東北流而合一一出東南楚岡里窪甘山北源與二源合入藏布江江水又東有滿楚藏布河自北來會水在薩噶部落西南北有斜爾充山撒龍山二水南流合東來充札達克山三水又合西來拉克藏卓立山水爲河又東南流入藏布江江水又東又一小水自南來會又東有一水自南來會水有二源一出西南岡里窪甘山中一出南牛拉嶺合而北流

逕阿里宗城西。又北合東南來一水。又北入藏布江。江水又東。折東北流。有薩噶藏布河。自東北來會。水在薩噶部落東南。源出東北拉布池。池水泛溢。伏流復出。西南曲流。有一水。北自必普塔克拉克山東南流。合東北拉薩阿爾山水。又西南合西北來一水。又西南。有拉普岡冲山水。西南流注之。又西南合西來一水。又南有東北岡陸山。二水合而西南流。又合東南凡布陸山水。又西南折東南流。曰薩噶藏布河。又東入藏布江。江水又北折西北流。屈曲有小水二。自南來會。又屈曲東南流。有嘉木磧池水。自北來會。水自章阿布林城來。城在日喀則城西北約千里。江水又東南。有一水。自西南來會。水二源。一出西南瓜查嶺北麓。一出東南牙噶陸山北麓。北流而合。屈曲入藏布江。江水又折北流。二山南麓。則彭楚藏布江也。又西北有隆左池水。自西北來會。又東北流。有莽噶拉河。自南來會。水源出那拉古。察山。江水又東北。有鐵里山水。自東南來會。又東北。逕章拉則城北。城在日喀則城西北千里。江水又東北。有鄂尼楚藏布河。自西北來會。水源在章阿布林城西北。有楚拉喇山。一水西南流。合東來一水。又西南匯爲那木楚克鄂模。其北有多存岡山水南流。亦匯焉。池周百里。從西南流出。折東南。又爲陸岡普池。又東流出。有三水。自西合而來。會曰大克楚河。又東有江楚河。自西南來注之。又東。逕邦拉嶺。章阿布林城嘉木磧池之北。屈曲又東。有拉山水。自西北來注之。折東北。至穆克布查薩木馬鐵鎖橋北。有北來之鄂尼楚河。自江林普拉山南流來會。折東流。入藏布江。江水又東。經益蘇克零城北。又東北。有一水。自北來會。又東北。有一水。南自婆色納木山來會。又北。有戒武田河。自北來會。又北。折東流。有打克北朋楚河。自北來會。折東南流。有薩布河。自南來會。其水源出楚拉米洪羅綽爾莫三山。有三泉流出。北流有二水。一自西南來。名架河。一自東南來。名當楚河。俱會。又北。逕日喀則城西。界入藏布江。江水又東。逕日喀則城北。城在拉撒西南。即班禪之所居也。江水又東。有年楚河。自南來會。水有二源。一出珠母拉木山。東北流。一出其東。順拉嶺。池泉數十。匯爲一水。北流。二源合。曰章魯河。又東北。至娘娘廟前。有八水。從東北喀魯嶺諸山。又南。札木長山。社山來合。而西南流注之。折西北。過江則城西。又西北。過向滿城西。又西北。與南來一水合。又北。與西來二水合。又北。曰年楚河。過日喀則城東南。得蘇木嘉石橋。橋長七十丈。十九洞。又北。入藏布江。江水又東北。有尙河。自北來會。水亦曰商河。源出西北。結札拉山。東南流。有造索克布山水。西來注之。又東南。逕尙那木林城南。有佐山水。自北注之。又東南。

入藏布江。江水又東，逕普冬廟前。又東，有一水自南來會。又東北，有烏爾克河自拉公山來會。又東，得薩拉珠噶鐵鎖橋。又東，逕林森城北。有龍前河自南來會。其水源出東珠木哈拉山。西南流，與西來弩金剛藏山水合。折西北，逕林森城東。又北，入藏布江。江水又東北，有担木河自西北來會。水源出拖巴山。江水折東南流。逕拜的城北。有一小水自西北來會。其城東南有牙木魯克于木卒池。廣四百五十里。池中有山三。一曰迷納巴。一曰鴉博士。一曰桑里。下流甚衆。時白時黑。或成五采。池水環之。在烏爾克零喀城之東北。納噶則城之正東。其水不竭。江水又東北，逕楚舒爾城南。又東南，逕日喀爾公喀爾城北。有噶爾招木倫江自東北來會。其水有二源。一曰迷的。克藏布河出默魯公喀城東北。迷的。克池。池廣數十里。西南流，與東南來一水合。又西南，與東南一水合。流入西南。曲折西北流。與西北來之盤吞西里克塔拉合。又西流。與北來一小水合。又西南，逕蓬多城東北。而與達木河會。其西南源曰達木河。出蓬多城東北。查里圖嶺。西南流。有拔布陸河。東自央噶拉嶺來會之。又南，逕蓬多城北。而與迷的。克河會。二河既合。名噶爾招木倫江。又東南，與西來二水合。又東，與北來一水合。又東南，曲曲流。逕鄂那廟。又東南，與東來岡噶拉嶺水合。又西南，得鄂那鐵鎖橋。又南，逕默爾公噶城西。又南，折西曲曲流。逕噶勒丹廟北。又西，逕第巴達克城南。又西南，有一水自溫主普宗城西北來注之。又南，逕得沁城北。又折西曲曲流。逕拉撒南。拉撒者。唐時吐番舊部。今爲達賴喇嘛所居也。城內有伊克昭廟。暨唐長慶碑。又噶爾招木倫江。又西北，逕洞噶爾城東南。與東北來一水合。又西南，逕日噶爾公噶爾城北。而入藏布江。江水又東南，有一水自南來會。又東，有一水自南來會。又東，有一水自北來會。又東，逕薩木拖廟前。又東，有二水自北來會。一水自南來會。又東，逕乃布冬城北。有一水自南來會。又東，有巴楚河自北來會。又東南，逕桑里城南。也勒庫城北。有一水自北來會。又東南，有一水自南來會。又東，逕鄂克達克匣城西南。有聽里麻楚河自東北來會。其水東南流。其東北有池泉。南有陸拉嶺水。並逕城北。而合入藏布江。江水又折東南流。逕也庫城。達格布拉綏城東北。當碑古魯那木嘉城。達格布同春城。達格碑那城北。有年楚河自北來會。其水源出沙羽克岡拉山。卽噶勒丹廟東南山也。有水曰麻田河。與南巴拉嶺之巴陸楚河合。東北流。與北來烏山之烏田河合。又東，折南，逕公布札木達城東。

南有水曰佳囊河自北來繞城東而合又東南曲曲流逕公布碩格城南與東來巴宗阻池水合又東南折西南與西來札布山之牛楚河合又南逕公布竹木城東地母城西又東南逕則布拉岡城東又南入藏布江江水又東逕察木哈廟北有薩木陸拉嶺水自東北來會又東南逕森打麻廟西禿哥里山西南又南流入羅喀布占國界會岡布藏布河朋楚藏布河折西南入厄訥特克國入南海

岡布藏布河入藏布江

自喀木部之拉里廟會東北察拉嶺水東偶工拉嶺水東南流有一水自西北章阿爾松山來會又東南有尼楚河自東北來會其水源出喀布地之琴布工拉爾山西南流入岡布河河水又東南有

牛楚河自西北來會又東得達克拉臻橋又東有一水自東北來會又東南曲曲流有一水自東北來會又南逕的雅爾山西入岡布部落抵撒皮唐他拉東喀木境有薄藏布河自北來會其水源出喀木達里土宗城東南舒板多城南有春多大嶺二水合而入岡布河河水至此其地人呼爲喀克布必拉逕噶克碑書里東城西又南逕賽水隆嶺東榮格拉岡里山西出岡布界逕公拉岡里山又南入羅喀布占國界入藏布江

朋楚藏布河入藏布江

在薩喀部落東南有三源一西出書爾穆藏拉山一東出西爾中麻山一東南出瓜查嶺合而東南流有一小水自西來會又南有一水自南來會水出綽爾猛通那岡里山又南折東有一水自南來

會一水自北來會又東南有二水自西南來會其水一出卓什岡甘山一出阿巴拉山又東有一水自南來會又東北逕羅西喀爾城南有一水自西北來會其水出拉喀拉布山二源同流逕城北入朋楚河河水又東北有羅楚河自北來會其源出牙噶陸山及東北岡木阿山三源合而南流入朋楚河河水又東北有羅布藏河自西北來會又東繞岡陸前山北折南流有一水自東北來會丁家城西出林窩拉山及蘇庫岡甘山者也河水又南曲曲流有牛楚藏布河自西來會水出東拉嶺則里木布山珠木朗瑪山阿巴拉山納潭勒山北拉嶺諸水匯而東南流者河水又東南有帕哩藏布河自東北來會水在帕哩宗城東北有一水西南流爲噶爾撮池又西南爲札木撮池又西南折東與東北來一水合又西南與西北來之噶拉嶺水合又西南逕帕哩城西又西南與東

來一水合。又西南入朋楚河。河水又西南。有牛楚河。自西來會。其水源出喜拉岡參山。東南流。合東北岡布乾山水。又東南。與西來一水合。又東南。逕凡陸城南界。與北來札木珠山水合。始曰牛楚河。又東流。逕年爾木城北界。折東南。曲流。又東北。入朋楚河。河水又東南。逕珠拉律部落。入厄訥特克國界。下流入藏布江。

岡噶江

源出岡底斯山東南。山在番地極西。阿哩之達克喇城東北。直西甯府西南五千餘里。以道里計之。當即佛書所稱阿耨達山也。東有達木楚克喀巴普山。則雅魯藏布江之所出也。東南有朗卜切喀巴普山。山形似蹲象。故名。其山北麓有泉。出匯爲池。西北流。有一水自北來會。又西北。有公生池。水東北來會。其水二源。一東北出大克拉公馬山。西南流。一東出卓書特西界馬爾岳木嶺。嶺在阿哩之東界。即岡底斯向東南之支山也。其水流匯爲池。池廣八十里。不流。西十餘里。又有一池。湧地而出。長三十里。有一水自北注之。西南流。又與東北來一水合。又西南。入朗卜切喀巴普山水。而爲瑪匹木達賴池。池南北百五十里。東西百里。又西出爲浪噶池。池南北百七十里。東西百里。又西出。折南曰狼出河。曲流。有楚噶拉河。自東北來會。水源出藏文嶺南麓。南流。折西南。逕古格札什倫布東。則城東南。又西南。入狼出河。河水又西。折北。又東北。逕古格札什倫布城西。則布魯城東。折西北。又西南。逕則布魯城西南。又折西。曲流。西南流。逕出木爾的城北。又西。曲流。抵阿哩西鄙桑那出木多境。有拉楚河。自西北來會。其水源出岡底斯山北。僧格喀巴普山。山形似獅。故名。南麓有池。廣數十里。匯諸泉水。西流。折南。逕岡底斯山西南支峯。又西南。折曰拉楚河。折西流。有藏文嶺北水。自東南來注之。又西北。有大雪山。水自東來注之。山名遮達布哩阿林。在僧格喀巴普山之西。直布則城東北。有水西北流。屈曲折西。合彭錯泉水。又西。入拉楚河。又西南。折西北。有野公泉水。自東北來注之。水平地湧出。匯爲數道。西流。屈曲。在札什岡城東南。入拉楚河。拉楚河又西北。逕札什岡城西南。又西北。折西。曲流。與北來四小水合。逕出尺克則廟南。又西。抵拉達克城南界。又西。逕畢土克廟。又西。折南。曲流。又東南。折。入狼出河。狼出河既會拉楚河。水勢始盛。又西南。逕畢底城。西城爲阿哩極西地。又南。折東北。又東南。曲流。逕那克拉蘇木多北鄙。有麻楚河。自東北來會。其水源出達克喇城西北。瑪卜

加喀巴普山山形如孔雀故名東南麓有池東南流曰瑪楚河逕喀拉木多城北曲曲流逕布拉木達克拉城東有一水自西北來注之又南折西南有佳拉嶺水自東南來注之又西折南入狼出河狼出河既會瑪楚河曰岡噶江江水又東南出阿哩界逕瑪木巴作木朗部落至厄訥特克國入南海

騰格爾池

在拉撒西北日喀則城東北其東北隔山即露源之布喀池其北隔山則流沙也池廣六百餘里周千里東西長南北狹蒙古呼天爲騰格爾即天池也其東有三水流入皆名察哈蘇太河西有二水流入北曰羅薩河南曰達爾古

藏布河合西來數池水東流入池

哈拉烏蘇

前藏北行八日皮船通按哈拉烏蘇蒙古語黑水即露江上游番名鄂尼爾格源出薩喀北有巨潭曰布喀鄂模在大流沙之東廣一百餘里其水東南流又成一澤曰厄爾濟根鄂模廣百餘里又東南流又成一澤曰伊達鄂模

廣亦百餘里又東南爲哈拉池廣百二十餘里其水色黑即古雅望之嘉湖也又東南有一水自西來會又南有布倫河自南來會其水在哈拉池之東南東有公噶巴噶馬山之哈拉河魚克山之魚克河俱西北流合西南來之朔木池水入露江江水又東有駭拉池水自北來會又東折北逕巴楚山麓又東北有二小水自南來會一小水自北來會又東北有沙克河合布克河自西北來會沙克河源出拉撒北喀爾占古察嶺南流合都回山水又東南合布克河水布克河出布克山山連峯而東爲諾木渾烏巴什山其陰水入金沙江陽水即布克河也布克河既合沙克河又東南合庫蘭河水入露江江水又東北入喀木部折東南有索克占且索河自北來會其水源田伊克諾木渾烏巴什嶺及布哈山察漢峯流出之四水來會歷兩山開入喀木境又西南入露江江水又東南得索克薩馬木橋橋在索克宗城南境江水又東南折西南流始名鄂尼楚河又西南有一小水自西北來會又東南有一小水自東北來會一小水自西北來會又東南有一小水自西南來會折東流有一水自北至色里索木拖巴來會又東南有一水自東

北來會又東有一水西南自達哩上宗城之敦錯池北流合數小水來會又東有一水自南來會又東逕洛隆宗城北境有一水自北來會又折東南得札木雅薩木巴橋又東南有一水自北來會又南有一水自西來會折東又南有一水自西北來會又東南逕喀喇圖廟西又東南有一水自北來會又西南折東南有一水自西來會又南有鄂楚河自東北來會又南一水在匪坐里岡城西源出城北境納蘭嶺南流至加拉穆境入潞江江水又南屈曲流有一水自東來會又東南逕迷納隆境又東南入怒夷界曰怒江又南流入雲南麗江府界曰潞江

海子

通後藏大道過岡巴則嶺下周圍行四十八日水深不測中有山環繞西南隅有多爾濟拔姆宮

彭多河

前藏北行三日有鐵鎖橋亦有皮船

春良諾爾

前藏北行九日相傳亦天池也

阿克達水河

前藏北行二十五日

春結江

藏南前後藏之水於此合流由赤書羅卜喜洛出藏境即藏布江之別名也

怒江

即外夷界急湍奔浪不可渡

藏曲大河

哲孟雄部落西
與廓爾喀交界

阿耨達河

在岡底山下
阿哩東境

陸海

自札什倫布至阿哩
夏閒隨地皆水故名

年楚河

後藏東北水源有二
一出其東順拉嶺池
匯為一水又曰章魯河

業黨河

離前藏一百八十五里
由曲水
過鐵鎖橋今廢有皮船可渡

江達

舊志稱工布江達
工布者東南別
一部落也江達乃正站
今改正

鹿馬嶺

番名蒲葛倉在江達西
綿長平坦上下約
四十里風烈異常
無多積雪微有瘴氣

江達楮卡河

一自瓦子山發源
經東閣寺甯多至江達
一自鹿馬嶺發源
經順達刊木合流至工布達布會於藏布江

拉里

拉里大山。在大寺西山勢如龍形。上下五十里。極險峻。四時積雪。下至拉里。北接玉樹。乃青海要津。

瓦子山。番人呼爲灑拉山。層層積石。狀如瓦片。故名。上下約五十里。多積雪。崎嶇難行。離江達二日。

同安楮河。在拉里東。發源魯工拉山。經流撥竹卡。歷四十餘里。合得楮河。一名拉里河。

得楮河。在拉里東北。發源大偏關大山。經流拉里。會同安楮河。

松茄楮河。在拉里東。發源大偏關之大山。集經流桑結松多。與林楮河合流。至拉里。會得楮河。

熱水塘。在拉里東。四時常溫。番人呼擦楮卡。

達隆宗。即邊壩。又名賓巴。

必達拉山。在拉子西南。沿山平坦而小。上下十里。

沙工拉山。一名丹達山。過丹達塘十五里。上山頗側。難行。俯臨雪窖。西望峭壁摩空。中一小溝。蜿蜒而上。凜冽冰城。刺肌奪目。少有微風。斷不可過。有丹達神廟。必虔誠祈禱。乃得平靜。見寺廟門。

魯工拉山

與沙工拉相連，山勢平衍，長百餘里，冬春積雪不消，離拉里一日。

撒楮河

在達隆宗北，發源朔瑪拉山，經流索馬朗等處，東南流入偶楮河。

邊楮河

在達隆宗東南，發自達隆大山，合胃楮河，至賓巴，流入察木多等處，會偶楮河。

俄楮河

源出沙工拉之嘉木磋嶺，經流朗吉工等處，合葉楮河。

葉楮河

源出魯工拉山，經流至工多，合工楮河，又至阿南多，合俄楮河，同歸偶楮河。

碩板多

章拉山

在碩板多東，高峻險阻，上下約三十餘里，至曲齒，又名紫陀。

烏底拉山

在碩板多西南，勢不甚峻，越二十五里，至撥浪山寺，又五里，至中義多。

巴拉山

在碩板多西南，勢平坦，上下約三十里，至巴里郎。

朔馬拉山。一名賽瓦合山。在碩板多西邊。風獵獵亂山皆童。踰二十餘里。至索馬郎。

柱馬郎錯河。源出噶拉漫山坡。經流紫駝曲。向北流歸偶楮河。

胄楮河。源出烏底山。經流四十里。至碩板多。合柱馬郎錯河。會於偶楮河。

洛隆宗。

得貢拉山。在洛隆宗東。山勢陡峻。上下約三十里。至嘉裕橋。

得噶拉山。在洛隆宗西。山路陡險。九十里。過鐵凹塘。交碩板多界。

偶楮河。在洛隆宗西。源出噶爾藏骨岔海子。流入納克樹。至擦哇岡後。合瀾滄江。

峽隆喜楮河。在洛隆宗南。源出噶喇山。東流。至洛隆宗得貢拉山下。合偶楮河。

類烏齊。

瓦合大山。在魏烏齊西南。山大而峻。路險難行。四山相接。綿亘一百六十里。四時積雪。有數十丈之寒。行其上。愁雲瘴霧。日色慘淡。立有望竿堆。合周天三百六十之數。藉為鄉導。戒勿出聲。違則冰雹驟至。按康熙五十九年。雲南官兵三百餘。

員名至此山下繫營一夜
風雪人馬僵仆盡陷窖中

過脚山。略陡積雪。綿長五十里。有煙瘴。離瓦合山三日。八十里至拉貢。至察木多二日。乃川滇西藏三界之中。最爲重地。兩河環抱左右。有大木橋。東走四川。南達雲南。西通西藏。北通青海。乃扼要之區。

擦噶拉山。山頗平坦。上下約二十里。

葉達拉山。勢頗平衍。上下約三十里。至嘉裕橋交洛隆宗界。

紫楮河。在類烏齊東北。即昂楮河下流。

擦木多。舊名喀木。亦名康。亦名昌都。

達蓋拉山。在察木多東。山勢危峻。上下約四十餘里。接熱了界。

沖得拉山。在察木多東。高峻冲霄。上下約六十餘里。接哈申松林口界。

奪布拉山。在察木多東南。平坦易行。約二十里。

鼎格拉山。在察木多東南疊嶂。重崖上下約五十里。

魚別拉山。在察木多西南不甚險峻。上下約二十五里。接乍了巴貢界。

列木拉山。在察木多東。上下約五里。

巴貢山。蒙堡山。擦瓦山。雲山。雪山。白多山。納多山。黃雲山。隱山。拉貢山。

昂楮河。在察木多左源出中壩。因通雲南亦名贊河。

雜楮河。在察木多右源出九茹。因通四川大道亦名川河。二水合流入雲南界。

瀾滄江。番名雜楮必拉。有二源。一出喀木之雜坐裏岡城西北。格爾濟雜噶那山。即古和甸之鹿石也。其水東南流。有庫克噶巴。山水自北來會。又東南會左一池水。右二池水。又東南有一水自西來會。始稱雜楮必拉。又東南折南。逕蘇噶莽城西南。

又東南有一水自東北來會。一水自西北來會。又東南有一水自東北來會。折南。又西南。逕察木多廟東境。又西南。而與鄂木楮必拉合。鄂木楮必拉之源。出巴喇克拉丹蘇克山。其山在格爾濟雜噶那山之東。山下有十餘池。匯而西南流。有一源曰普陀戎他拉。自西南大山南流。屈曲合巴哩哈達水來會。又屈曲折東南流。逕察木多廟之西。而與雜楮必拉合。二源既合。亦統名曰雜楮必拉也。江水南流。又東南折西南。逕賈廟西北。有一水自東北匯東南來之滾兆宗城及查木敦喇水來會。江水至此。番稱獸楮必拉也。

又西南得札什達克雜木橋。喀木番部境之大橋也。又南有自出河自西北來會洛隆宗城東北有楚充千兩池水。番俱多布格鄂。糝合而東南流會雜格果貢阿林之水。又東南逕靈渦車廟前。又東南屈曲數百里入瀾滄江。江水又南有一水自西來會。又東南有一水自東北來會。又西南有一水自西來會。又南得占什達克薩瑪橋。又西南逕察喀羅巴西。又西南有雅爾瑪巴山水自西來會。又東南有喀塔噶哩布嶺水自西來會。又東南逕屈蟲帝蘇廟西南。又東南逕蒙番東境怒夷西界折東北流。又東南有一水自西來會。又東南有一水自西來會。又東南至雲南塔城關西入麗江府曰瀾滄江。

乍丫。

指達拉山。

在乍丫東。頗平坦。上下約十里。

昂拉山。

在乍丫西北。危峻難踰。上下約八十里。進藏要道。冬春積雪。行者苦之。

作拉山。

在乍丫西北。高陡險峻。上下約三十里。

勒楮河。

在大寺前。源出昂拉山下。合甲倉河。

樂楮河。

源出作拉山。亦合甲倉河。

甲倉楮河。源出官覺。經流洛隆宗。合樂楮河到乍丫界。

色楮河。源出上納多。經流江卡等處。西南流入察木多大河。

巴塘。

甲噶拉山。在巴塘東。凌霄插漢。上下約八十里。

龍新山。在巴塘東。險峭特絕。上下約三十餘里。冬春多積雪。行者苦之。

卜伊拉山。在巴塘南。不甚險峻。上下約二十里。

空子拉山。在巴塘西南。山勢平坦。上下約七十餘里。

甯靜山。在巴塘西南。山頂平坦。四十餘里。山中立界。山以東爲內地。屬巴塘。山以西爲外地。屬西藏。

喜松山。在巴塘西。勢甚高峻。上下約四十餘里。亦巴塘西藏交界。

巴冲楮河

在巴塘民堡之旁源出占對流入德爾恰合金沙江

金沙江

番名色楮河舊志載源出伊洛木拜圖流入木魯烏蘇等處至巴塘璿子勒入麗江歷雷番涼山合雅龍江會於敘州府大河此江渡口甚多惟春科工妥楮卡牛苟竹巴籠係官商大道修造木船以渡其餘俱係皮船按金沙江亦名犁牛

河古麗江也番名木魯烏蘇源出巴薩通拉木山東麓山形高廣形似犁牛其西麓水曰雅爾嘉藏布河西流入喀齊爾者是也東麓水爲金沙江亦曰倫布楚必拉亦曰巴楚必拉其水東北流與西北源合其水出巴薩通拉木山之西數百里勒齊爾烏蘭達普蘇阿林曰喀齊烏蘭木倫東南流入金沙江金沙江又東北與南源合其水出拜都嶺曰拜都河北流入金沙江三源既合水勢始盛又東北有阿克達木河自南來會其水源出布哈山東北伊克諾木渾烏巴什嶺北之特門塔拉二池東北流有小水二自東北來會曰伊克阿克達木水又有小水一自西來會曰巴哈阿克達木入於金沙江江水又北折而西有托克托乃烏蘭木倫自西北來會其水源出勒齊爾山東北西金烏蘭拖羅海山東流入金沙江自此山綿亘而東繞木魯烏蘇之北千數百里皆稱巴顏喀拉山其陰即黃河源也江水又北折而東又東南有波羅必拉自南來會其水源出伊克阿克達木河北之察蘇拉圖山北流而得烏蘭必拉其水源出格爾濟雜噶那山之西麓有烏蘭池周七十餘里自西流出爲必拉有巴圖拉水南自多倫巴圖爾嶺來會又北有庫博渾必拉東北來會又西北威會於波羅必拉波羅必拉又西北有郭汝克必拉南自察蘇拉圖山之西北麓來會又西北入金沙江烏蘭池東則瀾滄江所出之格爾濟雜噶那山也江水又西北折東有潤布倫山水自南來會山在格爾濟雜噶那山之北有賽音庫博渾山連岡相接又北曰洞布倫山有二水一田山西一出山東合而西北流入金沙江江水又東逕那木唐隆山古爾板波羅吉山始折東南流有圖虎爾河自南來會其水源出格爾濟雜噶那山之東北同布勒西洛西山一曰空楚河一曰和秦河北流而合東北逕好勒嶺及活呵洛好勒察漢峯之東北有水南自卓爾長山北麓合而入金沙江江水又東南有烏捏河自南來會其水源出厄爾機根嶺西北流逕巴木巴拉嶺西至薩拉隆達拉山北入金沙江江水又東南有那木齊圖烏蘭木倫自西北來

會其水源田巴顏哈拉得哩奔山東南流入金沙江江水又東南折而西南分爲七派二十餘里而復合有濟渡番名多倫鄂羅木伊多渾伊多渾者華言濟渡處也江水又東流有庫庫烏蘇東北來會其水源田巴顏喀拉西倫衣山西南流入金沙江江水又東有濟渡番名巴木布勒伊多渾江水折西南流有小水自西來會又南分爲二派三十餘里而復合又南逕股得勒圖西勒圖山及特門烏珠山之西南麓又南有古爾板拖爾哈圖山水自東來會其水出山南麓曰圖哈爾圖哈拉烏蘇西南流折西北有克蘇乞老河東南自阿拉爾巴顏哈拉達巴罕之西北麓注之又西南有毛仲霍爾霍河自南來注之又西南有噶布拉河自東北來注之又西南入金沙江此水隔山之東乃黃河源江水又南流有伊克庫庫色必拉自西來會有濟渡曰伊克庫庫賽爾伊多渾舟楫渡也多倫鄂羅木巴木布勒伊多渾則皆馬渡也江水又南有一水自西南來會又東南折東有池水自東北來會池水廣二十餘里江水又東南有一水自西南來會其水曰巴罕庫庫賽必拉有濟渡冬春馬渡夏秋皮船渡也江水又東南有一水曰尼林哈拉烏蘇源出雜佛洛巴顏哈拉達巴罕此山西北卽拉木拖羅海山又西卽烏哈那哈達其東北卽哈拉機達拉克阿林其東南卽薩喀勒拉克山北隔星宿海者其水西南流入金沙江江水又東有齊齊爾哈納庫庫烏蘇自南來會其水源出蘇克布蘇克木山綿亘而東有七大山流出七大水又有威衣木查鄂模二池之水俱東北流合而爲一曰齊齊爾哈納庫庫烏蘇入金沙江江水又東有武默圖水自南來會其水源出打克木喀木雜曠山西北流入金沙江江水又東折東南有一水自北來會水出巴顏哈拉達巴罕之東南山江水又南有一水自南來會水出租關達租山東麓江水又東南有一水自北來會水出雜巴顏哈喇山之西南麓此水隔山東北卽雅龍江源也江水又南有角克池水自西北來會其池周六十里在蘇曠莽河屯之北東南入金沙江江水又東南入喀木境始名布倫楚必拉也有小水自西北來會江水又東南折西南又東南逕伸郭廟有一水自北來會其水源出朗朗普格山東南入金沙江江水又東折而南有濟渡曰單冲郭哩多渾江水又南有一水自東北來會水源出里遼達巴罕西南入金沙江江水折西南流至里木山西南拉都格巴東北有一水自東北來會江水又南流至達拉哈達東越里拉達巴罕西又折西南流至巴塘城西境有一水自東北來會源出越里拉達巴罕南麓西南流逕巴河屯南入金沙江江水至此亦有巴塘河之稱也江水又

南。逕巴塘他拉西。又折西南流。始名巴格必拉。有濟渡。曰巴格必拉多渾。江水曲曲流。又西南。有一水自西北來會。其水源出巴河屯西北重山中。東南流。合三小水入金沙江。江水又東南。有敦格。馬格。縮格。自東北合而來會。敦格河亦曰敦格必拉。源出岡里拉馬爾山。西南流。有札木哈達山水東北注之。即馬格河也。亦曰麻格必拉。敦格河又南。有噶木布乃哈達山水自東北來會。即縮格河也。亦曰縮格必拉。三河匯而入金沙江。江水又東南。有一水自東北來注之。水源出巴特瑪郭田山。西南流。逕東噶爾河屯南。傑達麻他拉北。又西南。匯而為池。又西南入金沙江。江水又東南。入雲南麗江府西北塔城關。曰金沙江。入金沙江之水。有無量河。上源曰多克田。河源出陽頂文廟西北之沙里。出諾爾池。東南流。折東北。有里田河東北來會。其水源出里木山東麓。東流。有沙魯齊山水自西南來會。又東。折南流。至裏塘東南。有二水北出。波羅多拉達巴罕。一東南流。一西南流。合而來會。又西南至迷黎拉岡地。入無量河。無量河又東南入雲南界。

裏塘。

達俄岡山。赤喇岡山。出喇山。蟒喇山。甲噶山。大松山。俱在裏塘東。勢頗平坦。不甚險峻。紫木喇山。在裏塘東。上下各十

五。漳喇山。在裏塘東南。其山甚險。上下約百餘里。山之左。係鄉城威蓋地。屬四川山之右。係麗江中甸屬雲南。阿拉柏桑山。在裏塘西南。平順可行。上下約三十里。至海子口界。拉枯山。與柏桑山相連。亦頗

平坦。約十餘里。色勒隆宗山。與拉枯山相連。勢亦平順。上下約十餘里。額東勒山。與隆宗山相連。上約十五里。平順易行。下約二十里。陡險盤曲。以上四山。計程九十里。途無住所。冬春多積雪。乃進藏要路。雲龍

拉山。頗平坦。上下約二十餘里。鎖龍山。火燒坡。均在裏塘。亂石窰。人頭灣。均在俄洛。俄洛山。在西俄洛。疊雜山。在疊雜地。喇布山。在甲宗地。

藏木山在藏木地 沙布山在沙魯布 革凹山在革凹奔松地 喇嘛山在喇爾地 二郎雪山在二那灣 三壩山在立登三壩地 打山在毛茂了 射鹿山

在立渠河頭地 毛丫山在曲登地 窮藏山占對交界

裏楮河在裏塘門首 河源出瓦述長垣蒙了沙向東南流至眉里喇卡哈雅入內地河口稍窄於裏塘上行十餘里有桑巴橋通巴塘大道下行六十餘里至江宗有橋亦名桑巴

色隆達河在裏塘西南 源出額東勒山流入雪山根合裏達楮河由喇嘛了至鄉城會金沙江均係木橋通巴塘大道

拉梯楮河源出立登三壩 經流二郎灣傳莫博松等處入金沙江

交界河在鄉城朗竹地

立渠河在裏塘射鹿山發源 經流與下渡河合

溫塘泉有三一在裏塘西十里一在裏塘南二十里一在喇嘛了熱水塘汛三泉之水四時常溫內有紅蟲長二三寸人有患瘡疾者浴之即愈彼地僧俗人等珍重之

雅龍江舊志載在裏塘東源出青海之釀磋地方流入霍爾咱地用牛皮船爲渡通林聽安撫司至甘孜用木船皮船爲渡通德爾格部落直達蔡木多至上海下渣壩亦用牛皮船爲渡通占對喇滾至上中二渡用木船皮船爲渡通裏塘至下渡亦

用牛皮船爲渡。通會鹽營之穆哩土司。及雲南中甸地方。由甯番三渡水。會金沙江。入馬湖。歷敘州府。歸川江大河。按金沙江。漢書地理志之繩水也。雅龍江。若水也。源出雜巴顏哈拉山。在裏塘城西北。其山在雜佛洛巴顏哈拉山之東南。有東西二源。東南泝番名曰雜椿必拉。又東南。有一水自東北來會。番名曰齊齊爾哈那必拉。又南流。有一水自北來會。曰瑪木齊奇拉哈那必拉。又東南。有朗朗普格山水。自西南來會。其山水東北出。匯爲拉木椿池。廣五十里。東北出。爲囊必池。廣六十里。西北出。爲噶拉木池。廣五十里。池旁皆山。其水入雅龍江。江水又東南。有小水自北來會。又東南。有小水自西南來會。又東南。有一水自西北來會。水源出巴顏圖呼木達巴罕之西山。又東南。有小水自南來會。又東南。有一水自西北來會。水源出巴顏圖呼木嶺之東山。又東南。至巴顏哈拉巴林之南。折南流。又東南。有二水自西南來會。又東流。番稱雜椿齊奇拉哈納必拉也。江水又東南。至瑪木巴顏哈拉山西南。有瑪木齊齊爾哈那必拉。自北來會。其水源出瑪木巴顏哈拉山之東南。南流。合東北之彌那克格必拉。又西南。入雅龍江。江水又南。有魯格必拉。自東北來會。其水源出年泥莽格山。南流。折西。入雅龍江。江水折西南流。有鄂尼楚爾古河。自西來會。亦曰敖楚爾必拉也。其水源出澤賽國嶺之北山。南流。有尼雅克楚必拉。西南流。注之。又東北。入雅龍江。江水折西。又東南流。有一水自東北來會。水源出噶又格拉嶺。西南流。入雅龍江。江水折西南流。有小水自西北來會。又南流。至瑪拉木岡嶺東北。又東南流。折西南。得濟渡處。番曰巴拉馬珠蘇多昏。亦曰必爾麻珠蘇木渡。此喀木番部東往打箭鑪販茶路也。渡在打箭鑪西。徼外二百餘里。江水又西南。曰雅龍江。南入四川界。爲占對地方。自此而南。其東爲四川地。其西爲番地。入雅龍江之水。有霸拉河。源出打箭鑪西南大山。西南流。逕占對東南。入雅龍江。有打沖河。即古瀘水也。東南流。入雅龍江。打沖河之北。爲番界。番人稱爲黑惠江。亦曰納夷江。古合瀘若水入繩也。

打箭鑪。

南無脊山。在鎗東一百里。高五百餘丈。

金釵壩。在鎗東七里。險窄峻巖。

大岡山。在鎗東八十里。高陡盤折。

郭達山。在鎗東北一里。高七百餘丈。時有青羊繞山而行。相傳漢諸葛武侯七擒孟獲時。命郭達至鎗於沙哇納安鎗造箭。故名。其廟見寺廟門。

溫泉。在鎗東南五十里。榆林功。水性溫暖。四時不竭。浴之能除積疾。

阿拉木公山。在鎗西。高八百餘丈。

折多山。在鎗南。道藏要道。

大蓋雪山。在鎗北。八十里。

雅納溝河。源出大蓋雪山西北。南流八十里。至鎗與瀘河會。又七十里。入魚通河。

瀘河

源出折多山西南。東流七十里至鏞。

頭道水

打箭爐東六十里。高崖夾峙。一水中流。居民皆住山麓。巖後瀑布百丈。天矯噴礴。碎旬如雷。亦一大觀。過客皆題詠焉。

瀘定橋

打箭爐東一百三十里。即瀘水也。以鐵索橋為渡。今亦以木船渡。水漲則不可過。仍行橋上。橋長三十一丈一尺。寬九尺。施索九條。覆板於其上。水頗險惡。大風亦不可履。為通爐要隘。

聖祖仁皇帝御製瀘定橋碑記

康熙四十年建。敬編卷首。

謹案西番水道。如黃河、青海、黑水、岷江諸水原委。雖去衛藏甚遠。不宜攔入。然北路通西甯、黃河、青海在所必經。東路通四川、黑水、岷江在所必越。謹附載以備參考。

黃河

源出星宿海。西巴顏哈拉山東麓。山石色黑。蒙古謂富為巴顏。黑為哈拉。二泉濬發。東南流數里而匯。曰阿爾坦河。其水色黃。蒙古謂金曰阿爾坦。折東又北。有小水自南來會。又東南有烏哈梁水。自西南來會。又東有拉母拖羅山水。自南來會。又

東有西拉蓋山水。自北來會。又東有七眼池水。自北來會。始得鄂敦他拉。蒙古以星為鄂敦。以水灘為他拉。元史曰火敦腦兒。譯言星宿海者是也。阿爾坦河既會於鄂敦他拉。又有巴爾哈布山水。自北來會。哈拉答爾罕山水。自南來會。番名古爾板。索爾馬。蒙古謂三為古爾板。以阿爾坦河合二水為三也。東南流。注於嵯靈海。西北得水為海。海大澤也。其澤周三百里。東西長。南北狹。河亘其中。番人呼白為查。長為靈。爾雅云。河出崑崙虛。色白者也。自海東南流。有查克拉峨山水。自南來會。其水一曰色納格河。一曰多河。俱出山東北流。合而為一。又合庫克查池水。入於河。河水又東南折而東北。有哈拉河。自東南來會。而注於鄂靈海。元史所謂阿刺腦兒是也。蒙古以青為鄂。言其水色青。由海折東北流。折東南。有敖博圖噶順水。多木達噶順水。查哈噶順水。自南來會。又有敖羅

海池水自東南來會而抵巴顏圖渾嶺有呼蘭河自西來會其水源出盛吞池東北流得庫得勒古河折東南入於河河水又東南有博勒圖河自東北來會其水出阿拉克薩拉山西南流入於河河水又東南有哈麻古爾台河自東北來會又有泉水小大五十餘曰厄得靈忒得靈鄂模匯成白圖河東流入河又有厄魯克河東南流入河哈爾吉河西南流入河薩克河東南流入河河水又東南水色漸黃屈曲五百餘里環阿木尼麻禪母孫山之南即大雪山也有多爾吞河自北來會呼呼烏蘇河自西南來會登河自北來會巴爾鄂河西南來會巴罕薩拉河自北來會哈拉河拜多河巴里馬河皆自南來會又有伊克薩勒河自西北來會他哈拉馬克河烏担河布喀河皆自西南來會又有小水二自西北來會西拉河伊克巴爾和河巴罕巴爾和河自西南來會河水至此折東北流繞大雪山之支阜曰噶海山又噶拉濟山之麓大雪山者元史所謂亦耳麻莫布拉譯言騰格裡塔是也華言昆崙山其山綿亘三百餘里上有九峯中峯獨高冬夏積雪不消番人以祖爲阿木尼險峻爲麻禪冰爲母孫稱冰山與稱大雪山同耳河水東北流有三昆都命河自東南來會三昆都命者即土人謂古爾板昆都命河元史所謂納鄰哈拉河乞哩馬出河鵬楞河也納鄰哈拉河今日德忒昆都命源出賴杵山東北流入於河乞哩麻出河今日多木達圖昆都命源出納克多木精山西北流入於河其納克多木精山岡出山之東南即四川松潘同知界也河水至此而始大又西流繞烏蘭莽乃山之北逕納林通布珠山折西北流繞大雪山東北有巴罕哈留圖河東北來會又有伊克哈留圖河東北來會其水源出巴罕土魯跟山西南流入於河河水又西北有齊普河自西南來會其水源出滂馬山曰圖聲圖河東北流與得爾多河合其水出哈爾濟嶺東流入圖聲圖河又北曰齊普河入於河河水又北有察普楚河自西南來會其水源出索諾木達西嶺北流繞大雪山西折東北有密喇河西南來合之繞大雪山北有西拉哈卜齊海河西北來合之又得阿爾昂河而入於河河水又折而東北流有哈克圖河自東南來會其水源出伊克圖爾跟山東北流折而北合巴罕圖爾跟山水又西北合伊西克山水入於河河水又北有滾俄羅吉河自西北來會其水源出青海西南濟哩山東南流合盛吞西哩克地諸泉水入於河河水又東北有蘇勒吉爾河自東南來會其水源出古爾板圖爾哈山西北流入於河河水又東北有小澗水自南來會又東有烏蘭河自東南來會其水源出他蘇拉海山西流合大成嶺水又西北逕放隆臥拖

羅海山北入於河。河水又東北逕古城址北。甘肅河州之西界也。有庫庫賽河自南來會。又東有鄂涿蘭河自南來會。又東北有烏蘭布拉克河自西北來會。其水源出青海東南衆泉匯發。東南流入於河。河水又東北有也巧雀匯河自南來會。其水出保安堡東南西北流。入於河。河水又東北逕蘇魯古山南折而東南流。有姑楚河自南來會。其水原出古爾板拖羅海山。東北流入於河。河水又東南折而東北逕積石山南。阿木尼達拉嘉山北。北界西甯府徵外南入河州內地。此禹貢導河之積石也。水經注曰。唐述山自鄂靈海至此。蒙古統謂之喀屯河。入河之水有離水。源出西南徵外。打城達巴罕山之東南。東流受小水二。又北流有五普威河。自東南來會。折西北流受小水二。入大夏堡北曰大夏河。有洸水。源出洮州衛西南徵外。西傾山東麓。番名羅插普拉山。衆泉匯出。曰巴拉巴河。東南流折而東。受小水十餘。入衛境。有湟水。番名波洛克克河。源出西甯府徵外。當青海之東。曰噶爾藏嶺。元人名之曰那連山。明史所謂熱水山也。三泉迸發。一曰伊克烏拉古爾台。匯而南流。其東有布虎圖嶺。水曰昆都命。南流受毛哈圖河來會。又東南有洞郭爾廟南。有土爾跟察漢河。自西南來會。水勢始盛。折東流。至鎮海營。曰西甯河。入湟之水。曰浩鹽河。番名烏爾木倫河。源出青海西北阿木尼厄庫山。東南流。有哈爾昏河自北來會。折東北曲流。有滿楚克河自西北來會。東逕甘州府南徵外番大山。東南流。南北受小水十餘。至大通堡。曰大通河。

青海。在西甯府徵外。漢書地理志曰。僊海。水經注曰。卑禾羌海。即鮮水也。今爲厄魯特等二十三旗地。番名呼爾臍兒。周七百餘里。中有二山。一曰魁孫拖羅海。一曰察漢峯。東西對出。水色青碧。冬夏不枯不溢。其東北有巴顏池。周四十餘里。南有功額池。周五十餘里。細納池。周四十餘里。其最大者。西南有拖孫池。周一百里。阿勒克池。周百六十里。東北有巴哈池。周百餘里。東北近洮州衛有湫池。周百餘里。即古天池大澤。又西北有股格池。周二百餘里。

岷江。大江亦曰岷江。源出松潘同知城西徵北外岷山羊膊嶺。有二源。北曰岡田阿林。從嶺東麓東南流。其西北麓。即多拉昆都俞河也。南曰那格多木精阿林。從嶺南麓南流。此爲岷江正源。屈曲東流。與北源會。又東流。東南至黃勝關。入四川界。入

江之水有黑水河。即鐵豹嶺水也。有二源。北源出九里古拉達巴罕嶺。在岷江南源之西南。東北流。折而東南。入四川界。

衛藏通志卷四

程站

成都至打箭鑪計程九百二十里。

謹案四川成都禹貢梁州之域。天文井鬼分野。其控制西南各部落。若高屋之上。建瓴水焉。而打箭鑪乃中外扼塞。極西南則爲衛藏。打箭鑪以東。雖險阻百折。顧地猶中土。人物風俗。習見周知。無煩博引。僅識其道里所經而已。

成都縣至雙流縣尖。新津縣宿。計程九十里。

成都北走秦鳳。東下荆襄。南通六詔。西距吐番。由錦城南門五里過萬里橋。卽武侯送敬侯使吳處。十五里過簇橋。卽今之驛市。入雙流縣。十里過金花橋。十里至雙流縣。出南門。五里過南林鋪。十里過黃水河。河自溫江縣南流。四十里過縣東。至彭山縣。合岷江。十里過申頭鋪。入新津縣。十五里過花橋子。十里至新津縣。驛程平坦。沃野袤延。萬里之行。發軔於此。

新津至斜江河尖。邛州宿。計程九十里。

新津出南門五里過太平場五里過鐵溪橋下有鐵溪河昔武侯煉鐵於此二十里至斜江河源出大邑縣鶴鳴山東委曲斜流因名入邛州境十五里過高橋鋪二十里過聖花堡十五里過天官橋十里至邛州漢臨邛地卽司馬相如遇卓文君處路亦平坦過此則漸歷崎

嶇矣

邛州至大塘鋪尖白站宿計程九十里

邛州出南門過南河大渡卽邛水由大通街上坡十里過十里橋過十里臥龍場十里過乾溪鋪蒲江境十里至大塘鋪十里過萬工坡明洪武閒蓋玉收雲南鑿石開道費工萬餘故名二十里過弔枋鋪五里過墨竹關八里過河家坪名山縣境七里至白站卽百丈驛訛名白站有唐白丈縣故址

白站至名山尖雅安縣宿計程九十里

白站十五里過洗馬池十里過白土坎石頭漫坡路十五里過和尙腦十里至名山縣十五里過金雞關小崗上建關帝廟十五里過桐子林由桐子林渡平羌江以武侯平羌於此故名十里至雅安縣漢嚴道縣地

雅安縣至觀音鋪尖榮經縣宿計程九十里

雅安縣出南門五里上嚴道山原名鹿角山唐元宗改今名五里過對崖十里過風木埡十里過八步石十五里至觀音鋪在山溪之閒十里過飛龍關頂上有古刹名龍興寺下山十里過麻柳灣榮經縣境十里由廟上過七縱河源發瓦屋山武侯初擒孟獲處十里

至榮經縣亦

漢嚴道縣地

榮經縣至小關山尖。清溪縣宿。計程一百十里。

榮經縣出南門。十里過磨刀溪。十里由箐口站順溝而進。過大通橋。十里過安樂壩。清溪縣境。十里過黃泥鋪。上山。十里至小關山。由溪內行。林木障翳。山谷陰森。晴少雨多。雲霧常作。兜羅綿現。沿溝直上。偃仄難行。十五里過大關山下。岡過板房。復沿溝而上。十五里過長老坪。即相嶺。武侯曾屯兵於此。故名。冬春雪盛。險滑。行旅戒焉。十五里下山。過二十四盤。即邛笮山。路甚險峻。五里過羊圈門。五里至清溪縣。昔爲沈黎郡。其地風大。每日夕時。狂飈輒作。室皆動搖。寒窸有聲。若傾圮狀。居人習之。勿異也。此地分路。出南門。即建昌地。

清溪縣至富莊尖。泥頭宿。計程八十里。

清溪縣出西門。下坡過溝。復折上山。十里過冷飯溝。十五里過四壩口。五里至富莊。俗名蠻莊。三十里過陡溜子。二十里至泥頭驛。自過清溪後。鳥道羊腸。日益加險。而蠻烟瘴雨。亦漸繪邊徼之景矣。

泥頭驛至林口尖。化林坪宿。計程七十五里。

泥頭走山溝中。由老君劍。水急如劍。故名。其地有裸獺。乃昔羌人也。十五里過高橋。上三角坪。二十里至林口。復下溝。紆折登坡。十五里經伏龍寺。十里上飛越嶺。唐置飛越縣於山麓。旋廢。山勢陡峻。怪石巉巖。逼人而起。終年積霜雪。懶雲下垂。山足行旅如在層霄。此內地第一險阻也。山頂有隘。過隘即下山。十五里陡坡。無駐足處。至化林坪。沈邊土司屬。山頂有一海。廣不過三里。居民皆飲之。

化林坪至冷磧尖。鑪定橋宿。計程七十五里。

化林坪峻嶺臨江斜盤鳥道下山二十里至龍壩鋪有伊公溝水繞此入瀘河右走沈村沈邊土官住牧處二十里過瓦角十里過安樂村十五里至瀘定橋地稍溫暖河即瀘水有鐵鎖橋康熙四十年建東西長三十一丈寬九尺施索九條覆木板於上水頗險惡賴此橋爲利濟焉今亦有木船無風水小亦可渡

瀘定橋至大烹壩尖頭道水宿計程七十里

瀘定橋十五里過大崗塘五里過咱哩土官住牧處五里由黃草坪過小烹壩十里至大烹壩復上小坡十里過冷竹關下溝曲折十五里過瓦斯溝十里至頭道水高岸夾峙一水中流居民皆住山麓水聲碎旬如雷巖山有瀑布天矯噴薄高數十丈下垂若練帛真一大觀一奇境也

頭道水至柳楊尖打箭鎰宿計程六十里

頭道水至日地塘五里又二十五里至柳楊一路柳陰密菁沿溝十五里過沈坑十五里抵打箭鎰

打箭鎰至裏塘計程六百八十里

謹案打箭鎰相傳漢諸葛武侯南征遣將郭達安鎰打箭之地距成都千里天文亦井鬼分野爲中華之極西西域之極東天時多寒少暑層巒峻嶺峭壁懸崖中隔瀘河勢最險要昔爲南詔地今隸明正宣慰使司詳部落門

打箭鑪至折多宿計程五十里。

打箭鑪出南門十里過工竹卡。凡差使至此始照口外例支應。平坡透迤四十里至折多山麓。有塘鋪。有旅舍。崇岡在望。峽嶽逼人。藥瘴氣候異常。令人氣喘。自此一攬山川之勝。蠻荒冰雪中使人心懽。

折多至提茹尖阿娘壩宿計程八十五里。

折多過山。山雖長不甚峻。產大黃。藥氣薰蒸。過者多喘。秋冬積雪瀰漫。三十里過破礪。行漫坡。亂石中二十里過納瓦路不甚阻。下山南行十五里至阿娘壩。土產饒多。地方儼有富庶之象。

阿娘壩至瓦切尖東俄洛宿計程五十五里。

阿娘壩行三十里。道路平坦。至瓦切。過俄松多橋。經小營宮寨子。復歸大路。行十五里。過打納石。有土人數十家。有柴草。十里至東俄洛。有塘鋪。

東俄洛至高日寺尖臥龍石宿計程七十五里。

東俄洛南行。過大雪山二座。深林密箐。蟲如玉立。人跡罕逢。三十里至高日寺。循海子而南。三十里穿大松林。下山十五里至臥龍石。有旅店。有塘鋪。

臥龍石至八角樓尖中渡宿計程一百二十里。

臥龍石西行一路平衍。荒涼特甚。六十里至八角樓。有塘鋪。閒有旅店。然廢置無常。再行六十里。至中渡。即河口。過河爲裏塘界。所謂雅龍江也。設外委一員。專司渡船。夏秋以舟渡。冬春則列船爲浮橋。濟行旅。蠻人以牛皮船渡。逐浪上下。望之如水中鼉。凡官差過此。在河東宿者。明正土司供役。過河西宿者。裏塘土官供役。

中渡至剪子灣尖西俄洛宿計程一百三十五里。

中渡過河上山行三十五里過麻蓋中有禰房有柴草此站路甚險遠難行且多夾壩行者或宿麻蓋中以均途程且戒備焉四十里上大雪山至剪子灣有塘鋪山頗陡險亦有瘴氣下山復盤折登山四十里過波浪工塘汛有駐防兵以防夾壩十里下山又十里至西俄洛有塘鋪土百戶供役給柴草換烏拉有漢人客舍。

西俄洛至咱馬拉洞尖火竹卡宿計程一百十里。

西俄洛路經小山進溝過大雪山下坡共行四十里至咱馬拉洞林深谷邃夾壩甚夥有塘鋪二十里至蠻卡復越小灣下山名亂石窰再折而上小岡順山溝而下行三十里復過大山二十里至火竹卡有人戶有柴草。

火竹卡至火燒坡尖裏塘宿計程五十里。

火竹卡至小橋沿河紆折登小山二十五里至火燒坡下坡即平原二十五里抵裏塘有駐防塘鋪換烏拉。

裏塘至巴塘計程五百四十五里。

謹案裏塘在打箭鑪之西六百餘里天寒多雨雪昔隸青海部落層巒疊障道路紆迴爲西藏要地有正副土司二員詳部落門。

裏塘至頭塘宿計程五十里。

裏塘西南行三十里過大木橋上阿喇拍桑山峻嶺層巒日色與雪光交燦二十里至頭塘即貢撒塘番名額回奔松柴草人戶俱無僅有塘鋪官差則裏塘烏拉馱載以給旅客則自攜帳房裹糧從事焉。

頭塘至乾海子尖喇嘛丫宿計程一百五里。

頭塘寒風凜冽凍綻肌膚從此愈行愈冷上山過黃土岡行四十里至乾海子又經蓋壩及虎皮溝上山下嶺盤旋五次大石森立橫植道塗樹木交蔭流泉交匯均係夾壩出沒之所行四十里過拉爾塘有塘鋪上喇嘛山二十五里至喇嘛丫有柴草人戶焉。

喇嘛丫至二郎灣尖三壩塘宿計程一百十里。

喇嘛丫由溝上山越雪嶺四層石山礪礪不生樹木過嶺則深林密箐水草徧地共行五十五里至二郎灣有塘鋪無人戶由山足進溝順溝而下路稍平過著東塔五十五里至立登三壩有塘鋪柴草巴裏二塘交界也。

三壩至松林口尖大朔塘宿計程一百里。

由三壩行亂石縱橫青松蔽日過巴山有海子下山枯樹參橫絕不聞鳥雀聲五十里至松林口下溝路平五十里過巴隆達河至大朔塘地居溝口有塘鋪礪房柴草。

大朔至彭擦木尖小巴沖宿計程一百三十里。

大朔進溝上大雪山三十里至巔高險非常雪凌瀾漫越山而下至崩擦木六十里。有塘鋪無人戶道路險阻下山行四十里至小巴沖有礪房柴草頭人給役焉。

小巴沖至巴塘宿計程五十里。

小巴沖順溝而進上小坡雜木叢生陟降五十里出溝口抵巴塘其地沃野千里水泉環繞日麗風和佳境也。

巴塘至察木多計程一千四百五里。

謹案巴塘在裏塘之南五百餘里。土地饒美。天氣暄妍。儼然內地也。無城郭。山則峻標甲嶺。水則流合金沙。昔爲拉藏罕所屬。今設正副宣撫司。去巴塘九百餘里。地名乍丫。俱詳部落門。

巴塘至牛古尖。竹巴籠宿。計程五十里。

巴塘西南行過小山一。自巴塘途次。以至西藏。有醉馬草。馬食如醉。疲乏不能行。經茶樹頂。復上大山。鳥道臨江。勢最險要。四十里至牛古。有河通舟楫。復沿山行。逶迤五十里。渡金沙江。至竹巴籠。有礪房。柴草。塘鋪。

竹巴籠至公拉尖。莽里宿。計程一百三十里。

竹巴籠渡江。即金沙江通蜀之馬湖江也。四十里至公拉。有柴草。頭人給役。由山凹中行五十里。過空子頂。有塘鋪。亦夾壩田沒之所。上下四十里。至莽里。有人戶。柴草。有熱傲。供給差役。換烏拉。

莽里至南墩尖。古樹宿。計程一百二十里。

莽里過龍新山。春冬多積雪。三十里過邦木。有礪房。柴草。有塘鋪。中有甯靜山。勒有與西藏分界。礪石。南行經大山。五十里至南墩。有漢人寺。每年七月。巴察兩地客民。皆雲集貿易。如內地廟會。過山四十里至古樹。有人戶。柴草。有塘鋪。

古樹至普拉尖。江卡宿。計程一百里。

古樹過漫山。山路雲霧四垂。閒有瘴癘。道路亦復崎嶇。四十里至普拉。有人戶。平房。柴草。有喇嘛供役。多黑帳房。番民行漫坡路。六十里至江卡。有礪房。柴草。駐防塘鋪。

江卡至山根尖。黎樹宿。計程一百十里。

江卡行四十里至淥河。十里至山根。上大雪山。終年積雪。盛夏亦涼。刺骨。復越小山。上下七十里。自黎樹至王卡。稱爲惡八站。有人戶。柴草。駐防。塘鋪。換烏拉。

黎樹至阿拉塘尖。石板溝宿。計程一百十里。

黎樹過漫坡。樹木環映。五十里至阿拉塘。有人戶。柴草。換烏拉。番人多刁惡不馴。又過小雪山。二座。高下迂折六十里。至石板溝。有人戶。柴草。駐防。塘鋪。有頭人供給差役。

石板溝至阿足塘宿。計程八十里。

石板溝西南行。過大雪山。二座。寒輝騰耀。射目迷離。上下無可駐足。行人裹糞而至。阿足塘。乍丫。屬蠻性狡猾。有駐防。塘鋪。有頭人給役。

阿足至歌二塘尖。洛加宗宿。計程一百里。

阿足過漫山。二座。阿足河一道。水勢洶湧。五十里至歌二塘。經平川。二十里上山。三十里路最險要。至洛加宗。有塘鋪。頭人給役。換烏拉。

洛加宗至俄倫多尖。乍丫宿。計程八十里。

洛加宗沿溝而上。傍山行。路紆曲。稍平。第偏仄多。偏橋。四十里過木橋。至俄倫多。有柴草。人戶。復西南行四十里。至乍丫。有寺院。即會典圖注之札雅廟也。有碣房。柴草。駐防。塘鋪。換烏拉。此地番性桀驁。駕馭亦復不易。

乍丫至雨撒尖。昂地宿。計程九十五里。

乍丫順溝行。石徑蠶叢。多梗塞。三十五里至雨撒。有人戶。柴草。復西行。過大雪山。路甚陡險。積雪如銀。烟嵐之氣。中人作病。上下六十里。至昂地。有駐防。塘鋪。有喇嘛供給烏拉。

昂地至噶喀尖。王卡宿。計程九十里。

昂地順溝行三十里。至噶喀。上大雪山。亂石崎嶇。積雪層疊。秋濤怒湧。路復曲折。上下行人飢寒起粟。手指凍裂。六十里至王卡。有人戶。柴草。塘鋪。頭人換給烏拉。

王卡至三道礮尖。巴貢宿。計程五十里。

王卡經熱水塘。二十里至三道礮。路平。又二十五里。紆折上山。路轉峯迴。五里至巴貢塘。有塘鋪。柴草。有頭人供給使役。

巴貢至窟籠山尖。包墩宿。計程一百里。

巴貢上大山。或降或陟。終日蹀躞荒山中。六十里至窟籠山根。以山多石穴。大者如堂如皇。小者如鐘如盃。如鉢如鈴。掩映迴環。上山行拗折而下。四十里至包墩。有頭人供給烏拉。

包墩至猛布尖。察木多宿。計程一百五十里。

包墩沿河行十里。過大山一座。小山二座。俱備橋列如雲棧。崎嶇難行。上下六十里。至猛布。有碉房。柴草。在山凹之中。沿山臨河。復沿河登山。行二十里。過大山。有地名小恩達。皆木石搭橋。橋路甚險窄。不可騎行。六十里過四川橋。抵察木多。有土城。居民二百餘戶。換烏拉。

察木多至拉哩。計程一千五百里。

謹案。察木多。古名康。又名喀木。距巴塘千餘里。中隔乍丫。路出西北。天時無異裏塘。三山環偪。二

水合流爲西藏門戶。界通川滇。北河有四川橋。南河有雲南橋。滇省舊曾設鎮於此。今歸併川省。設臺站。有正副呼圖克圖三人。其他方人民。詳部落喇嘛各門。

察木多至俄羅橋尖。浪蕩溝宿。計程七十五里。

察木多南河而進。偏仄多偏橋。行者戒焉。水復山重。路通各部番境。四十里至俄洛橋。有人戶。路稍平。三十五里至浪蕩溝。有碛房。柴草。

浪蕩溝至拉貢尖。恩達宿。計程一百六十里。

浪蕩溝二十里過裏角塘。進溝上山。由偏橋行。險異常。雪凌滑甚。且有瘴氣。八十里至拉貢。有塘鋪。碛房。柴草。有頭人給役。二十里過松羅橋。察木多屬。上山。四十里恩達寨。其重役夫馬。則類伍齊商卓特巴供給焉。

恩達寨至牛糞溝尖。瓦合寨宿。計程一百五十里。

恩達寨二十里過達塘。有塘鋪。二十里過喇貢山。二十里至牛糞溝。二十里過瓦合山。高峻且百折。山上有海子。烟霧迷離。設望竿堆。三百六十。合周天數。如大雪封山時。藉以爲嚮導。過此。戒勿田聲。違則冰雹驟至。山之中鳥獸不棲。四時俱冷。逾百里無炊烟。二十里過乾膊嶺。下山。三十里過瓦合塘。有塘鋪。又二十里至瓦合寨。隸類伍齊。有頭人供役焉。

瓦合寨至麻利尖。嘉裕橋宿。計程八十里。

瓦合寨西南行四十里。至麻利。有碛房。柴草。十里過山。山勢高聳。下山。繞河西行。偏橋疊見。三十里至嘉裕橋。番名三壩橋。有碛房。柴草。兩山環抱。一水中流。天氣喧和。地土饒美。有塘鋪。

嘉裕橋至鼻奔山根尖。洛隆宗宿。計程八十里。

嘉裕橋西南行。上得貢拉山。山勢陡峻。上下二十五里。詰屈如蛇形。有松林。路悉險窄。多溜沙地。五里過橋至鼻奔山根。五十里至洛隆宗。有棚房。柴草。有塘鋪。換烏拉。

洛隆宗至曲齒尖。碩般多宿。計程一百六十里。

洛隆宗西南行。經漫坡。上坡。山路陡險。九十里過鐵凹塘。大山壁立。有塘鋪。順溝而行。路稍平坦。二十里至曲齒。又名紫駝。有大喇嘛寺。可尖可宿。近新開一路。由東南行。爲春夏水繞道也。五十里至碩般多。居人稠密。物產亦饒。有棚房。柴草。有駐防。塘鋪。換烏拉。

碩般多至中義溝尖。巴里郎宿。計程一百里。

碩般多沿溝而上。路平。五十里過巴喇山。勢不甚峻。至中義溝。山程平坦。五十里至巴里郎。有棚房。柴草。有塘鋪。頭人供給烏拉。但居人落落。旅況增岑。寂耳。

巴里郎至索馬郎尖。拉子宿。計程一百里。

巴里郎進溝三十里。上賽瓦合山。通志作朔馬拉山。邊風獵獵。亂山皆童。二十五里至索馬郎。又四十五里至拉子。沿山繞河而行。地多溜沙。足卻不前。其地有塘鋪。頭人給役。柴草價昂。蓋山兀地荒。致此不易耳。

拉子至邊壩尖。丹達宿。計程一百十里。

拉子西南沿山而上。過畢達拉山。山路平坦。上下十里。下山路偏仄。河流縱橫。水清淺。可褰裳而涉。四十里至邊壩。即達隆宗。有塘鋪。二山橫跨。四水環襟。爲西藏遼闊之區。六十里至丹達。有塘鋪。營官第巴供役。換烏拉。

丹達至察羅松多尖。郎吉宗宿。計程一百里。

丹達之麓有廟相傳雲南某參軍解餉過此。歿於王事。屢著靈異。土人祀焉。過山者必禱之。十五里上沙貢拉山。峭壁摩空。蜿蜒而上。過閻王廟。夏則泥滑難行。冬春冰雪成城。一槽偏仄。行人拄杖魚貫而進。此赴藏第一險阻也。丹達神見寺廟門。三十里下山。五里至察羅松多。五十里至郎吉宗。有爾房。柴草塘鋪。第巴供給差役。

郎吉宗至大窩尖。阿蘭多宿。計程九十五里。

郎吉宗一名浪金溝。曠野平坦。換烏拉。順壩而下。有兩路。一由山徑。路窄險。一由溝。路稍平。惟夏日水漲多阻。四十里至大窩塘。有第巴供給差役。路雖平。而側進若谷。順河而下。五十五里阿蘭多。有塘鋪。爾房。柴草。

阿蘭多至破寨子尖。甲貢宿。計程七十里。

阿蘭多西南行。側身循溝而上。南北俱有偏橋。上山路險窄。行人凜然如壁。三十里至破寨子。一名阿蘭卡。有橫石森如人立。俗名鸚鵡嘴。鑿以爲道。四十里至甲貢。拉哩屬。有柴無草。有塘鋪。第巴供給差役。

甲貢至大板橋尖。多洞宿。計程八十里。

甲貢路崎嶇。傍山而上下。過小坡。漫衍荒涼。四十里至大板橋。四十里至多洞。人烟寥落。無傳舍。有塘鋪。凡往來者。即其汛以爲棲息地。無柴草。

多洞至擦竹卡尖。拉哩宿。計程一百四十里。

多洞塘附近水邊。率水滸而上。二十里上大山。山峯峭立。雪凌險滑。視丹達無異。即魯工拉山也。六十里至擦竹卡。有熱水塘。過山凹。中有一湖。約寬七八里。長十餘里。冬春凍如平地。行人履之無怖。六十里抵拉哩。天冷。水草惡劣。有駐防。塘鋪。堪布供給差役。而烏拉則三十九族三十六村協濟也。

拉哩至前藏計程一千十里。

謹案拉哩在達隆宗西北。距察木多千餘里。時氣嚴寒。山勢陡險。原隸西藏。無城郭。所屬寺院。委堪布喇嘛主掌。兼第巴事。又有工布。江達。在拉哩西南。工布僻處一隅。而江達則西藏孔道。天時和暖。產稻米。有水田。絕域中之沃壤也。詳部落門。

拉哩至阿咱尖山灣宿計程一百六十里。

拉哩由溝復上大山。危峯聳峙。冰雪四時不消。巖巖海岸。風起雪擁。險滑難行。五十里至阿咱。有塘鋪。第巴供役。再行三十里。有海子。長四十餘里。俗傳有獨角獸。頗爲怪。八十里至山灣。有塘鋪。少柴草。

山灣至常多尖。甯多宿計程一百二十里。

山灣塘由山灣上草拉山。險峻難行。約四十餘里。多冰雪。積石嶙峋。共六十里。至常多。天時常如冬。山皆不毛。有塘鋪。居人以樹皮爲屋。僅數間。炊烟冷落。屬江達。有第巴供給烏拉。六十里。路稍平坦。至甯多有塘鋪。

甯多至過拉松多尖。江達宿計程八十里。

甯多路平。順溝而下。四十里。過拉松多。即王巴疏。過橋。水潺湲。激石有聲。橋以東屬江達。四十里。至江達。地不甚寒。有駐防塘鋪。有柴草。

江達至順達尖。鹿馬嶺宿計程一百六十里。

江達在拉哩之西南。懸山依谷。形勢險要。有工布第巴供給差役。沿河而下。六十里。至江達。有塘鋪。沿溝而進。河道分流。林木陰翳。一百里。至鹿馬嶺。有塘鋪。山高無險阻。約四十里。視前歷之冰雪峻嶒者。居然平易。天

鹿馬嶺至堆達尖。烏蘇江宿。計程一百八十里。

鹿馬嶺進溝而上下約四十里。山路坦夷。微有瘴癘。番稱葛倉。寒風凜冽。無盛暑。八十里至堆達。一名普魯倉。有塘鋪。烟火寥寧。柴草亦稀。順河繞溝而下。過竹貢六十里。至烏蘇江。路俱平坦。有塘鋪。小第巴支應柴草牛羊。去衛藏較近。別開一奇境矣。

烏蘇江至仁進里尖。墨竹工卡宿。計程一百三十里。

烏蘇江水勢平緩。順河西行。雖僻處一隅。而程途夷坦。迥異前險。六十里至仁進里喇嘛寺尖。有塘鋪。行者如僕馬告瘁。至此可憩息焉。由東北而上。七十里至墨竹工卡。有塘鋪。第巴給役。

墨竹工卡至拉木尖。德慶宿。計程一百二十里。

墨竹工卡正北接察木多草地之路。其水向西流至藏。即藏河也。水驛有皮船。四十里至拉木。一名納摩。有房舍。柴草稀少。寺院幽敞。人稠地廣。繞河南而下。五十里過占達塘。復西行三十里至德慶。

德慶至蔡里尖。前藏宿。計程六十里。

德慶其地多候館。往來者恒棲止之。路傍有塘鋪。繞道而下。四十里至蔡里。一作采里。俗傳即西游真詮所記之高老莊。有第巴供給柴草。與西藏隔一水。二十里抵西藏。其地四山環峙。儼若城垣。水秀山奇。宛然福地也。

前藏至後藏。計程九百里。

謹案前藏在拉哩之西千餘里。達賴喇嘛坐牀之所曰布達拉。寺廟曰大詔。小詔。唐古忒所居之地。曰拉撒。寺僧辦事之所曰商上。噶布倫辦事之所曰噶廈。第巴辦事之所曰碩裏。喇嘛居住之所曰札倉。餘詳喇嘛寺廟山川部落各門。

前藏至登龍岡尖業黨宿計程八十里。

前藏路平坦四十里過大橋至登龍門有房舍順河而行途亦平易又四十里至業黨有塘鋪房舍第巴供給

業黨至僵里尖曲水宿計程九十里。

業黨亦順河而行經崖編三亦不甚險阻四十里至僵里又五十里從阡陌行河流委折至曲水橋傳有蝸子洞犯死罪者活縛至洞令食之沃野平原綿亘百里有房舍柴草塘鋪有第巴給役焉。

曲水至岡巴則尖白地宿計程一百四十里。

曲水十五里至鐵索橋江勢浩濶最險渡以木船過河三十五里至岡巴則有房舍柴草又過巴則嶺危峯嶽業即甘孛山下山沿洋卓雅錯海北岸紆折而行柴草稀少沙路平坦五十里至白地。

白地至亞喜尖或撻魯尖浪噶子宿計程一百五里。

白地三十五里至亞喜十五里至撻魯俱有房舍柴草有歧路一由江孜一由然巴然巴爲春夏商販所必經冬則雪凌多阻滯且翁古一帶村落廣糧食戊申西征之役改由浪噶子今因之五十五里至浪噶子。

浪噶子至宜椒尖春堆宿計程一百二十里。

浪噶子五十五里平坦至宜椒過噶如山六十五里至春堆有第巴人戶路亦平坦左手分路通布魯克巴。

春堆至谷洗尖江孜宿計程一百四十里。

春堆至谷洗七十里。過日節洞卡。七十里至江孜。二處均有第巴人戶。柴草所出。則江孜較多。路俱平坦。

江孜至甘壩尖。白浪宿。計程一百十五里。

江孜繞班古爾曲底寺前。五十五里至甘壩。六十里至白浪。有第巴人戶。柴草。

白浪至惹堆尖。札什倫布宿。計程一百十里。

白浪迤邐而進。過洋楮橋。即雅蛟藏布大河也。七十里至惹堆。又四十里至札什倫布。

後藏至拉子。協噶爾。定日。聶拉木。

謹案。後藏地曰札什倫布。建仍仲甯翁結巴寺。由前藏內行。轉西行八日。爲班禪額爾德尼坐牀之所。詳山川寺廟門。其至聶拉木。濟隴等處邊界地方。其道里。遠近。險易。宜悉載焉。

札什倫布至拉爾塘尖。剛堅喇嘛寺宿。

札什倫布南行。轉西。至拉爾塘。又轉北。至剛堅喇嘛寺。路俱平坦。

剛堅喇嘛寺至花寨子宿。

自剛堅喇嘛寺南行過三孀橋轉西北行至花寨子。

花寨子至札什剛尖彭錯嶺宿。

由花寨子過納雅山至札什剛又過大山至白達寨又過峻嶺臨大河而下復登彭錯嶺有營官寨。

彭錯嶺至札塘尖拉子宿。

彭錯嶺由山後下嶺至札塘經驛載至鐵索橋不過河越大山至拉子。

拉子至白佳紀崗尖札普宿。

拉子上山至佳紀崗一路山蹊登涉過甲錯大山下至札普。

札普至拉古喇古尖羅羅宿。

自札普進運崇山峻嶺下山至拉古喇古由拉古喇古羅羅大山下山經熱水塘又過小山至羅羅塘。

羅羅塘至協噶爾宿。

由羅羅塘越小山下過羅桑橋又過山梁過魯曲橋至協噶爾有喇嘛寺營官寨。

協噶爾至咱果爾尖眉木宿。

由協噶爾越紫日山。下山過蚌楚河。至咱果爾尖。又上山。至眉木宿。有禰房。人戶。

眉木至定日宿。

由眉木山後繞下。至定椿橋。上山。至定日。一名第哩浪古。

定日至朗古尖。巴都爾宿。

由定日渡普楚河。至朗古。越通拉大山。罡風凜冽。寒氣逼人。下山。又登山。至巴都爾。有喇嘛寺。有禰房。

巴都爾至達爾結嶺尖。聶拉木宿。

由巴都爾依山越嶺。至達爾結嶺。又速度山溪。上帕甲嶺。經噶宜卡。過木薩橋。登山。至聶拉木。

聶拉木由巴都爾分路。至宗喀。計行程四日。

巴都爾至俄拉喇嘛寺宿。

自巴都爾越連崗嶺。至俄拉喇嘛寺。

俄拉喇嘛寺至轄隴尖白孜宿。

自俄拉喇嘛越甲納大山。下至轄隴。無人戶。又過小山。至白孜黑帳房。無碛房。

白孜至達楮尖撒喜宿。

由白孜平川繞行至達楮。其北有納錯海。又平路逶迤。至撒喜黑帳房。

撒喜至宗喀宿。

由撒喜越貢倘拉大山。又繞

宗喀山後。至宗喀。有石堡。

宗喀至濟隴。計行程三日。

宗喀至滾達宿。

宗喀紆折漫山。渡鹿馬河。

又越山梁。至滾達。有碛房。

滾達至卓黨宿。

滾達越山嶺。有大所寺。過鹿馬橋。上擦木卡。極險峻。下山至卓黨。

卓黨至濟甯宿

由濟甯過帕巴喇嘛寺
通廓爾喀湯布城大路

宗喀至薩迦寺計行程十日

宗喀至胡林宿

由宗喀經羣喀寺越工倫拉大山其西南有
補泥海下山走平川至胡林黑帳房無鬪房

胡林至強谷宿

由胡林繞山至撒喜登撒拉大
山下山走平川至強谷黑帳房

強谷至阿拉寺尖勒龍宿

強谷之西名雅蛟藏布河不渡河繞北行越山
梁下山至阿拉寺又繞山至勒龍山頂有大寺

勒龍至臧楮尖達增宿

由勒龍過山麓至臧楮過臧楮河經工
龍寺沿山透進至達增有碉房人戶

達增至巴馬尖湯谷宿

由達增繞山越小山梁至巴馬路平坦又沿山行越江納大山下山渡河至湯谷黑帳房

湯谷至拉了尖常桑宿

由湯谷越四小山至拉了有拉了爾寺又繞山麓至常桑黑帳房無碕房

常桑至拉湯尖于隴札宿

由常桑越常桑山下山渡小河至拉湯又繞山麓至于隴札黑帳房無碕房

于隴札至熱隴尖噶喀宿

由于隴札繞山經熱水塘至熱隴越小山沿甲水海過噶拉山至噶喀有碕房

噶喀至浪錯尖星克宗宿

由噶喀越拉喀大山下山至浪錯沿摩拉海岸依山根紆折而行至星克宗有碕房

星克宗至瓊喀尖咱普宿

由星克宗沿山繞河。越瓊略山。有拉子歧路。又越山渡河。又過咱木橋。至咱普黑帳房。無欄房。咱普至薩堆尖。薩迦喇嘛寺宿。

由咱普越山至薩堆。又繞山麓。過小河。至薩迦胡圖克圖寺。其教有家室。寺南又有大喇嘛寺。

薩迦寺至札什倫布。計行程三日。

由薩迦寺。越俄卓山。過薩迦橋。經尼姑寺。江公寺。其北有曲頂寨。登山至擦嘴。有欄房。樹木。

擦嘴至慶孜尖。剛堅寺宿。

由擦嘴下山。過捨格。繞山麓行。山有崙布寺。過小河。至慶孜。又越浪嘴大山。下山至剛堅寺。

剛堅寺至土城尖。札什倫布宿。

由剛堅寺。越山麓。繞行至土城路平坦。至札什倫布。

後藏由草地。陽八井。至前藏。計行程十日。

札什倫布至生多喇嘛寺宿。

由札什倫布過轄爾橋平路至生多喇嘛寺。寺在山頂有禰房樹木。

生多喇嘛寺至鹿古洞尖密蛟納噶宿。

由生多喇嘛寺登山至達竹渡過河繞山而行至鹿古洞。其南有鹿古寺。又繞山均有尼姑寺。至密蛟納噶。

密蛟納噶至達拉寺尖昔喀宿。

由密蛟納噶經黑帳房山路崎嶇至達拉寺。又依山繞行至昔喀黑帳房有禰房田地。

昔喀至拉熱尖務庸縱黨宿。

由昔喀下山坡渡吳宇橋。越日蚌大山。下山渡河。經波多寺。至拉熱。又越山梁。至務庸縱黨山頂有官寨。

務庸縱黨至山根尖塔木墩宿。

由務庸縱黨黑帳房過作木橋。繞山至山根。其山則拉古嚕古山也。又越山。至塔木墩平川黑帳房。無禰房。

塔木墩至布勒尖碩布巴拉宿。

由塔木墩經麻爾江過河上山。至布勒。又越碩布大山。至碩布巴拉平川黑帳房。無禰房。

碩布巴拉至陽八井宿。

由碩布巴拉過河名碩布河至陽八井喇嘛寺在山麓有河繞其前。

陽八井至德慶宿。

由陽八井經熱水塘依山繞路過佳桑橋有曲桑寺至山岡名德慶有碉房。

德慶至浪孜宿。

由德慶繞小山至喇巴橋有初普寺至浪子有碉房樹木田地。

浪孜至甲普尖前藏宿。

浪孜至甲普有碉房樹木自甲普至洞噶爾關其南名只桑橋通彝黨赴後藏路也。

駐藏大臣工部尙書都統松筠巡邊記。

乾隆六十年乙卯夏四月巡邊自前藏起程經曲水過巴則江孜共十日行抵後藏由札什倫布走剛堅喇嘛寺彭錯嶺拉木洛洛協噶爾過定日通拉大山共行十一日至聶拉木又由達爾結嶺西轉經過伯孜草地鞏塘拉大山瓊噶爾寺南轉出宗喀共行六日至濟噶仍旋宗喀東北行十日還至拉孜。

入東山。一日至薩迦溝廟。自廟北行二日。出山。仍走剛堅寺。還至札什倫布。往復略地。隨在繪圖。知其

概焉。緣札什倫布西南。左有薩迦溝內之曲多江鞏。

此二處迤北。察喇寺等地。方有糧草。隨處皆有險要。

右有彭錯嶺。

此地建有大廟。有樹木。有糧草。廟迤北亦

有險要。

南之峭壁連崗。是爲後藏之咽喉。實天然要隘也。乃辛亥年廓爾喀以步卒千數人。自聶拉木走

薩迦。直抵札什倫布。彼時果有現在之漢番官兵。劃分兩路。一赴曲多。江鞏以堵其前。一赴彭錯嶺偵探。由拉孜以截其後。則廓爾喀深入無援。可以不戰自潰。何至如入無人之境。任其肆意猖狂如是耶。若云兵少。其徐南鵬僅有漢兵數十名。又何以固守營官寨耶。是當初漢番兵不知有曲多。江鞏。彭錯嶺等處險要。可守可戰。以致胸中無主。茫然失措耳。至協噶爾定日。左首絨轄喀達。定結。西路之宗喀。瓊噶爾。鞏塘拉大山。皆爲天然門戶。曲水巴則。江孜又爲前藏之要隘。而江孜迤南之帕克哩。甘巴等處。界連臧曲大河。尤爲前後藏第一險要。所有在藏漢番官兵。及噶布倫等。均宜熟悉。因於前後藏江孜教場。泐石。咸使對圖。講求人各胸中有主。方於汛防有益。然安邊之策。莫若自治爲上。非獨濟隴。聶拉木。番民。應派廉潔營官管理。所有前後藏各屬營官。第巴。如皆能教以廉潔自持。善撫百姓。則天佛庇佑。恆無他患矣。是爲記。

札什倫布由咱黨小路至前藏。計程八百四十里。

札什倫布四十里至落窺。

一百二十里至年木胡達。

八十里至沙楮卡。

七十里至白地。

五十里至曲水。

四十里至登龍岡。

前藏至布魯克巴計程一千四十里。

前藏七十里至業黨。

八十里至巴則。

七十里至浪噶孜。

七十里至列隆。

有人戶土官
微草無柴。

五十里至沙瑪達。

有人戶
田畝。

一百里至色木多。

五十里至能木宗。

七十里至咱黨。

一百二十里至巴則。

四十里至能工巴。

三十里至拉撒招。

六十里至札什采。

一百里至白地。

一百十里至勒隆。

有人戶
無柴。

六十里至噶拉。有人戶、田畝、有草無柴。

五十里至遐拉。有人戶、有草無柴。

六十里至帕爾。即帕克哩、有人戶、田畝、無柴、有草、係布魯克、巴噶畢、西藏三處交界。

四十里過山、至香郎。有人戶、係土牆、版棚、砌房、有柴、草、水、田、田稻、穀、竹、木、與中華同。

七十里至仁進步。

四十里至喇嘛隆。有人戶、寺院、餘俱不及香郎。

五十里至西木多。有人房、柴草、大寺院、內住呼圖克圖、名吉賽、吉書、乃諾彥林親兄弟。

三十里至札什曲宗。有人戶、柴草、大寺院、乃諾彥林親避暑處。

謹案自藏至札什曲宗計十七站再行二日地名坪湯即第巴諾彥林親住處惟西木多札什曲宗夏日稍涼故至此避暑其方產稻穀麥豆黍稷各種瓜果蔬菜鵝鴨鷄豬等物仿於中國

三十里至東噶拉。二處俱屬香郎。

前藏由陽八井至噶爾藏骨察計程一千三十五里。

陽八井分路四十里至峽布。

七十里至駝羅海。

四十里至桑吉馬丁。

五十里至騰格爾諾爾界。大海子邊。

五十里至郎錯。又名族隆角。

八十里至章錯。過大山。有海子。

六十里至卓得爾。

五十里至巴業了。

七十里至噶爾藏骨察。

前藏至生根物角計程一千五百十里。

前藏四百十里至騰格爾諾爾。

五十里至楮定馬奔。

五十里至喇定初多。

六十里至過中。有太山。山頂有海子。

四十五里至海子頭。

五十里至邦塘。

七十里至凍錯。

七十里至哈隆。過大雪山。

六十里至錯隆角。

五十里至大海子。過二山。

六十里至白噶哈力水。

六十里至拉卡爾工多。

四十里至察木哈。過山。

九十里過大河、至鹽池。

四十里至西甘工布。

五十里至達甘峨所。過山。

三十里至雀雅。

二十里至奇瑪多隆。此處供換烏拉。

四十里至白納辛。

七十里至吉都烈路。

五十里至巴拉。過山。

六十里至郎喀。過二山。

三十里至卡爾哈。過山。

五十里至哈甘布。過山。

四十里至恩達哈。

六十里至星千哈岡。過山

八十里至色爾松多。過三山

五十里至生格物角。過山

謹案自藏至生根物角計三十一站沿途處處有烟瘴無柴燒糞水草俱微。

前藏至奔卡立馬爾計程一千五百十里。

西藏三十里至克噶拉俱。

五十里至蒙至。

四十里至义里場末。

四十里至杰蟲。

六十里至拉末。

八十里至彭多。

三十里至呼整。俗名熱正

五十里至察木桑。

四十里至巴達。

七十里至揆娘庫。

三十里至三壩。

七十里至多羅得巴。

七十里至哈拉烏蘇。

六十里至胖米麻。

八十里至阿木多。

六十里至投順納瓦。

五十里至厦木納熱麻。

五十里至圖爾郡。

七十里至熱麻拉撒。

八十里至巴恩拉木期。

八十里至白果東馬。

六十里至布呼江。

七十里至遮隆。

八十里至楚隆。

六十里至彭卡。

五十里至奔卡立馬爾。

謹案自藏至奔卡立馬爾設小卡五處曰噶爾藏骨察托克托賴立拉撒畢隆奔卡立馬口子。

前藏至納克產卡倫計程一千五百十里。

前藏三十里至甲普。

四十里至浪孜。

六十里至拉咱爾。

五十里至粗布。以上有人戶柴草。

七十里至阿哩。過大雪山有柴草無人戶。

八十里至甲仲。

七十里至泥木根舉。

六十里至族貢。

七十里至八角。以上有人戶柴草微。

五十里至大雪山根。

九十里至林卡宗。

五十里至蘭卡。以上無人
戶柴草。

八十里至熱黨。有人戶
柴草。

六十里至甲錯。人戶有
柴草微。

六十里至墊登。

四十里至魚骨柏。二處柴
草微。

一百二十里至噶拉。

五十里至賀洛。

七十里至察黨粗固。

七十里至日鐙。

九十里至木慶。

八十里至柏木壩。以上人戶
水草俱無。

八十里至按烈。

五十里至納克產。人戶有
柴草微。

謹案前藏至納克產計二十四站沿途俱有瘴氣又自納克產分小卡四處一曰特布駝羅海距納克產十四日約程五百餘里其地甚冷瘴氣甚盛一曰拉克察距特布托羅海七日約程三百餘里其地草微無柴有瘴一曰庫克擦距納克產十三日約程五百餘里有燒柴水草俱微有瘴一曰札克欽距庫克擦八日約程四百餘里其地柴草水俱無

前藏至玉樹卡倫計程二千二百七十里。

前藏東北至噶拉壩三十里。

三十里至彭多。

三十里至墨隆堡。

三十里至節仲。

三十里至松竹宗。

三十里至勒甘多。

三十里至彭多。

三十里至俊門。

七十里至納地。

八十里至巴布龍。

三十里至桑多。

八十里至江足卡。

九十里至哈拉烏蘇。

三十里至色爾龍。

六十里至噶色爾楮卡。

六十里至江古郎。

四十里至溫江松多。

八十里至多塞爾。

五十里至格雅爾卡。

五十里至湯清。

八十里至江清巴納卡。

四十里至曾項濃。

五十里至納喜塘。

九十里至春科塘。

四十里至甲里剛多。

四十里至先布松多。

六十里至東布松多。

一百里至畢洛腮。

六十里至曲齒松多。

一百二十里至噶順。

八十里至魁清。

一百十里至江溝八納巴。

謹案自藏至玉樹計三十八站。自玉樹分小卡四處。一曰庫爾塞。一曰白兔山。一曰齊察河。一曰

瀘右腦。

前藏至騰格爾諾爾計程四百十里。

三十里至甲普。

四十里至奔里。

五十里至陽八井。

四十里至乾海子。

五十里至楮登立馬爾。

六十里至興東。

六十里至擦桑納。

七十里至曬多坡。

五十里至噶喜。

一百里至納馬蠻地。

一百里至玉樹。

四十里至浪孜。

四十里至德慶。

四十里至卡孜。

四十里至桑托羅海。

四十里至那根初多。

謹案格登立馬爾。即騰格爾諾爾。古天池也。那根初多乃天池之口。以上自噶爾藏骨察。生根物角。奔卡立馬爾。納克產。玉樹。騰格爾諾爾等處。皆設要卡分防。自準噶爾掃蕩以後。此外俱係西疆。而駐藏大臣每歲出防之役。遂罷。

西藏由木魯烏蘇至西甯。計程三千七百餘里。

拉撒四十里至郎拉。

三十里至們都。

七十里至羣科爾。

六十里至沙拉。

有水田。產荏草子。

四十五里至達隆。

四十里至夾藏壩。

過鐵索橋。

六十里至羊拉。

六十里至達木東邊。

七十里至克屯西立克。

六十里至什保諾爾。

六十里至噶欠。

六十里至哈拉烏蘇西邊。

五十里至郭隆。

五十里至楚木拉。

自們都至此。有水。草無柴。斃糞。有瘴。

七十里至綽諾果爾西邊。

六十里至蒙古西里克。

四十里至蒙咱西里克東邊。

六十里至泡河老。

六十里至索柯東邊。

六十里至吉利布拉克。

四十里至阿木達河。

五十里至布哈賽勒。

自綽諾果爾至此俱有
水草無柴燒糞有烟瘴。

五十里至多倫都爾。

西藏青
海交界

六十里至呼浪河。

五十里至賽柯蚌。

八十里至清河察漢哈達。

八十里至察漢額爾吉。

以上數處俱有水草
無柴燒糞有微瘴。

五十里至庫庫可達。

五十里至庫柯諾爾。

四十里至庫柯溝。

五十里至木魯烏蘇西河。

七十里至哈拉河洛。

六十里至巴罕拜彥。

三十里至烏河諾爾。

六十里至烏河那峽。

四十里至巴彥哈拉。以上數處俱有水草。無柴。燒馬糞無烟瘴。

八十里至黨塞爾河。

四十里至哈馬爾厄勒泰。

九十里至索諾木。

七十里至畢留圖河口。

五十里至埡里布拉克。

六十里至哈命烏蘇。

五十里至登努爾臺。

三十里至依麻圖。

七十里至木呼爾。

三十里至察漢鄂博圖。

五十里至堪布灘。

四十里至那拉薩拉圖。

五十里至喇嘛托羅海川口。

六十里至哈拉河。

四十里至且克諾爾。

七十里至黑悅爾達般。

四十里至畢留圖。

五十里至多倫諾爾。

五十里至哈命烏素。

四十里至依麻圖川。

七十里至沙拉圖。

八十里至哈套口。

七十里至庫庫托羅海。

五十里至阿什漢水。

四十里至駱駝額項。

即土爾根。自巴彥哈拉至此俱有水草。無柴。燒糞有烟瘴。

六十里至東科爾。即丹噶爾

九十里至西甯城。

謹案自藏至青海、西甯俱有蒙古番子七十九族住牧。其生計種田、牧畜、打牲各不等。每年達賴喇嘛、班禪額爾德尼遣堪布囊素進京。於四月間行走。此路冬月不可行也。打箭爐由霍耳德爾格草地至察木多。共三十九站。計程一千七百七十五里。

四十里至折多山根。

四十里過折多山、至別始分路。

四十里至瓦七砦。

四十里至郎砦堡。

四十里至八桑砦。

五十里至上八義。

五十里至汛馬塘。

三十里至雀雅。

五十里過山、至喇地塘。

六十里至致隆。

七十里至迦薩楮卡。

五十里至吉如楮卡。

三十里過小山、至章谷。

五十里下山、至江濱塘。

五十里至竹窩。

三十五里至勒恭松多。

二十里過普王隆、至甘孜。

三十里過河、至白利。

五十里至隆壩擦。

六十里至益隆。

六十里至羅登。

五十里至格葱。

五十里至春科西河。

三十里下山至巴戎。

七十里至姜黨。

三十里至草里工。

五十里至哈甲。

三十里至冲撒得。

四十里過山至察木多。

四十里至阿加拉洛。

四十里至德爾格界。

六十里至吉馬塘。

六十里至楮泥拉沱。

四十里上山至班第楮卡。

六十里至甲界。

六十里至草拉。

三十里至峽隆塔。

三十里至哈甲峽口。

六十里過山至熱了。

謹案自打箭爐草地至察木多路遙平坦草廣柴微此一帶番民多住黑帳房以牧畜爲主有烟瘴。

察木多由類伍齊草地進藏至墨竹工合大路共二十九站計程一千九百一十里。

五十里至俄羅藏分路

四十里至康平多

五十里至達塘

一百里至江清松多

八十里過四小山至塞爾松多

五十里至吉樂塘

七十里至江黨橋

六十里至汪族

五十里至三大徧關

七十里至噶現多

六十里至拉里界

七十里至沙加勒

七十里至哈噶錯乍

六十里至杓多

五十里至類伍齊

八十里至甲木喇族

八十里至岡松多

六十里至拉咱

七十里至察龍松多

七十里至拉貢洞

八十里至結樹邊卡有大寺院

八十里至噶咱塘

七十里至拉里堡從右手進山溝

七十里過山至吉卡

七十里至積華郎

六十里至胖樹

六十里至仲納三巴。

六十里至約同定同古。

七十里至墨竹工卡。

松潘出黃勝關由草地至合西甯進藏之庫庫賽計二十四站共程一千五百九十里。

黃勝關六十里至兩河口分路。

八十里至楚阜。

七十里至甲旺麻旺。

五十里至沙鹿堂。

六十里至巴馬。

六十里至江地克里麻。

八十里至龍頭溪。以上皆有水草無柴

七十里由察漢拜勝分路南至圖深圖過河至吾浪莽。

此河即黃河也

八十里至宗喀爾。

七十里至察漢托灰。

七十里至沙那吾舊。

六十里至齊齊哈賴。

七十里過大雪山至安定達壩。

七十里至土龍圖老。

五十里至塔奔托羅海。

六十里至丹仲營。

六十里至牒倫墩。

八十里至中牒倫墩。

八十里過大雪山至上牒倫墩。

七十里至吾浪牒倫。

二百四十里至古爾班索諾木。

自吾浪牒倫分作四站，每站六十里，合西甯進藏之庫庫賽地方。

兩河口分路至青海，計二十二站，共程一千三百五十里。

兩河口八百四十里，分作十四站，至巴漢海流圖。

六十里至烏蘭勒格。

七十里至巴罕圖爾根。

六十里至伊克圖爾根界。

六十里至伊克圖爾根。

七十里至察罕諾木漢。

六十里過黃河至察罕托羅海。

一百三十里至青海。

兩河口至西甯，計二十五站，共程一千五百五十里。

兩河口四百九十里，分作八站，至獨磊出庫。

六十里至佛藏。

四十里至瑄胡盧。分路

七十里過黃河至察罕拜勝。

六十里至布爾哈數。

六十里至度納圖。

六十里至巴溪海流圖。

六十里至安遮谷圖。

六十里至納木罕。

八十里過山至莽熊。

八十里至歸德。

八十里過大山至康城溝。

六十里至西甯府城。

兩河口至舊洮州計十四站共程九百三十里。

兩河口七十里至雜牛洞。

八十里過狼架嶺雪山至柏香林。

四十里至答建寺。

六十里至潘州。

六十里至獨磊蟲庫。

六十里至獨倫。

六十里至烏蘭。

七十里至巴納布哈。

七十里過山至郎岸。俱有水草。

六十里過黃河進溝。至郭密。

五十里進關門至申。

五十里至大草場。

五十里至下包坐。

八十里至龍溪頭。

六十里向北至熱黨。

八十里過大小二山。至丹倫。

八十里至納布鍋

八十里至舊洮州

兩河口至河州計十六站共程一千三十里

兩河口五百五十里分作九站至熱黨

六十里至江托

八十里至多提

八十里至舍納

七十里至河州

八十里至撓多

六十里至洮河腦

五十里至黑銼

八十里至沙馬關

附錄藏程紀略

康熙辛丑陝西涇陽縣知縣焦應旂識


夫藏何自昉乎古稱西方有聖人謂佛生其地世居於此是耶否耶然則何為以藏名藏之為言藏也無盡藏之謂也意者以梵書三藏有經藏律藏論藏之說若是之無盡藏也其上著番人又稱之曰招此不知何解大要土語變音有聲無字其無所取義無疑獨是上古之時不聞有佛也漢唐間始重虛無寂滅之教數遣使西域求佛經迎佛骨而佛教之興流傳中國迄今千百祀不改雕形塑像崇建禪林釋子尼僧皈依法戒世俗庸衆從而敬信之持齋素樂布施動曰廣積功因願登西方極樂世界雖捨身破家勿惜有心世道者亦往往置而弗論要不過存此法門以警衆覺愚醒迷啓悟使之念佛從善不大失其本心而止未嘗身履藏地亦未知有所謂活佛也余辛涇之四年西塞賊匪跳梁侵擾哈密天子簡將征討乙未夏余捧檄從軍轉運糧儲歷有四載嗣因逆賊勢窮潛行狡計

掠及藏地。天子怒其猖獗，特命大將軍王親統六師，殄茲小醜。因逆達賴喇嘛進藏，是即活佛。余偕同事諸公奉調押運。庚子四月，由西甯出口，走阿什漢水，日月山，柴錐口，工噶腦兒，以及多倫達壩等處，赤日之下，雪雹時加，伏暑之中，嚴霜夜襲。天地氣之不同，蓋與中原迥絕。越六旬而抵索力奔，過黃河，經星宿海，水面平闊無際，波瀾不驚。上下天光，一碧萬頃。海中石山一座，相傳山底有七孔，水從孔中迸出，平讀山海經，覽輿圖記，謂河源經出於此，竊疑爲誕。今果信其不誣也。自是而往，亞刺塔夷之地，藥草傷生，巴彥哈拉之區，瘴癘彌毒。人畜中之不一二日，輒死。填屍道路，不可勝計。余至此，隨行僕從，十日內死者八人。此時此際，行者寒心，見者慘目。生死存亡，惟付之天命，無可如何耳。初秋念有一日，始至木魯烏蘇，名通天河，乃金沙江之源也。時則王師屯駐河東，平逆將軍延率各都統提鎮蒙古諸部落，舉兵進藏。余復奉王諭，押送牛羊隨大兵後，以濟軍糈。於八月十一日起程，十七日渡七岔河，其處乃微行小徑，無人跡往來，無番夷住址。深山窮谷，罔識途徑，惟相勢審其方向，指西南以行。雖早夜奔馳，而心中茫然，不卜所之何地也。既而得歸大路，會官兵安塘其地，憂方稍釋。計木魯烏蘇至此，僅六十七日之程，而失路遲延已半月餘矣。正欲倍道兼馳，奮力前往，不期舊站改移，中途多阻，時將軍延因前軍戰捷，慮賊截後糧路，令撤舊塘，改於山南，由是覓嚮道，達新臺，入無人之境，艱辛苦況較日前倍甚。塔子頭上，帳冷氈寒，水草灘中，人類馬仆，入深谷則亂石參差，爪牙爭錯也。越達穀則層巒峭壁，手足伏行也。又況番夷狡悍，剽掠成風，百十爲羣，潛匿幽僻，晝則奪物，夜則劫營。余甫過哈拉烏蘇，而騾馬搶去已盡。即我同事諸公亦鮮有不受其累者。如此凶頑，是不待教而誅者也。仲冬朔日，方抵西藏。至則我師告捷，賊逆敗走，達賴喇嘛已入座矣。非聖天子文德武功丕著無外，烏能如是。迨觀藏內形勝，山水環秀，土田沃衍，樹木濃蔭，民居稠密，且風和日暖，嚴冬之際，冰雪不凝，洵塞域之別有天地也。平川中擁一石山，較諸峯獨小，上建寺院，爲活佛所居，層樓翠閣，幾數百重，金光絢麗，美不勝述。問所由來，僉曰：活佛之生，代有其人，本係原身轉世脫胎，無過番民之家，但不一其地。始生時，即能言前世事，衣鉢所傳，一一不迷。人驗其真，爭相頂禮，迎入前藏，升座，徒衆千萬。番民日朝如市，非特近地爲然，遠近西海、青海各國，蒙古諸王部落，皆以來見。所貢皮幣、大馬、珠玉、奇產異物，不一而足。嗟夫，世之膺大位、享大名、身都富貴者，福澤非不厚也。然而名利場中，事物經心，攘攘勞勞，迄無甯息。茲觀達賴喇嘛居然赤子，無知本來面目，一

塵不染其宮室居處如是。服食器用如是。人心悅服無不如是。雖富貴之極。無所用之。然則所謂活佛者。蓋現在受福之人也。佛云乎哉。余寓藏八日。公事甫竣。方得登堂一見。見畢即行。未獲遊覽娛暢。心目殊爲恨事。值大兵凱旋。隨之東歸。是時裘敝金盡。驛馬不能置。惟購牛數頭。僅載帳房衣被。輕騎以從。他物悉屏棄。僕從步隨。險巖竹以長征。向江邊而就道。穿林入澤。履險蹈危。或步石級。或緣木棧。閱二十餘日。望拉哩之山。高聳插天。自山下起行。盡日乃及山肩。天晚不能過。其地皆亂石險窄。平不滿丈。且烟瘴甚大。無片柴寸草。雖勺水難覓。乃坐臥一夕。人馬俱凍餒。次日。陟其巔。則堅冰滑雪。萬仞崇岡。如銀光一片。俯首下視。神昏心悸。毛骨悚然。令人欲死。不得已。乃鋪氈坐雪上。腰繫以繩。僕從前拖後曳。盤旋而下。行李什物。憑空而擲。牛馬則縛足下墜。傷斃者大半。是誠有生來未歷之境。未嘗之苦也。夫何行動正艱。口糧告絕。且番地又不產米。惟日食青稞以充飢腹。如此者半月。當除夕佳辰。元且令節。求粒米沾口。不可得。困頓至此。其何以堪。厥後行至察木多。川督年羹堯念進藏官兵勞苦已甚。恐流離異域。特委永甯道屯糧接濟。因得日支米二升。麪二升。並借庫銀二百兩。以資盤費。涸轍之困。借以復甦。茲豈非天幸耶。爰是更覓番驛。稍載行囊。整轡以往。歷工阿朗麻之地。芻草空虛。過湯噶丹達木之村。人民殷富。坡高而險。紫微陰繖。查拉松多。可畏也。雪連四岡。寒風徹骨。宗洛三巴。其最焉。邊巴俗尚寬柔。阿足人心狡詐。碩板多之山崇嶺峻。行來扶杖率衣。洛隆宗之怪石巖巖。到處左盤右折。昌都多勝。嶺形連二水環龍。占對有奇觀。勢若千軍駐馬。曰阿布喇。曰黎樹。村村盜數。日夾壩溝。曰江卡。處處賊窩。凡屬行役征夫。罔不驚心喪膽。至如漢人寺房舍。無殊內地。核桃園風景。頗似中華。時方二月初。日正上旬之內。紅杏發而芬芳。綠柳垂而青翠。田園禾黍。郁郁青青。鳥語花香。風薰日暖。爲憶出口以來。殊方絕域。馳驅萬里。舉目淒涼。幾一年矣。今見及此。能不令人心目俱爽耶。繼此則古都龍。即金沙江過渡處。有大船四隻。千餘人馬。片時即渡。塞地河道頗多。或係木橋。或係皮筏。舟楫往來。此其僅見者。其兩岸爭妍村落。依山如畫。土產蒲萄最廣。蠻人以此造酒。飲之亦能醉人。再行七十里。至巴塘。氣候溫暖。地闊人稠。花木繁茂。可觀。且集市之所。內地漢人亦寓此貿易。余至此人馬困乏。歇息三日。然後起行。奔又木山高百里。越二日而始登。大所塘路通。綫值三春而未暖。諸物發售。冷水灣附近玻璃。四面皆川。乾海子潛藏寇盜。惟茲數日之內。無非雪路行程。策駑前征。裏塘告屆。其寺院之華麗。喇嘛之衆多。諸貨之集聚。較巴塘稍勝。所不及。

者地道寒冷無嘉田花木之美耳次日宿河下及咱麻拉洞東行俄洛坡雪地六十里深三尺餘至剪子溝而下及麻蓋中漸下抵雅龍江蓋約百餘里云江水碧清而溜兩岸巖石甚險難以舟渡有大船數隻橫其中掩大板作浮橋車馬往來殆若坦途過此江以東由八角樓臥龍石以至那凹進多雖屬番民逼近內地知畏王法爲化林營所轄商民經過者即一二人可行可止永無夾壩之患矣三月初四日進打箭爐爲對西極邊皆番地乃藏路咽喉土官明正司統屬其先叛服不常康熙三十八年調兵剿平之宜以恩威彰以信義莫不傾心向化今設兵戍守其地番漢咸集交相貿易稱鬧市焉余於此馬疲力倦乃覓夫乘小竹輿自頭道水越冷竹關抵瀘定橋橋高十餘丈長數百步兩岸建亭閣用大鐵繩九條縣互飛渡其上覆以木板若天塹然人馬須少行徐徐而過多即動搖若遇風則斷不可行矣繼此則化林坪飛越嶺再進而牛市坡羊圈門山勢陡惡石路艱難莫可殫述過黎雅之墟歷印笮之境俗稱武侯擒獲文君當墟其舊地也念一日入成都省會之區沃野千里人民輻湊景物豐美文采風流埒於中州獨是錦江蹀躞浣箋無存揚雄相如之故宅僅載志乘西望漢陵昭烈帝之遺徽有不禁慨然嘆息者又如新都之龍門漢州之房湖高人逸士所觴詠皆足動人感愴由德陽至落鳳坡龍士元之墓祠宛在緜州及梓潼縣文昌君之廟貌巍然劍關石壁峭聳棧道木架凌空閣曰馬鳴見於昭化驛名籌筆著於廣元千佛巖與飛霞洞同山朝天關並神仙驛接壤行是路者南棧固艱而北棧尤險甯羌過金牛之峽嘆五丁開道特勇而愚蹇沔踰雞頭之關羨子房學仙養真自適陳倉古渡碣存於留壩靈鳳飛來窠見於南星黃牛山勢崢嶸寶雞川原平衍岐山爲周室發祥之舊扶風乃漢朝京輔之遺自是而達醴泉適涇陽可且夕至也計余自丙申二月從軍至辛丑五月回署六載於外雖然王事靡盬勞瘁弗辭而以衰弱微軀頻年奔走且夕無休宿露披霜含飢忍凍崎嶇歷盡皮骨僅存所幸以生還無恙者皆上蒼默佑所致也嗚呼余年五十有七矣毛髮蒼蒼精神多憊回憶少時居處家庭愧未能窮山極水以窺天下名勝繼而上公車登仕籍游覽荆襄韓魏間以及燕趙秦晉諸大境於水見江淮河漢非不大且深也於山見終南恆華非不高且遠也然猶是中國以內名山勝蹟游人之所寓目仙客之所景從不惜身至其地親見其實乃若遐荒絕塞舟車不至誰探星宿之源封然無聞孰陟崑崙之頂如所爲藏如所謂佛則亦虛誕險遠之說固不必其至之不必其見之也不必至而竟至之不必見而竟見之可不謂僥倖因不

揣固陋於回藏之暇。授筆以紀其略。匪敢矜功市異。亦以誌此番閱歷。此
番辛苦。出之生平意外者。觸目驚心。以示安不忘危。逸不忘勞之意云爾。



衛藏通志卷五

喇嘛

御製喇嘛說 敬編卷首

乾隆五十七年十月二十三日。福康安等會奏。爲遵旨設立金本巴瓶。拈定呼畢勒罕。以興黃教事。查達賴喇嘛。班禪額爾德尼。爲黃教之宗。自宗喀巴流傳至今。凡達賴。班禪。圓寂後。不迷本性。俱有呼畢勒罕出世。以衍其教。向係令吹忠等作法降神。秉公指認。是以化身示現。僧俗人等。悉皆信以爲真。歷輩以來。仰蒙天朝衛法興教。恩禮優隆。各蒙古部落。以及大小番族。俱憑吹忠作法指定。誠心敬奉。遠近皈依。是達賴喇嘛。班禪額爾德尼。轉世之後。其實在根基。向來遠近番民。數萬衆。總以吹忠作法降神。爲敬信。竟有牢不可破之勢。然行之既久。其中妄指之弊。定所不免。卽如藏內各呼圖克圖內。仲巴。爲前輩班禪之兄。哲卜尊丹巴呼圖克圖。爲達賴喇嘛之姪。而丹津班珠爾之子。卽係三巴呼圖克圖。之呼畢勒罕。族屬姻婭。遞相傳襲。誠如聖諭。竟與世職無異。各呼畢勒罕。旣出於一家親族。不能使人無疑。恐將來達賴喇嘛。班禪額爾德尼之呼畢勒罕。若亦指認未真。於事殊有

關係仰蒙聖主振興黃教。頒發金本巴瓶一件。令將以忠四人所指之呼畢勒罕姓名及生年月日。各寫一籤貯於瓶內。對衆拈定。實足以防弊竇。而愜衆心。奉到節次諭旨。仰見我皇上釐定正教。撫馭外番。於因勢利導之中。寓循名責實之意。臣等實深敬佩。並敬向達賴喇嘛。班禪額爾德尼。濟甯呼圖克圖。大喇嘛。及吹忠等。宣示聖諭。無不感激悅服。茲復欽遵訓示。公同籌議。嗣後拉穆吹忠。內噶。瓦東。薩穆葉等四人。俱令其熟習經典。試演降神之法。設遇達賴喇嘛。班禪額爾德尼。示寂後。令吹忠等四人認真作法降神。尋覓實有根氣之呼畢勒罕。指出者若干。將其名姓生年月日。各寫一籤。貯於欽頒金本巴瓶內。揀選熟習經典喇嘛。虔誦經七日。傳知各呼圖克圖喇嘛等齊集佛前。駐藏大臣親往監視。凡達賴喇嘛。班禪額爾德尼之呼畢勒罕。即仿互爲師弟之義。令其互相指定。如吹忠四人所指皆同。有一呼畢勒罕出世者。擬寫名籤一枝。另加空籤一枝。入於瓶內。如法誦經。若對衆掣出空籤。則名籤之呼畢勒罕並非確實。是以不爲佛佑。即別尋呼畢勒罕。另行籤掣。以杜吹忠等串通妄指之弊。籤上須寫清漢唐古忒三樣字。使大衆一望而知。不致爲所蒙混。至前後藏各大呼圖克圖之呼畢勒罕。亦令駐藏大臣。監同達賴喇嘛。照例掣籤。方可定準。其餘如察木多。類烏齊等處呼畢勒罕。距藏較遠。所出之呼畢勒罕。非大呼圖克圖可比。向來不由藏地吹忠指認。仍照舊令其徒衆自行尋覓。再藏內向來諷誦伊羅爾經之處。即係大昭。臣等已親至大昭。揀擇寬敞。

經堂掃除潔淨。俟御前侍衛惠倫、乾清門侍衛阿爾塔錫第恭齋、金本巴瓶到時，臣等卽行送往大昭內宗喀巴前供奉。並選派誠實喇嘛專司看守，以昭誠肅等因具奏。奉硃批：另有旨。欽此。

十二月初一日，福康安等具奏，爲御前侍衛惠倫、乾清門侍衛阿爾塔錫第恭齋、金本巴瓶來藏。於十一月二十日，敬謹齋到。臣等率同官員官兵及濟隴呼圖克圖率領各寺呼圖克圖、大喇嘛及噶布倫以下番目，遠出祇迎。達賴喇嘛感激聖恩，先期下山。在大昭等候。派喇嘛等各執香花幡幢，導引臣等與惠倫等恭送金本巴瓶於向來諷誦伊羅爾經之大昭佛樓上宗喀巴前，敬謹供奉。達賴喇嘛率領僧衆梵唄齊宣，極爲誠肅。並據達賴喇嘛稱呼畢勒罕轉世，遞衍禪宗，關係鄭重。今蒙大皇帝振興黃教，惟恐吹忠等降神作法，指認未真，致有流弊。特頒金本巴瓶，衛護佛門，實已無微不至。我實感戴難名。嗣後惟有欽遵聖訓，指認呼畢勒罕時，虔誦經於大衆前，秉公拈定。庶使化身真確，宣揚正法，遠近信心。闔藏僧俗頂戴天恩，無不感激等語。察看達賴喇嘛等歡忭感頌情形，見於詞色。呈遞謝恩哈達一方，佛一尊。濟隴呼圖克圖呈遞謝恩哈達一方，佛一尊等因具奏。於次年正月二十四日，奉到硃批：好事知道了。欽此。

五十八年二月十三日，和琳等具奏，爲西甯及科爾沁等處送到各呼畢勒罕，遵旨入瓶籤掣事。竊臣等前奉諭旨，遇有大小呼畢勒罕，卽在金本巴瓶先行試掣。茲有西甯送到遜巴呼圖克圖之呼

畢勒罕並年班回藏堪布囊素帶有科爾沁地方達喇嘛四人之呼畢勒罕四人茲有一人送到呼畢勒罕三名又有三人每一人各送到一名現在送到之呼畢勒罕共計九名所有各呼畢勒罕俱非大呼圖克圖向來轉世並不報明理藩院具奏亦不由吹忠指認惟將本處所出之呼畢勒罕名字送交達賴喇嘛班禪額爾德尼誦經指定歷來俱係如此辦理臣等伏思欽頒金本巴瓶今既供奉在藏自應將送到之呼畢勒罕各按名字人數分別入瓶試掣因先期令濟隴呼圖克圖等帶同喇嘛於大昭宗喀巴前虔誠誦經二月十一日達賴喇嘛下山前至大昭臣等親往監視寫籤入瓶共同抽掣查遜巴呼圖克圖之呼畢勒罕送來者共有三名掣得策旺哲布丹之子又達喇嘛羅卜藏多布丹之呼畢勒罕送來者亦有三名掣得烏珠穆沁地方第巴克之子又達喇嘛羅卜藏丹津羅卜藏達布凱倫珠布班珠爾三人之呼畢勒罕送來者每人祇各一名是以寫名籤三枝各配空籤一枝分三次入瓶抽掣其達喇嘛羅卜藏丹津及羅卜藏達布凱之呼畢勒罕俱係掣得名籤准其指認惟倫珠布班珠爾之呼畢勒罕掣空籤自非確實應令該地方另行尋覓是日掣籤之時自達賴喇嘛以下僧俗環觀皆稱大皇帝護衛黃教將設立金本巴瓶辦爲公允臣等察看衆情甚屬感激喜悅傾心信奉嗣後藏內吹忠指認之大小呼畢勒罕俱照此籤掣永遠遵奉再查前奉諭旨各蒙古地方所出之呼畢勒罕俱於雍和宮設立之金本巴瓶內抽掣此數呼畢勒罕既送到藏內

臣等遵卽試掣。嗣後西甯地方距藏較近。將所出之呼畢勒罕就近送藏。入瓶抽掣。此外各蒙古地方所出之呼畢勒罕。俱應由理藩院行文。令其將名字送京。在雍和宮金本巴瓶內籤掣。以別真僞。等因具奏。於本年五月初三日。奉到硃批。該部議奏。欽此。

三月初八日。奉上諭。西甯及科爾沁等處地方。送到各呼畢勒罕。入金本巴瓶試掣一摺。亦批交該部議奏矣。欽此。

五月二十六日。奉上諭。據和琳奏。吹忠等屢次試驗。實已計窮力竭。將來遇有應出之呼畢勒罕。遵旨擇有福相聰慧幼孩。歸入金本巴瓶掣定爲準等語。前因喀爾喀三音諾彥部落額爾德尼班弟達呼圖克圖圓寂後。其商卓特巴那旺札什。赴藏懇求降神批示。原令於中等人家找尋。詎那旺札什私送吹忠銀物。因而卽指圖謝圖汗之子爲呼畢勒罕。因命奎舒同札薩克喇嘛格勒克那木喀。赴喀爾喀地方另行找尋。奎舒等於該處屬下人戶。找得聰慧幼孩五名具奏。隨交雍和宮喇嘛念經。並派八阿哥及理藩院堂官。監同將其姓名生年月日。入瓶籤掣。掣得第五名之齊旺札布。奎舒來至熱河復命。回奏自找得五名幼孩後。俱令住在廟內。其餘四名俱各歸家。惟居末之齊旺札布不肯回去。又掣定後。那旺札什前製衣服坐褥一分。與齊旺札布不肯穿坐。另製一分給與。始行穿坐等語。可見呼畢勒罕原有根基。吹忠降神實爲妄誕。不足憑信。此一事殊爲奇異。甚愜朕懷。著將覆訊那旺札什。及奎舒奏摺。並昨降諭旨。俱抄

錄發交和琳等閱看。將來藏內遇有應出之呼畢勒罕。和琳等當照此辦理。則從前聽從吹忠之積習。自無難永遠革除。欽此。

四月十九日。奉上諭。前因喀爾喀三音諾彥部落額爾德尼班第達呼圖克圖圓寂後。其商卓特巴那旺札什。有意營謀汗王子弟爲呼畢勒罕。代求達賴喇嘛。拉穆吹忠附會妄指。已分別治罪。並明降諭旨。通飭各蒙古番衆矣。本日據和琳奏。詢達賴喇嘛。稱那旺札什到藏時。向我問額爾德尼班第達的呼畢勒罕出在何處。我令他去問拉穆吹忠。他就赴吹忠處問過。吹忠批說。圖謝圖汗屬難的兒子就是我向來總據吹忠所說爲憑。就照向例。憑吹忠龍單上的話給他批了。並訊據吹忠尼爾巴敦珠卜達爾結供。那旺札什於五十七年復至拉穆廟內。求問呼畢勒罕究竟在於何處。吹忠降神。龍單批令於東方中等人家找尋。過了幾日。那旺札什來寺。又送銀五十兩。緞一疋。哈達一箇。向吹忠告稱。圖謝圖汗車登多爾濟之子。暨公凌沁多爾濟之子。俱是屬難的。此二人內是否真實。並開伊等父母年歲。求其降神。吹忠卽於那旺札什所遞字上。批說。車登多爾濟之子屬難的是真。呼畢勒罕等語。是卽該商卓特巴欲營求汗王子弟爲呼畢勒罕之明證。益可見此事之不可不徹底查辦矣。朕自乾隆八年以後。卽誦習蒙古及西番字經典。於今五十餘年。幾餘究心討論。深識真詮。況本朝之維持黃教。原因衆蒙古素所皈依。用示尊崇。爲從宜從俗之計。初非如元人佞佛優禮喇嘛。致有冒罵者割舌。毆打者斷手之事。近因黃教之習。愈趨

愈下。蒙古番民等失其舊時淳樸之風。惟知牟利。罔識佛教正宗。不得不亟加整頓。是以製一金本巴瓶。派員齋往。設於前藏大昭。俟將來藏內或出達賴喇嘛。班禪額爾德尼。及大呼圖克圖呼畢勒罕時。將報出幼孩內擇選數名。將其生年月日名姓。各寫一籤。入於瓶內。交達賴喇嘛念經。會同駐藏大臣。公同籤掣。並於京城雍和宮內亦設一金本巴瓶。如蒙古地方出呼畢勒罕。卽報明理藩院。將年月姓名繕寫籤上。入於瓶內。一體掣籤。其從前王公子弟內私自作爲呼畢勒罕。陋習永行停止。朕之此旨。原因各蒙古汗王貝勒等。既有世爵。可以承襲。罔替已極尊榮。何必又占一呼畢勒罕。又謀喇嘛之利。如此見小。罔知大義。將來必致謀奪財產。啓爭肇衅。滋生事端。方今國家威稜遠播。各蒙古札薩克咸隸理藩院管理。遇有田產細故。俱爲之秉公剖斷。若任伊等牟利不已。久而或致爭奪相尋。成何事體。是朕之整飭流弊。正所以護衛黃教。厚愛蒙古人等。使其各關愚蒙。永除爭競。至佛法以虛寂爲宗。無來無去。故釋迦涅槃後。並未出世。卽宗喀巴闡演黃教。亦未出呼畢勒罕。達賴喇嘛。班禪額爾德尼。係宗喀巴之二大弟子。始世世出有呼畢勒罕。轉世共掌黃教。相沿已久。從前五輩達賴喇嘛。及來京之前輩班禪額爾德尼。諳習經典。或尙能具有真慧。現在達賴喇嘛年紀尙輕。姿質誠樸。甫學經卷。豈能直參上乘。先知一切。凡有求其指示呼畢勒罕者。惟憑拉穆吹忠之降神定奪。而吹忠不過如內地師巫之類。且內地師巫尙有用刀自扎。及舐刀吞劍。掩人耳目法術。今吹忠經和琳等面加演試。授以刀劍。俱各戰慄。並師巫之不如。是其所

指呼畢勒罕。荒唐更屬顯然。乃番衆人等崇信已久。以其妄言休咎。小有效驗。遂傳神一時。竟有牢不可破之勢。此亦習俗使然。自不必急於禁止。前已頒發金本巴瓶於大昭供奉之宗喀巴前聖籤。所有找尋呼畢勒罕一事。永遠不准吹忠指認。其番民推問吉凶等事。暫聽仍舊。日久吹忠法術不行。亦將自敗。總之大端。既得默化潛移。一切積弊。亦無難逐漸革除。至藏地出產較少。布達拉商上給與衆喇嘛養贍。及番兵口糧等項。需用繁多。所入不敷支給。向賴各蒙古番衆布施。以資用度。嗣後惟不准私指呼畢勒罕。其餘熬茶贈禮。皆在所不禁。朕方鼓勵蒙古等使之布施。但不可如那旺札什之用財營求。將汗王之幼子附會妄指。作爲呼畢勒罕。並如年前噶爾丹錫勒圖呼圖克圖之私遣徒弟。到土爾扈特地方。向人索取耳。從此各蒙古番衆等益當恍然於朕之掃除積弊。無非欲力挽頹風。振興黃教。保全伊等。俾安樂利。永息爭端。並非不令其尊崇佛教。不許布施達賴喇嘛。班禪額爾德尼也。所有辦理此事緣由。著再行曉諭各處蒙古番衆等。咸使聞知。共喻朕意。欽此。

五十九年正月二十六日。和琳具奏。訪得未出世之呼畢勒罕。遵旨派人尋找。事查自前年整頓藏務以來。皇上爲各呼畢勒罕皆出自達賴班禪二喇嘛親族及世家子內。積習相沿。致有逆僧沙瑪爾巴之事。頒賜金本巴瓶。供於大昭。入瓶籤掣。立法極爲盡善。臣等留心體察。並行文各處。訪問有無呼畢勒罕。以便遵旨試掣。總未見有呈報。緣衛藏地方。雖皆屬達賴喇嘛管轄。如察木多。類烏齊。

乍薩喀等處。各有呼圖克圖管理。一切事件。從不關白藏中。而各呼圖克圖中。又有紅黃黑三種。各行其教。各子其民。自去年臣等行文各處。令將所有呼圖克圖。無論大小有名無名。俱著將轉世輩數開列呈報。以憑咨明理藩院立案去後。昨據陸續報到。臣等查有察木多所屬甲拉呼圖克圖。隴色所屬覺喇澤小呼圖克圖。又藏隴借結呼圖克圖三名。皆已圓寂一二年。尙未出世。雖皆係極小呼圖克圖。如俟各該處自行呈送到日。再入金本巴瓶籤掣。設其所報。即係該呼圖克圖之親族世家子弟。妄指一二人。皆不可定。彼時方始駁飭。不但徒事周章。而是否係伊親族。亦無從查察。今臣等公同商酌。應即遵旨照認識額爾德尼班第達之例。會同彼處漢官。於圓寂地方之一二年所生之有福相聰俊幼孩內。各揀選四五名來藏。如法念經。入於金本巴瓶內籤掣。俟找尋到日。掣得何名。另行具奏外。並一體傳知各處。嗣後遇有呼圖克圖圓寂。即令隨時呈報。不必俟其出世。以憑一體辦理等因具奏。於本年四月十七日。奉到清字硃批。且如此試爲之。餘有旨。欽此。

以下二件附

駐藏二位大人吩示。查達賴喇嘛並班禪現今共有幾輩。生長地方。父母姓名。圓寂年貌。地名。某年差過堪布進貢。某輩某年蒙皇上賞過敕書。查明呈報等諭。奉此。今查得班禪頭一輩係宗克巴佛的徒弟。名叫克珠丹白尼嗎曲吉加勒布格勒巴勒桑。于木牛年生在後藏納堆降奪雄切窩地方。父名工噶扎喜。母名卜真甲木。于土馬年五十四歲圓寂。第二輩名叫竹白旺曲索諾木。

卻吉朗布。生在後藏野茹臧扎木溫薩地方。父母姓名並圓寂年貌找尋不出。第三輩名叫結竹白旺曲洛布藏敦欲竹巴。于木牛年生。在拉魁溫薩地方。父名索諾木多爾結。母名扁宗幾。于火虎年六十一歲圓寂。第四輩名叫班禪洛布藏曲吉甲勒參。于火兔年生。在臧絨連竹甲爾地方。父名撮結策忍巴勒角爾。母名撮結。于水虎年九十六歲圓寂。第五輩名叫班禪洛布藏夷喜巴勒桑布。于水兔年生。在臧絨托布甲隊倉地方。父名沙不仲索諾木汪扎爾。母名澤丹卜癡。于火蛇年七十五歲圓寂。第六輩名叫班禪折布尊洛布藏巴勒丹依喜巴勒桑布。于土馬年生。在臧野茹嚮扎喜孜地方。父名湯拉。母名甯達旺木。于鐵鼠年四十三歲圓寂。第七輩名叫洛布藏巴勒丹丹白尼嗎卻勒拉木結巴勒桑布。于水虎年生。在後藏巴浪吉雄地方。父名巴勒丹登珠卜。母名齊墨甲木。現年十三歲。第四輩班禪洛布藏曲吉甲勒參在時。遇大清登基。達賴喇嘛並班禪曾差堪布赴京叩喜。蒙皇上降旨。班禪洛布藏曲吉甲勒參。達賴喇嘛阿旺洛布藏甲木錯二人內。年輕者拜年長者爲師。學習經典。又蒙降旨。班禪並達賴喇嘛二人。每年輪流差堪布赴京進貢一次。自奉旨之後。按年輪流差堪布赴京進貢。直到如今。又第五輩班禪洛布藏夷喜巴勒桑布在時。于康熙五十二年內。蒙派欽差赴藏。賞賜金冊。內註明將札什倫布各廟宇地方賞與班禪管理。不許別人侵占。又于康熙五十二年正月二十二日。蒙賞賜金冊金印。第六輩班禪折布尊洛布藏巴勒丹依喜巴勒桑布。

在時于乾隆三十年十月初四日。蒙文殊菩薩大皇帝差阿思哈大人。並札薩克喇嘛。阿旺巴勒珠三等侍衛前來。賞賜金冊一本。重一百一十三兩。所有金印。係前輩班禪遺流。奉到這樣旨意。又于乾隆四十五年內。蒙賞賜四體字玉冊玉印。今年差赴京堪布。名叫金龍堪布藍占巴。夷喜達爾結。係屬馬的。現年四十五歲。爲此具稟。

九月十九日譯。

查西藏現有世襲公爵二人。札薩克頭等台吉一人。頭等台吉二人。四等台吉一人。內阿里公諾爾布彭楚克于去年病故。伊子承襲時。原敕送部填名。又削去公爵。議給頭等台吉。丹津班珠爾之舊敕送部更換。俱尙未發還外。其餘敕書。謹敬譯漢呈閱。

衛藏通志卷六

寺廟

謹案佛、西方之教也。藏地信佛誠事佛謹。歷數十年。其佛像曰沙迦圖巴、江齊孜格、曼殊舍利、雅滿達噶、德木楚克、騾子天王、瑪哈噶拉、達喇額、可邁達爾、阿玉錫等號。供奉石樓金殿、香燈朝禮。自打箭鑪至後藏七千餘里。寺廟不可勝紀。茲自大小招布達拉、札什倫布至察木多、札雅巴塘、裏塘、打箭鑪著名寺廟。隨地以志焉。

謹案前後藏至打箭鑪各部落寺廟不可勝記。今按布達拉經簿及西域志所載名最著者敘入。

布達拉

唐時藏王曲結

通經典之稱

松贊噶木布

唐書作弄贊贊普

好善信佛。頭頂納瓦塔葉佛。在拉撒地方山上誦旺固

爾經。取名布達拉。爲西藏衆僧俗所瞻仰。每日焚香坐禪入定。不思他往。唐公主同巴勒布王之女名拜木薩。因藏王坐靜。恐有外侮。遂修布達拉官寨城垣。上掛刀鎗。以嚴防禦。其上藏王寢室。與拜木薩寢室。隔絕兩處。頂皆平坦。搭銀橋一道。以通往來。後因藏王莽松作亂。官兵拆毀布達拉。僅存

觀音佛堂一所。嗣經五輩達賴喇嘛掌管佛教。兼管民間事務。修立白寨。又有代辦事務之桑結嘉木磋。修立紅寨。及內外房屋。金殿佛像。相傳重修至今一百四十餘年。其地在北山之陽。五里平坦。突起一峯。高約二里。緣山砌平樓十三層。盤磴而上。其上有金殿三座。光彩耀目。金殿之下。有金塔五座。西殿有宗喀巴手足印。日久不化。爲達拉喇嘛坐牀處。金殿內供奉御容。率衆喇嘛誦經。

招拉筆洞寺

布達拉之西南。竦起一峯。其南山生下爲藏之峯。山北去布達拉里許。中建一塔。下通西行大路。其山上層樓四起。爲有行喇嘛坐靜處。其寺內喇嘛多業岐黃。

大招寺

大唐文武孝德皇帝撰。大蕃神聖贊普。舅甥二主。商議社稷如一統。立大和盟約。永無渝替。神人俱已證知。世世代代。使其稱讚。是以盟文即日留傳之於後也。文武孝德皇帝。與大蕃神聖贊普。締之黎贊。陛下。二聖舅甥。睿哲鴻被。

瞻今永之屯。享矜憫之情。恩覆其無內外。商議叶同。務令萬姓安泰。所恩如一。成久遠大治之績。慈觀同心。以申隣好之義。共成厥美。今燕義二國所守。見管封疆。洮岷之東。屬大唐國界。其塞之西方。是大蕃境土。彼此不爲殺敵。不舉兵革。不相侵謀。封疆。或有猜阻。挺生。間事。訖給以衣糧。放歸。令社稷山川無擾。各敬人神。然舅甥相安之義。不朽。每須通傳。彼此相倚。一任常相往來。兩路漢蕃。臣以將軍谷交馬。其洮岷之東。大唐祇應。清水縣之西。大蕃供應。舅甥親近之禮。使其兩界煙塵不揚。同聞頌德之名。須無驚恐之患。行人情備。鄉土俱安。如始斯樂業之垂恩。萬代則稱美之聲。遍於日月所照矣。蕃於蕃國受安。漢亦漢國受榮。茲乃舍其大業耳。各依此盟誓。永不移易。當三寶及諸賢。並日月星辰之下。其陳刑具爲盟。設此大誓約。如有不依此

誓蕃漢背約破盟者來其殃禍也。倘傾覆以及動陰謀者不在破盟之限。蕃漢君臣並稽古立誓。周細爲文。二君之德萬載稱揚之內。蒙麻人民咸頌矣。

西藏第一番王傳七世至曲結松贊噶木布

唐書作弄贊贊普

迎唐公主。又差頭人倫布噶爾迎巴勒布王鄂

特巴爾郭恰之女拜木薩爲妾。唐公主帶來釋迦牟尼佛像。拜木薩帶來墨居多爾濟佛。白木薩欲修廟宇。藏王擇地興修。唐公主卜算藏地形勢。乃妖女仰面之象。拉撒海子乃妖女心血。是爲海眼。須將海眼填塞。上修廟宇。如蓮花形。將四圍風脈更正。如八寶聯絡。乃得吉祥。藏王遂興工將海子四面用石堆砌。海眼中忽起五色霞光。現出石塔三層。用石拋擊。然後用木接蓋。空隙處鎔銅淋滿。海眼始平。藏王又虔祝神佛。欲將邪氣鎮壓。在昌諸銷囉。倫塔。堆陽四地方接連地脈之處。建寺一百八座。時有龍王現。洋般式樣。用石堆砌。大昭始成。相傳至今。一千八百四十餘年。其地有拉撒。內坐東向西。樓高四層。上有金殿五座。闌干殿宇。皆係銅底溜金。宏敞壯麗。中殿供奉釋迦牟尼佛。乃唐公主自中國鑄請來者。左廊有唐公主。藏王松贊噶木布。巴勒布王女拜木薩之像。其內神佛萬計。中殿供奉萬歲御座。香花然蓋。四季長輝。樓頂東南隅。有拜拉穆殿。神靈顯赫。番敬畏之。內藏上古軍器。鳥鎗長八九尺。至一丈者。與今之九子炮同。弓韋箭袋亦甚長大。大殿內有明萬歷時太監楊英所立碑一座。前壁上繪唐元奘法師求經師弟四人像。門外有唐番和盟碑。高約一丈五尺。寬

約四尺。厚約三尺。兩旁刊有大臣太宰尙書等字跡。並牛僧儒姓名。碑側古柳二株。老幹蟠屈若龍虬。相傳植自唐時云。

小昭寺

大昭寺北半里許。番名喇木契。坐西向東。樓高三層。上有金殿一座。亦頗壯麗。乃唐公主所建。因唐公主悲思中國。故東向其門殿內佛像。名墨珠多爾濟。又有釋迦牟尼佛。彌勒佛諸像。或云塑像內有唐公主肉身。座上書默寂能仁四字。其南卽頗羅柰舊宅。

薩木秧寺

俗稱桑肅寺

拉撒東二日。山南薩木秧地方。藏王曲結松贊噶木布第五世曲結赤松特贊。欲修札瑪爾正桑廟。赴甲噶爾延請班第達擇地。興修未成。復令藏地能習經咒之人。赴甲噶爾請祖師白瑪薩木巴娃。降收妖邪。仿照甲噶爾阿蘭達蘇哩廟宇式修造。三頂四面八方。以象星宿。後有噶瓦拜勒孜覺囉。壘嘉木參等數千人。教化大行。修立十二處大寺。俱安設喇嘛道士誦經。相傳至今。一千四十三年。又舊字內載拉撒東南噶勒丹寺相近。其樓閣經堂佛像。與大小昭相似。內供關聖帝君像。傳云唐以前其方多鬼怪爲害。人民不安。帝君顯聖除之。人始蕃息。士民奉祀。稱尊號曰革塞結波。達賴喇嘛歲至其地講經。

多爾濟札古寺

附近薩木秧寺。在札洋宗山之巔。寺內有洞。高二千餘丈。梯木而上。洞內石蓮花佛座。座前石几。盒內有白土可食。味如糝粳。次日復生。其洞須然火而入。座後有一大海。云作惡之人至此。必失足墮海中。番人畏憚而不敢忽焉。

察木珠寺

俗名昌諸寺

藏王曲結松贊噶木布。修立大昭之時。赴雅爾噶等處。見一小海子。內有妖蛇五首。欲將海水屏乾。上建廟宇。遣覺拉化爲鵬。斬之。海水盡赤。水遂消。乃於其地修建廟宇。供奉桑堆佛十九尊。卽陰陽佛也

其一尊乃不上自成之像。上建五塔以鎮之。又塑佛母伊與科爾洛像、羅金褚旺像、蒼巴洞托爾足像。卽拉穆吹忠護法又修極樂寺、彌勒寺。相傳至今一百四十餘年。

色拉寺

唐古忒語。色金也。拉山也。其山出金。故名。

拉撒北十里色拉山。宗喀巴在色拉曲頂居住之時。觀其地可建廟宇。其弟子甲木慶曲結沙克伽伊喜明時。入中國爲禪師。賜物甚盛。回藏後。宗喀巴令其在色拉建立大寺。所供佛像。係由內地帶

檀香雕刻釋迦佛、十八羅漢、及諸佛像。又修上下札倉。

札倉譯言僧房也。

嘉庚贊仲鍾頂小寺四所。招喇嘛居

住。其寺依山勢建。金殿三座。層樓高聳。達賴喇嘛亦歲至講經。寺中供一降魔鐵杵。長不足二尺。頭如三稜錮。一頭如人頭狀。番語呼爲多爾濟。相傳建寺時。自大西天飛來。其寺堪布珍之。番人必歲一朝供。

布賴蚌寺

俗名別蚌寺

拉撒西二十里。前臨大道。後依山巖。宗喀巴之弟子札木陽曲結札什巴爾丹。在聶烏地方居住之時。夢神人語此地宜修寺院。賜予五千徒衆。並現出無量水泉數處。覺而告其師宗喀巴。乃令修寺。其時卽有聶烏富民那木喀桑布出資布施。修建廟宇。又旺固爾山起出海螺。賜與弟子札木陽曲吉札石巴勒丹。殿宇修像甚盛。其修郭莽洛賽嶺結巴沙谷爾獨瓦得洋阿克巴等七處札倉。乃蒙古西番各土司布爾卡木布等處。凡初出世之呼畢勒罕。及遠近大小喇嘛初學經者。多聚處於此。地有園亭一座。爲達賴喇嘛避暑處。去寺里許。有吹忠殿。乃無妻室者。與他處異。

噶勒丹寺

俗名甘丹寺

拉撒東五十里。噶勒丹山。宗喀巴先在大昭率衆喇嘛。攢昭誦經。然燈。衆喇嘛求立寺院。宗喀巴乃

手舉金剛菩薩云宜在旺固爾山創建遂造大經堂內塑桑堆即陰陽佛德木楚克即安樂佛多爾影佛像又修

沙爾孜江孜二處札倉以供衆喇嘛棲止相傳至今有三百八十餘年其形勢與布達拉略同其經樓佛像幢幡寶蓋華麗與大小昭相似乃宗喀巴坐牀之所示寂於噶勒丹寺彌勒佛前爲黃教發源之地有黃教堪布喇嘛主之

木鹿寺

大昭之北小昭之東樓高四層亦頗壯麗經堂佛像亦甚整齊爲西番僧人習經之所西有經園刊布三乘經文頒行各處

菊噶木寺

俗名菊岡寺

毗連經園樓高三層爲蒙古僧人學經之所

噶瑪霞寺

卽垂仲殿大昭東半里許寺內塑神像猙獰惡煞內居護法乃喇嘛裝束仍娶妻生子世傳其術卽中華之巫類也每月初二十六日下神頭戴金盔上插雞羽高約二三尺穿甲背插小旗五面週身以白哈達結束足穿虎皮靴手執弓刀登坐法壇凡人叩問吉凶託神言判斷禍福出則人從裝束

鬼怪執旗鳴鼓鉞導引之。寺內皆有吹忠。亦有女人爲之者。爲番人所敬信焉。

達隆寺

拉撒北。過鍋噶拉山。一日。寺亦宏麗。喇嘛約千餘。

呼正寺 俗名熱正寺

拉撒東北二日。角子拉上。寺內喇嘛衆多。山徑曲折。鳥獸寂無。如觀之。喇嘛振鐸。俄頃。山禽獐鹿諸類畢集。寺有呼正呼圖克圖掌之。

楚布寺 業朗寺

拉撒北七十里之浪子地方。各有呼圖克圖掌之。紅帽教之宗名噶嗎巴。黑帽教之宗名沙嗎納。明萬歷時入覲。勅賜封號印冊。今製衣鉢者。一名札哇楞布齊。一名革桑楞布齊。

鄂納廟 在拉撒東北 薩木他廟 在拉撒東南 噶爾韃廟 在拉撒西北與沙羽克岡拉山相近

觀音寺 業 碩哩寺 曲水鏡 班古爾曲底寺 江 岡堅喇嘛寺 距札什倫布 協噶爾喇嘛 協噶 第哩浪古寺 日

俄拉寺 由聶拉木赴 達朔寺 擦木 木宗寺 甲木真寺 距濟囉 帕巴寺 濟 羣喀寺 宗 阿拉寺 工寵寺

距宗略
三站

拉了爾寺

湯谷

倫布寺

薩迦寺

江公寺

過薩

岡堅寺

生多喇嘛寺

距札什倫

布一站

鹿古寺

距札什倫

甘勒丹

密交

達拉寺

昔

波多寺

拉

陽八井喇嘛寺

即沙瑪爾巴舊居今改給濟

曲桑寺

楚普寺

浪

箭頭

子

寺
在布賴
寺之下

關帝廟

舊建在札什城之南。欽差駐藏工部尙書和琳重葺廟宇。撰碑文。其辭曰。恭惟我國家撫有區夏。東至朝鮮。西窮大漠。南極于交趾。北抵于庫倫。暨海外西洋諸國。罔不輸職貢。奉正朔。幅幘之廣。千古罕有。舉凡王師所向。靡不誠服。關聖帝君實默佑焉。唐古忒在勝朝。爲烏斯藏。自聖祖仁皇帝時。歸入版圖。駐兵札什城。舊建有帝君廟。靈應異常。僧俗無不敬禮。乾隆辛亥秋。廓爾喀部落惑於逆僧。沙瑪爾巴遊說。潛師侵掠後藏。賊衆我寡。憑高固守。賊屯林中。每夜數驚。自相蹂躪。以爲大兵且至。懼而引去。皇帝赫斯震怒。命大學士忠銳嘉勇公福康安爲大將軍。超勇公海蘭察。四川總督惠齡。爲參贊大臣。統領索倫漢土官兵。聲罪致討。副都統賽尙阿。巴圖魯成德。分率偏師。由聶拉木牽綴賊勢。琳同大學士毅籌畫軍儲。往來策應。大將軍等由濟隴進烏道羊腸。賊人負嵎據險。我兵出奇。

奮勇七戰七捷。直逼賊巢。廓曾舉國懼怖。哀懇乞降。我皇上如天之仁。不忍覆其巢穴。詔許歸誠。自進師至凱旋。凡三越月。固由聖主廟謨廣運。指示機先。大將軍運籌帷幄。靡堅不破。然究屬帝君威靈呵護之所致也。大將軍回藏。度地磨盤山。剏立神祠。以答靈貺。僉議札什城舊廟爲春秋禋祀之所。廢而不葺。良用缺然。爰是琳與制府惠齡捐資庀材。詠吉鳩工。命同知李經文董其役。卑者崇之。隘者拓之。有廡有堂。有嚴有翼。閱月而竣。事神之憑依。於是乎在。蓋國家聲教之所及。無非神威之所訖。自非真氣盤礴。塞乎天地之間。輔翊景運。安能彌綸中外。靈威異彰若此乎。不敏職司邊寄。凡所以整飭戎行。挽回風俗。敢不忱惕惟厲。上報主知。於展謁之次。敬進官吏而勵之曰。帝君有云。心在人中。如日在天上。吾等益當激昂自奮矣。是爲記。

又。

關帝廟

新建於磨盤山頂。乾隆五十七年十月。大學士忠銳嘉勇公福康安撰碑文。其辭曰。乾隆五十有六年秋。廓爾喀自作不靖。侵陵藏界。並搶掠札什倫布廟。皇上赫然震怒。謂衛藏自策零敦多卜殄滅後。隸職方者百餘年。使靳徵調之煩。從移駐班禪。達賴之議。其濟隴。聶拉木等地勢。將盡委之賊。此後受戕者。當不止前後衛藏矣。特賁綸音。福康安爲大將軍。一等公海蘭察四川總督。惠齡爲參贊。

大臣統領勁兵。大張撻伐。大司空和琳飛芻輓粟。專司策應。爲後路聲援。大學士孫士毅復自昌都馳赴西招。協理軍儲。於五十七年夏。由宗喀濟隴整旅。邁進。先是駐軍前藏。徵兵籌餉。謁札什城關帝廟。見其堂皇湫隘。不可以瞻禮。緬神禦災捍患。所以佑我朝者。屢著其孚格。于是度地磨盤山。鳩工庀材。命所司董其役。默禱啓行。洊臨賊境。七戰皆捷。距陽布數十里。廓酋震讐軍威。乞降至。再皇帝鑒其誠款。體上帝好生之德。准納表貢。詔令班師。並御製十全記。頒示臣下。予惟此視師。自進兵以來。山谿險劣。瘴霧毒淫。竟獲履險如坦。不三月而葺績。自非神祐不至此。凱旋之日。廟適落成。與諸公瞻仰殿廡。徘徊俎豆。深感大功速竣。維神之力。而益欣繼自今。前後衛藏之永永無虞也。是爲記。

衛藏永安寺

乾隆六十年。御賜廟名曰衛藏永安。頒四譯字扁額。建在磨盤山之南麓。參贊公海蘭察。巴圖魯等捐資修建。爲濟隴呼圖克圖住錫之所。乾隆五十九年。工竣。欽差駐藏內閣學士兼禮部侍郎和甯撰碑文。其辭曰。文殊皇帝。真天人師。大千普育。法輪護持。阿耨波淨。耆闍雲垂。憬彼廓番。蝸觸坤維。皇帝震怒。乃命麾戈。大將軍福。大司空和。軍籌戰律。秉算靡訛。巴圖魯海。霹靂摧阿。克震克捷。壬子之秋。元戎奏績。虎將陳猷。爰發願力。仰答神庥。布金五千。作廟山陬。載謀載度。濟隴浮屠。鳩工閱歲。

藏厥宏謨。翼翼輝輝。寶像金軀。于萬斯年。永祝皇圖。

雙忠祠

在寵崗。爲傅拉二公建。乾隆十五年。朱爾墨特那木札勒謀逆。二公計誅之。爲其黨所害。乾隆五十八年。大將軍公福康安征勦廓爾喀班師回藏。爲之撰文勒石。其辭曰。雙忠祠在前藏大昭東北。向爲駐藏大臣行署。朱爾墨特那木札爾之難。駐藏大臣傅公。拉公死焉。署亦燬於火。番民感二公之忠烈。因其舊址。請立祠肖像以祀。蓋以二公大有造於衛藏也。傅公諱清。爲康安世父。乾隆十五年。公以都統奉命駐藏。左都御史拉布敦副之。時朱爾墨特那木札爾襲其父頗羅鼐郡王封。專藏事。多不法。公裁抑之。橫如故。公廉其叛逆有跡。密疏請便宜從事。以絕後患。奏入。上以公孤懸絕域。未可輕舉。命都統班第代拉公。將明正其罪。以申國法。旨未至。反謀益亟。廣布私人。凡駐藏大臣一舉動。輒偵邏之。禁郵遞。不得通。潛結準噶爾爲外援。藏中有異己者。將盡誅之。勢且延及達賴喇嘛。爲雄長一方之計。公如坐待其變。事發而公必死。誘而誅之。其羽翼已成。衆寡不敵。而公亦死。均之死也。毋寧變速而禍小。遂與拉公定密計。以十月十三日。告其黨羅卜藏達什曰。召藏王來。有旨令議事。朱爾墨特那木札爾以公勢孤。聞召不之疑。亦不設備。公與拉公登樓待之。止其衆於樓下。隨上者四五人。公見之。顏色不動。如平時。引入臥室。闔戶。急掣佩刀砍之。中項而仆。從者競前以楹擊其

首立斃。羅卜藏達什在室門外。聞格鬪聲。知禍發。扶牕跳越。告其婿第巴喇布坦等。號召賊衆。須臾。鷹至。鎗礮競發。環攻之。牆高而固。不能入。賊乃積薪樓下。烈燄四起。樓焚。賊遂攀援而登。公手刃數賊。身被三傷。力竭。自刎以殉。拉公亦中創死。吁。烈矣哉。夫衛藏距京師萬有餘里。公鎮其地。戍兵寡弱。外不足以制其力。內不足以奪其權。設朱爾墨特那木札爾竟舉兵反。番民性怯懦。勢必舉而從之。以向隸版籍之地。一旦陷賊。即使以身殉。事已無及。勞師糜餉。致貽聖主西顧憂。疇職是土。顧可以一死委其責耶。公獨奮不顧身。毅然定大計。乘其未發。誘而誅之。餘黨雖擾攘。而渠魁既殲。如瓦解冰泮。無能爲難。不旋踵而就縛。盡伏厥辜。公雖死。而全藏以安。國威以振。是非霍光之誘斬樓蘭。所可同日語也。事定。班公及四川總督公策楞至藏。列二公死事狀。上聞。天子震悼。下詔褒嘉。忠烈公與拉公贈一等伯。入賢良祠。昭忠祠。公仍入家祠。從祀。子孫以一等子爵世襲罔替。卹忠錄。庸延及苗裔。嗚呼。公之心。其可慰矣。康安以五十七年奉命督師。進勦廓爾喀。來藏。謁雙忠祠。瞻拜遺像。距公殉節時。蓋四十餘年矣。藏番追念兩公遺澤。歲時奔走。香火不絕。至今猶有能道當時遺事者。惟碑碣缺如。堂廡垣牖。閒有傾圮。爰於班師之日。葺而新之。且恐歲久遺跡或湮。敬書其事。以示後人。其時同殉者。爲主事策塔爾。參將黃元龍。並爲位於廡。以配食。傳曰。能捍大患。則祀之。如公者。番之民。雖百世祀可也。

拉里大寺

拉撒東行一千十里。名拉里山。由山右盤旋而上。山腰有大寺一座。管地方之堪布喇嘛居之。

丹達廟

拉里東行四百八十五里。有雪山。名沙貢拉。山之東麓。有丹達神廟。最稱靈驗。凡過者。必虔誠禱祝。乃得平安。相傳雲南某參軍解餉過閣王碛。餉鞘落雪窖中。身與之俱墜。人無知者。迨春夏雪消。猶僵坐鞘上。土人驚異。遂奉其尸而祀焉。乾隆五十八年四月初九日。奉上諭。福康安奏。此次官兵赴藏。經過丹達山。均無阻滯。山靈助順。請加封號。並頒扁額。丹達山遠在徼外。最爲險峻。風雪不時。自軍興以來。官員兵丁調遣至藏。以及事竣凱旋。均當冬令。經過該處。得以安穩進行。豪無阻滯。實爲神庥佑助。靈應聿昭。宜列在祀典。錫之封號。著封爲昭靈助順山神。該部載入祀典。春秋致祭。並頒去御書扁額。交駐藏大臣。於山下舊建神祠。敬謹懸掛。以答庥應。而示懷柔。該部知道。欽此。御書扁額。教闡遐柔四字。乾隆五十九年。戶部議覆。祭丹達山神。每年春秋二季。共需祭品銀二十一兩。按年先於察木多庫貯臺費銀內墊支備辦。入於鹽茶耗羨項下開銷。咨部立案。乾隆五十七年。欽差戶部尚書和琳懸掛扁額鎮靖利濟四字。乾隆五十八年。大將軍。大學士。忠銳嘉勇公。福康安懸掛扁額。四字。乾隆五十九年。欽差內閣學士。兼禮部侍郎。和甯懸掛神贊。其贊曰。驂騑騁景。

鳳凰高飛，蹇蹇匪躬。之子安歸，節彼丹達。神其憑依，在昔縣賁。浴馬知冤，傷哉雪嶠。羈掛游魂，藏舟千古。齊壽崑崙，石沉星隕。天鑒純忱，忠信篤敬。靈感斯深，典守發省。履道驚心，巍巍示象。馨香既升，得大自在。超最上乘，願施勿畏。勿墜神燈。乾隆五十九年，欽差工部尚書松筠懸掛扁額。峙岫通衢四字。

傾板多廟一座。

丹達東行三百一十里，至傾板多大寺。築土磬石爲城，枕山臨河。內供佛像，其經堂喇嘛第巴居之。

喇貢廟五座。

傾板多東行四百七十里，名喇貢大山，有金剛寺、空沙寺、吉祥庵、大佛寺、雲臨寺。

裏角廟三座。

喇貢東行一百八十里，名裏角塘，有長鳴寺、永定寺、白衣庵。

俄羅橋廟五座。

裏角東行五十五里，名俄羅橋，乃察木多帕克巴拉呼圖克圖坐靜花園，有萬壽寺、雲頂寺、大牟寺、定海寺。

察木多，舊名昌都，亦名喀木，即所謂康也。

俄羅橋東行四十里。名察木多。有江巴林寺。亦名戎空寺。北係山麓。層樓金殿。左右兩河環繞。頗極壯麗。乃帕克巴拉呼圖克圖坐牀之所。又有二呼圖克圖。三呼圖克圖。商卓特巴。率三千喇嘛居之。戎空寺左有大寺。內供奉萬壽無疆御座。令節朔望朝賀。又有普安堂。乃漢人所建講經堂。

龍王廟

包墩

察木多東行一百五十里。包墩。有善化寺、科兒寺、林光寺。

巴貢

包墩東行一百里。名巴貢。有觀音閣。自察木多至於子。多建漢人寺。

乍了

包墩東行三百三十五里。名乍了。有大寺。坐西北。向東南。土城圍繞。有呼圖克圖掌之。其地方事務。俱聽該喇嘛。商卓特巴管理。又有轉經閣。在大寺前。男女定婚嫁。俱於此。

巴塘

乍了東行六百二十里。至南墩。出西藏界。入巴塘界。又東行三百里。至巴塘。有大寺。坐東向西。垣周百餘丈。掌教堪布喇嘛居之。其餘喇嘛築土平房環繞而居。無口糧寺院八十四座。有口糧寺院五

十七座。唯南墩漢人寺。每年七月。巴塘、察木多兩處客民。皆雲集於此。貿易貨物。如內地廟會。
裏塘

巴塘東行五百四十五里。名裏塘。有長吉春科兒寺。大堪布喇嘛居之。管喇嘛三千餘名。又關帝廟。

乃漢人所建。又貯經堂。金剛寺、尼姑庵。均在裏塘工沙寺。在半空沙寺。在上納土寺、麻唐寺。均在桑登寺。在喇

爾那勒吉策巴寺。在上登沙寺。在下工嘴牟寺。在工陽頂寺、巴木補寺。均在薩木配林寺。在鄉立禪寺。在

申角寺。在中喇嘛了。

打箭爐

關帝廟、武侯祠、漢人寺。均在郭將軍廟。蜀漢時人名達。諸葛武侯曾令造箭於此。報國寺。又名喇嘛寺。在爐惠遠

寺。在爐城雍正七年奉勅建。並賜名。其地一名噶遠城。達賴喇嘛曾移居於此。至今由西藏派大堪

布喇嘛往掌之。雍正九年御製惠遠廟碑文。敬編卷首。

高日寺

打箭爐西行一百九十里名東俄洛過大雪山三十里至高日寺乃紅帽堪布所居之寺。

札什倫布寺

拉撒西南去八日即後藏寺名札什倫布乃宗喀巴之大弟子根報敦珠巴所建。即頭輩達
喇嘛其寺背山

臨河殿宇宏敞佛像莊嚴亦甚壯麗乃班禪喇嘛坐牀之所凡學經成者必至此受戒。

薩迦寺

後藏札什倫布境內有薩迦呼圖克圖乃元時帕思巴之後爲紅帽教之宗經簿載育仁菩薩之後人昆貢確嘉卜通達經典看得奔布山風脈佳勝欲創建廟宇向業主降雄固喇娃班第仲喜納密酌克敦三人欲乞售茲地伊三人乃施舍不取價值遂建此廟供諸佛像招僧住持相傳至今七百二十餘年其紅教喇嘛年少時娶妻子至生子後不復再近室家始登法座按輩相傳。

多爾濟帕姆宮

拉撒西行半月羊卓白地方海中有山山巔建寺極宏麗有瀛洲蓬島之勝寺內乃女呼圖克圖多爾濟帕姆所居云北斗之精化生昔第巴薩木結亂藏時化猪遞去藏地呼猪曰帕故名。

娘娘廟

在札什倫布東北

淋噶爾廟

阿克巴札桑廟

推薩木諾爾布淋廟

挾爾孜廟

濟康廟

俱在

札什
倫布

關帝廟

在札什倫布
營官寨前

乾隆五十八年。欽差工部尚書和琳撰碑文曰。札什倫布爲歷代班禪喇嘛焚修之所。旁有小山。至聳峙。爲營官寨。自入版圖以後。卽其地建帝君廟。歷昭靈應。漢番僧俗奉祀惟謹。乾隆五十六年秋。廓爾喀惑於逆僧沙瑪爾巴邪說。覬覦札什倫布財物。潛兵掩至。番民僧俗迫於變起倉猝。皆烏獸散。都司徐南鵬僅率綠營弁兵七八十人。據營官寨以當其衝。賊兵環之數市。斷汲水道。仰攻八晝夜。我兵固志死守。閒發矢石。無不奇中。掘地十餘丈。飛泉湧出。歡聲動地。士氣百倍。賊隨稍卻。屯聚柳林中。以爲久計。忽夜驚自相戕殺。懼而引去。行至通拉山。風雪驟作。賊衆僵斃。不可勝計。咸以爲帝君靈應所致。明年七月。大將軍、大學士、忠銳嘉勇公福康安奉命撻伐。七戰七捷。距陽布不數舍。賊酋舉國震懾。遣其大頭目詣軍營輸納表貢。願奉約束。永爲不侵不叛之臣。哀懇再四。大將軍具狀以聞。詔釋弗誅。九月。班師。大功告蒞。蓋惟聖主統馭四夷。無思不服。亦惟帝君神功赫奕。歷相我國家。師行數萬里外。奏凱若斯之速也。琳奉命總督糧餉。往來策應。凱旋後。旣修札什城舊祠。以誌靈貺。緬維後藏爲神蹟昭著之所。堂皇湫隘。竊用廝馬。爰命所司董其役。鳩工庀材。計費千餘緡。向

之因陋就簡者均已肅然改觀落成日謹敍顛末而爲之記從而銘曰惟神配天惟皇建極佐我國家是憑是式威靈顯昭不可思憶禘祀蒸嘗報功崇德垣墉既新丹雘既飾殿宇耽耽門廡翼翼於萬斯年獲此西域

御前侍衛正藍旗滿洲副都統和隆武巴圖魯領隊大臣額勒登保

乾清門侍衛正黃旗蒙古副都統布隆巴圖魯領隊大臣岱森保

乾清門侍衛副都統職銜西里巴圖魯領隊大臣珠爾杭阿

乾清門二等侍衛伊昌阿巴圖魯承德

多托禮巴圖魯阿尼雅布

哈西巴巴圖魯安祿

雜勒丹巴巴圖魯桑吉斯塔爾

通政使司副使加三品卿銜軍機處行走方維甸

理藩院柔遠清吏司員外郎軍機處行走長齡

戶部堂主事兼貴州陝西清吏司候補員外郎軍機處行走巴哈布

內閣侍讀軍機處行走楊揆

鑲黃旗蒙古副都統、法福禮巴圖魯、領隊大臣烏什哈達。

鑲藍旗蒙古副都統、西郎阿巴圖魯、領隊大臣德楞泰。

頭等侍衛、索倫總管、加副都統職銜、能登額巴圖魯、領隊阿木勒塔。

頭等侍衛、加副都統職銜、額騰額巴圖魯、果爾海。

頭等侍衛、努塔巴圖魯、五紹。

楊桑阿巴圖魯、顏太。

頭等侍衛、蒙興保。

二等侍衛、德吉巴圖魯、納丹保。

額爾克巴圖魯、薩甯阿。

錫特洪巴圖魯、阿哈保。

呼東阿巴圖魯、定西館。

額騰伊巴圖魯、克興額。

二等侍衛、德勒琿、阿納保。

德勒克依、阿吉。

烏勒呼訥。色玉慎。

德全。籌保。

巴哈。博依保。

三等侍衛、綳僧額巴圖魯吹札布。

喀勒崇伊巴圖魯達爾精阿。

託莫爾渾巴圖魯多隆武。

碩隆武巴圖魯捫撒木保。

色莫爾亨巴圖魯綸布春。

三等侍衛傅昇。穆克登布。

噶爾第。溫保。

諾託保。富罕。

額勒金泰。定札。

富永。巴蘭。

莫爾渾保。富蘭。

藍翎侍衛折克

三布鼎

阿達

札保

化品

亨昆

諾穆起

噶拉

綽倫保

鄂爾哲依

色克通阿

富僧德

江鼎

烏福納

克色保

溫春

烏勒哈爾

雙福

巴顏察

明喜

寶班

莫新

賓德爾

格勒登徹

德繼特

花山保

舒靈阿

甘肅永固協副將烏爾固勒濟巴圖魯達音泰。

四川懋功協副將世襲一等子王承勳。

維州協副將五十一。

甘肅甯夏府知府隆興。

四川雅州府知府姚令儀。

甯遠府知府李憲宜。

前任龍安府知府重光。

甘肅甘州城守營參將劉懷仁。

四川漳臘營參將呂玫。

越嶲營參將徐南鵬。

陝甘督標前營遊擊楊宗澤。

陝西鞏昌營遊擊雷仁。

四川督標左營遊擊長春。

提標左營遊擊王錫章。

提標右營遊擊蒲益章

峨邊營遊擊李芝榮

綏靖營遊擊胡尚賢

崇化營遊擊額爾亨額

川北鎮標中營遊擊烏爾公阿

左營遊擊王威甯

楞格

富體

前鋒章京哈布齊顯巴圖魯七十五

護軍參領覺多觀巴圖魯額勒金保

葉布懇額巴圖魯彥吉保

吉勒彰阿

副護軍參領常善

前鋒侍衛察靈阿

委護軍參領德通

雅爾哈善

前鋒校索多巴

特依順保

武章阿

親軍校哲爾金保。和成額。台斐音阿。

護軍校噶塔鼎。音德。墨爾根額。

體布克蘇。巴桑。

甘肅布政使司布政使景安。

四川按察使司按察使林儁。

松茂兵備道倭什布。

前任福建延建邵道、四川候補道承勳。

四川北鎮總兵官朱射斗。

重慶鎮總兵官、堅勇巴圖魯袁國璜。

松潘鎮總兵官諸神保。

建昌鎮總兵官、奮圖里巴圖魯穆克登阿。

川北鎮總兵官彭承堯。

松潘鎮標中營遊擊張志林。

建昌鎮標中營遊擊什格。

左營遊擊谷廷棟。

會鹽營遊擊德勝保。

靖遠營遊擊七格。

直隸石柱廳同知湯健業。

順慶府同知范栩。

候補同知李經文。

雷坡通判蔡廷保。

順慶府通判蔡廷弼。

候補通判楊開泰。

綿州直隸州知州施鑑。

忠州直隸州知州吉興。

巴州知州常發祥。

合州知州劉印全。

湖北宜昌府興山縣知縣鄭人慶。

四川成都府成都縣知縣周明德。

雙流縣知縣鍾逢太。

灌縣知縣徐鼎。

保甯府通江縣知縣鍾蟠雲。

重慶府巴縣知縣吳桂。

瀘州合江縣知縣張天爵。

潼川府中江縣知縣毛大瀛。

樂至縣知縣魏守曾。

嘉定府峨嵋縣知縣王贊武。

夾江縣知縣谷暄。

綿州安縣知縣黃爲琳。

重慶府綦江縣知縣常天佑。

原任資州資陽縣知縣張熙廣。

資州井研縣知縣湛夢蛟。

夔州府奉節縣知縣沈達。

原任達州東鄉縣知縣蔣曾煌。

候補知縣張楷。

馬敦詩。

監修同知李經文。

把總趙國泰。

單大雄。

右銜名原書載在詩文類查西藏公爵台吉各勅覆呈之後。今詩文類已刪。再三展讀。因悟末幅監修同知李經文一人。曾見於前札什城關帝廟碑。云命同知李經文董其役。董役。卽監修也。是此銜名可定爲札什城關帝廟碑陰人名無疑。然不敢徑入。今附在寺廟門之後。



衛藏通志卷七

番目

謹案衛藏番目向例惟辦事之噶布倫暨管兵之戴琿等係由駐藏大臣擬定正陪請旨補放其餘管轄地方之營官職掌事務之第巴等俱聽商上自行揀用自乾隆五十七年議定章程並賞給頂帶分隸職司俱由駐藏大臣主持陞調其品級考銓選法實與內地官階無異謹查明編纂以昭遵守

乾隆五十七年十一月大學士公福康安大學士孫士毅工部尙書和琳四川總督惠齡等具奏籌議衛藏章程內開一藏內大小番目缺出應行定立等級統歸駐藏大臣會同達賴喇嘛揀放也查噶布倫戴琿等向雖由駐藏大臣具奏其餘商上仔琿商卓特巴業爾倉巴協爾幫希約第巴朗仔轄密本第巴噶廈中譯小中譯卓尼爾各察落大小營官係噶布倫等酌擬數人由達賴喇嘛挑定駐藏大臣並不過問大缺營官尙由達賴喇嘛與駐藏大臣發給執照小缺營官並無駐藏大臣給照之例是以向來大小番目遷轉補放毫無等級卽如商卓特巴營官等缺出或於布達拉商上噶

廈公所當差之人挑補。或以並未當差之人。閒散人等放補。至噶布倫之缺。本應以戴琿陞補。或有經由大族子弟補放者。戴琿之缺。本應以營官陞補。亦有以戴琿年齒幼小之子弟補放者。雜亂參差不成體制。甚或營求賄囑。其弊無窮。查噶布倫等辦理一切事務。戴琿管理番兵。商上仔琿。商卓特巴。係總司出納。以上各缺。尤關緊要。不可越次補放。啓躡等倖進之弊。卽大缺邊缺營官。管理地方番民事務較繁。亦不應以未經歷練之人充補。今請核定品級層次。遇有噶布倫缺出。於戴琿及商卓特巴。仔琿內擇其才具優長者。著有勞績者。駐藏大臣會同達賴喇嘛揀選二員。擬定正陪。奏請補用。戴琿缺出。先儘新設管領番兵之如琿內揀選。如一時不得其人。再以邊缺營官內揀選。亦會同達賴喇嘛。擬定正陪二員。具奏請補。候旨遵行。不得仍前舊習。率用本不管兵之番目。致誤操防。商上仔琿。商卓特巴缺出。以管放衆番目口糧之業爾倉巴。管理刑名之協爾幫。噶廈辦事之大中譯。及濟仲喇嘛陞補。其業爾倉巴。協爾幫缺出。以管理布達拉一帶番民希約第巴。管理拉撒番民之朗仔轄密本。管達賴喇嘛馬廠之達本陞補。其希約第巴。密本缺出。以大缺邊缺營官調補。及噶廈卓尼爾陞補。查業爾倉。希約第巴兩項內有喇嘛者。亦准挑選喇嘛補用。大中譯缺出。以小中譯。噶廈卓尼爾陞補。大缺營官缺出。以小缺營官調補。及小中譯補放。其管兵甲琿。亦准調補。邊缺小官。惟小缺各營官。始准於東科爾及喇嘛內揀選補用。所有營官缺分。應行詳悉查明大缺。邊缺。小

缺。寫立冊檔存案。以便遵守。其喇嘛補放營官者。多係達賴喇嘛隨侍之人。因其勤勞年久。不能遠離左右。酌量派管地方。藉資養贍。雖難一槩禁絕。然亦須由駐藏大臣另派妥幹之員前往。該喇嘛營官不得私行派人前往。致滋弊端。噶廈小中譯。卓尼爾雖係小番目。隨同噶布倫辦理事務。亦關緊要。應揀選東科爾心地明敏者挑補。以上各缺。均由駐藏大臣會同達賴喇嘛挑選。如達賴喇嘛徇私不公。准駐藏大臣駁正。秉公揀補。除噶布倫、戴琿奏明補用外。其餘若一一請旨。不免煩瑣。應請由駐藏大臣會同達賴喇嘛。給發清漢字番字印照爲據。所有噶布倫、戴琿以下管事各頭目。管地方各營官。均係按等補放。已足杜絕弊端。此外如管門、管草、管糶糶、管帳房、管牛羊廠頭人等。均無關緊要。應聽達賴喇嘛自行揀補。至札什倫布管事者。皆係喇嘛向來陞補調轉。亦無等級。嗣後商卓特巴缺出。以歲琿喇嘛、森本喇嘛陞補。歲琿缺出。以濟仲喇嘛陞補。森本缺出。以傳事卓尼爾陞補。不准越次補放。至札什倫布所屬寨落較少。並無邊界要緊之缺。俱仍照向例挑補。所有後藏之商卓特巴、歲琿、森本各大缺。及管地方營官。均照前藏之例。由駐藏大臣會同班禪額爾德尼補放給照。其餘各缺。不過管茶葉柴草等事。極爲瑣屑。俱非緊要。應聽班禪額爾德尼自行補放。如此明定等差。秉公拔補。以次陞轉。庶大小番目皆能得人。營求賄囑之弊。自可不杜自絕。

十二月。又具奏邊界營官向俱用庸劣營官充補。是以辦理均未妥協。嗣後應揀選妥幹之員補放。

並應照內地邊俸之例酌定年限陞擢以示鼓勵也。查邊界地方與外番接壤約束番民稽查出入最關緊要必須精明強幹之員方足勝任向來稍能辦事營官因邊界氣惡劣冰雪較早皆願在前藏當差憚於遠涉將冗關無能者濫行派往以致辦理諸事每多弊竇嗣後補放邊缺營官於小缺營官及管兵之甲瑋番目內擇其幹練者調補如果到任三年辦理妥善駕馭得宜即行更換調回記名以戴瑋等缺陞用倘有辦理不善之處立即革退不可稍事姑容如此懲勸有方番目皆知奮勉亦永資綏靖矣一嚴禁襲充番目之弊以勵人材也查西藏世家子弟稱爲東科爾凡遇挑取大小番目必於東科爾中通書算者補放其餘番民中卽有妥幹之人並無進身之路間或拔補定瑋小頭目亦不能再有陞轉雖番民積習相沿悉皆推重世家各安本分尙無觖望而若輩以門第相高彼此接引躡等超遷勢將無所底止臣等查核東科爾子弟不下數千人勢難一時更張舊制轉致人心未協前已酌定章程如充當兵丁之番民果能奮勇出力技藝嫻熟卽非東科爾出身亦准由定瑋游擢至戴瑋其餘辦事之番目等仍於東科爾內揀其端謹歷練之人按等補用但不准襲充伊祖父職分以致冒濫過甚卽按取小中譯卓克爾小缺營官等番目亦須年至十八歲以上方准當差不得以幼小之人應名充數致滋冒濫

衛藏通志卷八

兵制

原目作番兵

謹案。唐古忒番兵。向來分派各寨農民。有事則調集爲伍。旣無統率。又少操嫻。雖有數萬之名。僅爲虛設。自乾隆五十七年定議額。設差操。與註防綠營兵丁一體訓練。洵足爲衛藏保障也。謹照原議編纂。以重巡防。

乾隆五十七年十一月。大學士公福康安等會奏。爲酌定唐古忒番兵訓練事宜。縷陳條例。恭請聖訓事。一。唐古忒兵丁分設前後藏地方。應酌定數目。以肅兵制也。查唐古忒番兵原設有五千一百六十五名之數。其實兵民不分。係按各寨番民。定以派兵數目。並非額設番兵可比。戴琫平日無兵可管。遇事調遣。祇在各寨抽派。與派烏拉人夫無異。充數應名。多不使用軍器。以猝然調集之番民。責令打仗禦賊。無怪其毫無紀律。怯懦不堪。今請額定數目。於前後藏各設番兵一千名。此外衝途要隘之定日。江孜地方。安設番兵各五百名。共額設三千名實兵。此項番兵。卽在安設地方。就近挑補。以省調戍之繁。前藏原設戴琫二人。卽令各管新設兵五百名。後藏原設戴琫三人。以二人駐劄。

後藏以一人分駐定日。均各管該處新設兵五百名。再添戴琫一名。分駐江孜。亦管新設兵五百名。各處俱有原設新設之駐防將備弁兵。卽令督率管束。教演技藝。前藏番兵。歸遊擊統轄。後藏及江孜。定日番兵。歸後藏都司統轄。所有挑補番兵。造具花名清冊。交該管遊擊都司。及戴琫稽查。外。仍另繕名冊二本。一呈駐藏大臣衙門。一交噶廈公所。遇有事故。核實挑補。隨時呈報。以資考察。一。核定管兵番目。以專責成也。查藏內管兵番目。不但戴琫一員。徒爲虛設。卽戴琫以下之如琫。甲琫。定琫等頭目。亦祇空有其名。無裨實用。每遇出兵。另派第巴數人管領。其頭目兵丁。彼此各不相識。安望其協力齊心。奮勇出力。今於原設戴琫五名外。添設戴琫一名。自應仍照舊制。設立大小番目。逐層管束。於戴琫之下。設立如琫十二名。每名管兵二百五十名。如琫之下。設立甲琫二十四名。每名管兵一百二十五名。甲琫之下。設立定琫一百二十名。每名管兵二十五名。與綠營兵目相似。以上大小番目。俱由駐藏大臣會同達賴喇嘛揀選。年力精壯之人充補。發給委牌。倘敢虛應故事。廢弛軍律。卽行革退。並將本管番目從嚴懲治。至戴琫之缺。向俱由管官陞補。亦有戴琫子弟及東科爾徑行補放者。充補既無等級。人皆不知勸勵。嗣後總應按照等差。遇有戴琫缺出。卽以如琫拔補。其餘各缺。相擇技藝嫻熟。操防認真者。以次遞陞。其有世家東科爾陞轉。俱屬過優。不由東科爾出身者。拔至定琫而止。嗣後東科爾情願充當番兵及定琫兵目者。准其充伍。按次陞用。不准躡等超

越番兵中如有材技出衆之人。不但拔補定率。仍一體按次陞擢至戴率。如內地營制。果有出色兵丁。即可由行伍出身。以次擢用至提鎮。番兵亦當仿照此例。不得以非東科爾世家。阻其上進之路。如此。定立營制。明示勸懲。庶可武備修明。人知奮勵。一唐古忒番兵及管兵番目。應分別酌給錢糧。口糧以資養贍也。查藏內調派番兵。從不給與口糧。卽出兵之時。亦不免其徭役。番民被調後。自行備帶口糧前往。糧盡而逃。勢所必至。此次調派番兵。經鄂輝奏明。令商上給與口糧。雖該兵積習相沿。間有逃逸。而臣福康安派守後路熱索橋等處番兵。及成德帶往聶拉木番兵。駐劄數月。逃者甚少。固由嚴行約束。亦緣口食有資。是唐古忒兵非不可振作。茲蒙訓示。以旣用其力。若不給與口糧。自必愈生退縮。令商上給與口糧。如須添補。卽於陽八井沙瑪爾巴家資田產內酌量撥給。添補口糧。並將廓爾喀繳出札什倫布銀兩。留給防兵。今旣不設官兵。卽可爲添補番兵之用。仰見聖主體恤仁慈。昭垂經制。實屬法良意美。應請將此項額設番兵三千名。每年每名給與青稞二石五斗。遇有征調。再照征兵之例。每名每日商上支給糴粃一觔。每年口糧共需青稞七千五百石。所有此項青稞。平價採買。須銀一萬數千兩。原應前後藏商上給與。但商上除每年額用外。少有贏餘。不能支給。自應遵旨於沙瑪爾巴莊田中所出青稞內撥給。而核沙瑪爾巴莊田稞麥爲數。亦有不敷。現據丹津班珠爾之子呈繳歸公莊田五處。又有仲巴田地四塊。合之沙瑪爾巴莊田。每年統共收青稞

三千一百七十石。所少青稞四千三百二十餘石。祇須於廓爾喀交出札什倫布銀兩。及沙瑪爾巴各物變價內酌撥銀兩。作爲開墾地畝之費。耕種卽敷支給。如此辦理。各兵既不至枵腹從事。而以各處歸公之莊田銀兩。爲唐古忒兵丁口食之用。天朝並不利其所有。既可贍給兵食。兼可折服番民。於事實爲兩得。所有番民挑定額兵者。俱由達賴喇嘛發給執照。免其一家充當烏拉徭役。以示體恤。如有事故革退。仍將執照繳回。至月餉一項。若照屯兵之例。每名每月給銀五錢。計算三千名番兵。每年卽需銀一萬九千兩。達賴喇嘛商上。及大招庫內布施較少。每年攢招及念經賞項。卽需銀十一萬兩有零。此雖無益之費。但藏內習俗信佛。亦不便徑爾裁減。再加以一切日用置買物價。核算出入。實少贏餘。不能再給番兵月餉。況此等番兵。前此從無給以養贍之事。今既每名每年給青稞二石五斗。免其徭役。又復給以糶糶。較之從前一無所得。相去懸殊。卽不給以月餉。已覺欣喜過望。斷不敢再萌奢望。惟管兵大小番目。自當酌予養贍。俾資辦公。除原設戴琫五名。例各給莊田一分。新設戴琫一名。亦令達賴喇嘛照例撥給莊田一處。毋庸再給錢糧外。其如琫番目。照川省馬兵月餉米折之例。每名每年酌給銀三十六兩。甲琫照戰兵之例。每名每年酌給銀二十兩。定琫照守兵之例。每名每年酌給銀十四兩八錢。共需銀二千六百零八兩。爲數無多。卽由前藏商上支發。此項銀兩。令商上於春秋兩季備文送交駐藏大臣衙門。轉發該管將備。會同戴琫等。傳齊番目支

領。如有侵漁剋扣。一經查出。卽行嚴參治罪。其番兵應支青稞。亦分兩季。令該管將備會同戴琫等。按名散給。一、唐古忒兵丁。應給與軍器火藥。認真操演。明示賞罰。以肅軍紀也。查額設唐古忒兵丁。業已議給口糧。並免其徭役。卽與官兵無異。自當遵旨常川訓練。並令各處駐防將備。就近督同大小番目。按期認真教演。駐藏大臣每於巡查之便。親爲較閱。練習純熟者。酌加獎賞。並將該管之番目記名陞擢。如有技藝生疎者。嚴行責懲。屢教不悛。卽予斥革。番目等亦分別責降示懲。駐防將備。俱以所管番兵優劣。由駐藏大臣分別等第。於年班滿時咨部。優等者。咨送本省將軍。總督。提督。准予保題。仍照舊例陞用。次等者。祇准咨部議敘。毋庸陞用。劣等者。卽行參革。賞罰旣明。軍紀自昭。整肅汛防。可資得力。至向來調派番兵器械鉛火。皆令自備。本屬不成事體。今已設立額兵三千名。每一千名。定以五分鳥鎗。三分弓箭。二分刀矛。將查鈔沙瑪爾巴等家產內器械分給。如有不敷。查向來前後藏大小寺廟中收存較多。俱係番民受戒所繳。應擇其堅利者。商上略如修整。按名分給。所需弓箭。查番民習射者甚多。俱用木弓竹箭。弓力頗勁。尙堪使用。製辦亦屬省便。查沙瑪爾巴贖產內。除每年青稞支給番兵外。所餘牛廠徵收酥油。尙可值銀五百五十餘兩。足敷將來製辦弓箭之用。操演所需之鉛丸火藥。查商上每年差人赴工布製辦火藥。邊壩等處。有例交商上鉛筋存貯。布達拉本屬無用。應卽將每年商上所收之鉛彈火藥。發給番兵。以重操防。一、濟隴聶拉木等處。

邊界毋庸另派番兵駐守也。查從前訓練章程祇係託諸空言並未詳定規制。今廓爾喀經官兵大加懲創之後。革心革面。悔罪投誠。斷不虞再有反覆。臣等查看情形。共同酌議。現在定日。江孜爲各邊界來藏要路。已於各該處酌設備弁兵丁。稽查出入。又於每處各額設唐古忒兵共五百名。隨同操演。果能實力奉行。數年之後。漸成勁旅。自足懾服番夷。所有各邊界以及札木地方。竟無庸安設番兵防守。一嚴禁將備弁兵欺凌番兵。並役占番兵之弊。以實營伍也。竊臣前奉諭旨。令臣惠齡慎選出色頭等員弁。派駐西藏。並准駐藏大臣驗看。駁換。務使派駐官員。與唐古忒兵丁聯爲一體。實爲永靖邊隅之道。現在應換將備。臣等卽於隨征滿漢營員內。挑選充補。嗣後換前後藏及定日。江孜官員兵丁。總令四川總督遵旨揀選出色頭等員弁。派來駐藏。不得以平庸之員充數。駐藏大臣亦當公同驗看。不得稍有徇隱。如有營私舞弊。欺凌唐古忒兵丁等事。令戴琫等稟知駐藏大臣。隨時嚴辦。設該戴琫等操防怠惰。苦累番民。亦令將備等稟明究辦。如此互相鈐制。庶彼此各知顧忌。不致徇私執法。日久弊生。至新設之番兵三千名。俱係定額實數。該管將備及戴琫等不得擅行占役。若於例外私令跟隨服役。轉致差防乏人。一經查出。卽行從嚴治罪。

又具奏。臣等籌議在邊界設兵控禦。或於各臺駐藏換班兵內。以及打箭鑪以外臺站官兵。量爲抽撥。聖訓周詳。無微不至。惟是藏地向來設有汛防。其外番人等。往來自便。毫無稽查。實屬不成事體。

現在扼要總路。共有兩處。一係江孜地方。與定結、帕克哩、噶爾達相通。爲布魯克巴、哲孟雄、宗木等處部落來藏要路。且自江孜至薩迦溝行走。又可繞往聶拉木一帶邊界。一係定日地方。爲聶拉木、濟隴、絨轄要路。又可通往薩喀等處。途逕紛歧。惟定日、江孜兩處。爲各部落來藏咽喉。必經之路。應於江孜添設一汛。派守備一員。外委一員。帶兵三十名駐劄。又於定日添設一汛。派守備一員。把總一員。外委一員。帶兵四十名駐劄。所有添設巡查官弁兵丁。應遵旨於藏內及臺站兵丁內抽撥。查前藏駐劄遊擊一員。守備一員。千總二員。把總三員。外委五員。兵四百五十五名。後藏駐劄都司一員。外委一員。兵一百五十名。打箭鑪以外。共設遊擊一員。都司一員。守備三員。千總二員。把總七員。外委九員。兵八百三十二名。應於東臺站內。查無夾壩出沒之地。及後藏兵丁內。尙可酌量抽撥。臣等公同籌議。擬於察木多抽撥兵四十名。拉里抽撥十名。後藏抽撥十名。以上共抽撥兵六十名。應得之項。俱照西藏防兵定例支給。其應撥調之守備二員。把總一員。外委二員。照例由川省派出。所有官員兵丁。俱於現在隨征官兵內。挑派前往。仍照前後藏駐防之例。班滿更換。所需房屋。查明於定日、江孜營官寨之旁。各撥數十間。用資棲止。毋庸動項添蓋。至藏內不必另議增添。統交駐藏大臣督率將弁。勤加操演。新添之定日、江孜汛兵。亦卽於駐藏大臣巡查之便。就近查驗操防。以肅營伍等因。經軍機大臣議覆具奏。奉硃批。依議。欽此。

又會奏章程內開。一、駐藏大臣每年應親身巡查邊境。以重地方也。查駐藏大臣同在前藏。其駐劄相近之處。尚易稽查。而前藏迤西。直至邊界一帶。地方遼闊。耳目難周。後藏江孜。定日。又有新設番兵。與該二汛綠營官兵。均應駐藏大臣親加較閱。核其勤惰。以示勸懲。濟隴。聶拉木等處邊界。現已定立界址。亦須周徧巡查。方可諳習情形。遇事庶有把握。本擬駐藏大臣二人。按季輪流前往。但藏地入夏以後。農事正忙。甫交冬令。冰雪已盛。且邊界距前藏甚遠。往返約需兩月有餘。若駐藏大臣四季輪往。未免諸多窒礙。應請於春秋兩季。奏明輪流前往後藏。巡視邊界。順便操演番兵。經過地方。如有駐防官弁等苦累兵丁番民者。准其呈控。駐藏大臣隨地查辦懲治。至駐藏大臣所用烏拉人夫。俱令自行給價。不得擾累番民。以示體卹。一、駐藏大臣衙門及文武各員。酌定聽差兵丁數目。以實操防也。查西藏戍兵。原因鎮守地方而設。若大臣官員等多挑兵丁使喚。必致操演乏人。殊屬不成事體。此等應差兵丁。從前原無定額。今將各處應差兵丁。遵旨再加裁減。庶在藏兵丁皆歸實用。不致有名無實。應請嗣後駐藏大臣衙門應差兵丁。每處三十名。遊擊八名。都司六名。守備二員。每員四名。駐藏司員四名。筆帖式二名。千總把總每員一名。前藏糧員酌定看庫兵丁八名。其新設之後藏文員。毋庸給與統計。應差兵丁。不過百餘名而止。每遇操演日朝。仍著一體操演。毋許藉口應差。致有曠廢。如此。則營伍制度。愈昭整肅。等因。經軍機大臣議覆。具奏。奉硃批。依議。欽此。

十二月。又會奏章程。內開。一。西藏官兵所需火藥。應就本地配造。以節糜費也。查駐藏官兵每年操演。共需火藥二千餘觔。向由內地各營配造。運送來藏。雖工料自有定價。而打箭爐運至前藏。需用腳價較多。經過番地。亦不免有偷竊之弊。臣福康安到藏時。查得工布地方產礮布達拉現存火藥。卽係該處配造。隨卽差弁前往製造。曾經奏明。將來火藥。如藏地可以就近製辦。卽不必由川省遠解來藏。致費腳價。茲查工布製造火藥。每百觔共價銀二十三兩有零。所用工料。雖較內地昂貴。而所用腳價。較之內地運來。節省至三十餘倍之多。兩相比較。仍係在藏配製。大有節省。所有軍需案內運來火藥。已到西藏者。除軍營用去外。尙有餘存。現在飭查觔數。令各糧員分運前後藏。擇高燥地方收貯。儘足供數年操演之用。尙可毋庸配製。俟將現存火藥。將次用竣。祇數兩年備用之時。再行在藏配造。若由駐藏遊擊派人前往工布。恐所遣之人未妥。或致擾累番民。並慮有私造透漏之弊。應核定每年操演火藥數目。由駐藏大臣衙門發給印票。交噶布倫差派誠實番目。前赴工布地方製造。解送來藏。至藏地產鉛甚少。現有軍營存積鉛丸。堪以應用。俟將次用完時。再由川省運解。操演火繩。亦照向例。由川省運解。又內地解來弓箭。除軍營應用外。亦有存餘。應並留存前後藏。撥給官兵。作爲操防之用。又後藏向無礮位。現於臣福康安進兵時。所鑄銅礮十三尊內。撥給二尊。令於操演時。試演準頭。其餘俱交布達拉存貯等因。具奏。奉硃批。諸凡皆妥。欽此。

五十八年四月工部尙書和琳副都統成德具奏爲前藏新設番兵挑選足額一律操演並赴後藏較閱各緣由恭摺奏聞事竊_臣等奏請添設唐古忒兵丁三千名分設前後藏定日江孜等處駐防前經軍機大臣議奏奉旨依議欽此欽遵在案查藏中舊例一切兵役總係按戶口分派番民愚蠢若不將皇上格外恩施令商上給與口糧及免其徭役如有人材出衆之人一體按次陞拔之處明白曉諭番民等必不能踴躍從事是以_臣等逐條頒發告示遍懸村落去後一月之間紛紛投首情願充當兵丁者甚多茲據前藏遊擊逐一揀選年富力強者一千名造具花名清冊呈報_臣等公同點驗俱屬年輕壯健堪以充伍且各番兵皆自備有烏鎗弓箭刀矛雖與綠營樣式不一但番民習用既慣自可毋庸更換以節糜費今照奏定五分烏鎗三分弓箭二分刀矛之例令與駐藏兵丁一齊操演_臣等頻加驗閱已覺漸次可觀現在選派綠營熟手數名作爲教習每日試演_臣等察其熟習者酌加賞賚生疎者量予責懲再過數月可望均成勁旅_臣等伏思唐古忒兵民向無分別今新挑額設之兵常川操練卽與綠營兵丁無異若與番民無有區別誠恐日久復有逃匿等事兵民雜處難以稽查因趁立法之初諭令鬚頭番兵無不樂從目下皆已鬚髮再查綠營例有號衣號帽旗幟等件所以肅觀瞻而昭區別今唐古忒兵民裝束如一未爲妥協如爲之另製號衣號帽所費未免過多莫如因地制宜衣帽仍照唐古忒式樣擬令烏鎗兵穿紅褐背心弓箭兵穿白褐背心刀矛

兵穿白褐紅邊背心。各書番兵二字。以爲分別。計所需紅白褐物價無多。臣和琳現在已於養廉內照數捐辦。再後藏及江孜定日。應設番兵二千名。據都司守備等呈稟。已挑有十分之七。均可足額等語。查新定章程。駐藏大臣於春秋二季輪流前往閱邊。察看設立鄂博。順道較閱營伍。在案。今臣成德現無別事。應卽起程。前赴各邊界。巡查鄂博。點驗江孜定日新挑番兵。統俟。臣成德查明。另行具奏。再據各營官具稟。濟甯。聶拉木官寨陸續興修。已有十之七八。臣成德巡查之便。應卽逐一履勘。務使堅固完善。以期經久。等因具奏。奉硃批。諸凡皆妥。知道了。欽此。

六日。又會奏。爲查閱後藏各邊界新設番兵。及履勘鄂博情形。臣成德前與和琳通盤計議。江孜爲前後藏往來通衢。新設漢官番兵駐防。足資稽查。毋庸設卡。惟定日地方遼闊。爲聶拉木宗喀。絨轄三處總匯之地。實爲緊要。查所通絨轄之小路。轄爾多。通宗喀之小路。擦木達。杏嶺。通聶拉木之小路。古喇噶。木炯。並宗喀。共計五處。均爲要隘。每處設定琫一名。番兵二十五名。卽於定日現設番兵五百名內。就近派撥安設。似於聲勢更爲聯絡。亦不妨其隨時操演。臣於派撥後。量加獎賞。隨赴交界處所。逐一挨查。被兵後。新修察落。均已完竣。尙屬堅固。足資棲止守禦。各邊界外所立鄂博。亦俱堆立齊整。等因具奏。奉硃批。欣慰覽之。欽此。

七月。又會奏。爲查閱帕克哩。定結各卡隘情形。查噶爾達地方卡隘二處。一名撒迦嶺。一名春堆。此

二處均與廓爾喀相通。又定結地方卡隘一處。地名擢拉山。此處與廓爾喀、哲孟雄兩路相通。又帕克哩地方卡隘三處。一名哲孟山。與布魯克巴相通。一名哈爾山。與布魯克巴小路相通。一名宗木山。與宗木相連。以上卡隘六處。均歸江孜前後藏大道。爲總匯要隘。前臣等會同福康安於江孜奏添守備一員駐防之時。隨公同商酌於此六處設立卡隘。派撥番兵分防巡守。今臣成德親赴各處逐一查勘。點驗番兵。極其嚴密。等因具奏。奉硃批知道了。欽此。

五十九年五月。工部尙書和琳。內閣學士和甯會奏查閱前後藏漢番官兵及地方甯謐情形。夾片內開。查五十七年。福康安等奏定章程。每年春秋二季。駐藏大臣分往各邊界巡閱一次。順道閱兵。等因。軍機大臣議准在案。彼時臣和琳係會辦之人。緣廓藩初服。邊疆甫定。須得大臣前往巡閱。藉以彈壓。起見。現今二載有餘。託賴皇上洪福。天威廓藩。極其小心恭順。其餘邊外。如哲孟雄各小部落。仰息於人。斷無他慮。又經臣和琳各處堆立鄂博。境界分明。可期無事。更查衛藏地方較冷。三四月間。方始播種。八九月內。收割。凡巡閱之期。正番民農忙之候。雖減從輕騎。一切照例發與價值。而所用烏拉人夫。在所不免。況邊境俱極甯謐。衛藏凍奉約束。臣等公同商酌。似應請旨。嗣後駐藏大臣。每年於五六月間農閒之時。閱邊看兵一次。既不致營伍廢弛。亦不致有妨農業。是否有當。伏祈聖訓。等因具奏。奉硃批。是知道了。欽此。

衛藏通志卷九

鎮撫原目作職掌

謹案衛藏事務向由商上自行經理。自乾隆五十七年欽定章程。一切大小事件。統歸駐藏大臣辦理。責任綦重。今彙纂鎮撫一門。以昭遵守。

乾隆五十七年八月二十七日。奉上諭。向來大臣內。才堪辦事之人。多留京供職。其從前派往駐藏辦事。多係中材。謹飭之員。該大臣等前往居住。不過遷延歲月。冀圖班滿回京。是以藏中諸事。任聽達賴喇嘛及噶布倫等。率意徑行。大臣等不但不能照管。亦並不預聞。是駐藏大臣。竟成虛設。嗣後藏中諸事。皆當隸駐藏大臣管束料理。如遇出有噶布倫、商卓特巴、第巴、戴琿等缺。皆應歸駐藏大臣。秉公揀放奏補。自當妥立章程。俾資經久。不得仍前任聽達賴喇嘛、噶布倫等專擅。以致滋生弊端。欽此。

又奉上諭。布達拉、札什倫布兩處商上。向不歸駐藏大臣經管。達賴喇嘛、班禪額爾德尼平素自奉。以及例需應用各項。俱聽其自便。今改隸駐藏大臣總理。亦不可過於嚴切。應如在京派令經管阿哥等位家務大臣相似。不過代其稽查出納。不至如從前爲達賴喇嘛、班禪額爾德尼弟兄親族。暨商卓特巴等藉

端侵漁。至達賴喇嘛、班禪額爾德尼自行支用，不可管束太過，以示體恤。欽此。

又奉上諭：前後藏所出租賦，向歸達賴喇嘛、班禪額爾德尼收用。又衆蒙古平素崇信佛教，樂施喜捨，是以布達拉、札什倫布兩處商上蓄積稍裕。駐藏大臣向不過問，其商卓特巴、噶布倫等任意侵蝕。如商卓特巴及丹津班珠爾、札什敦珠布等皆家計富足，皆從何來？若非侵漁積累，何由各擁厚貲？嗣後商上一切收支，應令駐藏大臣總核。凡換班官兵以及駐藏大臣官用已用，皆不得於商上稍有侵那。其兩處商上出息，養贍喇嘛番衆外，或有贏餘，不妨於唐古忒兵丁添補養贍之用。福康安等當向達賴喇嘛等面爲勸諭，以大皇帝統屬萬方，受其貢賦，除每年賞給官員廉俸、兵丁錢糧外，遇有水旱偏災，賑恤蠲貸，並建築海塘河堤各工程，所費不下億萬萬，從無靳惜。又普免天下錢糧四次，漕米二次，亦不下億萬萬。斷無將天下貢賦悉入內帑，不養天下百姓之理。爾達賴喇嘛管轄衛藏，雖不敢比大皇帝統屬萬方，但即小可以喻大，亦宜思似此存心。譬如前輩班禪於四十五年進京，蒙大皇帝賞賜駢蕃，在京沿途所得及各蒙古布施，又復不費。總計不下百餘萬。若回後藏後，於所得羨餘酌爲施濟，何致爲賊匪垂涎？乃呼畢勒罕年幼，仲巴等又知聚而不知散，以致沙瑪爾巴聞而生心，唆使賊匪前至札什倫布搶掠一空，多藏厚亡，盈虛消息，理有固然。即比佛法而論，亦當以施捨爲心。錢財貨物皆係身外之物，在俗家尙不容吝惜，況出家人以空寂爲務者乎？當知波羅蜜中施捨爲第一。此後商上若有羨餘，達賴喇嘛、班禪額爾德

尼不可作爲己有。並不得專給喇嘛。務須普給番衆。俾僧俗聯爲一體。以期同心保護衛藏。或計算商上支用之外。再有羨餘。不妨亦免衛藏番衆賦納。則人心更爲悅服。倍資得力。欽此。

十一月。大學士公福康安等會奏。衛藏一切。本應駐藏大臣管理。乃向來駐藏大臣。惟資坐鎮。不復預聞。積習相沿已久。噶布倫等因達賴喇嘛清淨焚修。不能留心公事。遂假借達賴喇嘛聲勢。營私舞弊。諸事擅專。前此駐藏大臣。又復不諳大體。一切委之達賴喇嘛。轉付噶布倫等。任所欲爲。以致藏務日就廢弛。今當嚴定章程之時。必須革除積弊。方可大加整飭。查回疆駐劄大臣。一切皆歸衛。奪其阿奇本伯克等遵照奉行。駐藏大臣職分相同。嗣後駐藏大臣督辦藏內事務。應與達賴喇嘛。班禪額爾德尼平等。自噶布倫以下。番目及管事喇嘛。分係屬員。事無大小。均應稟駐藏大臣辦理。以肅紀綱。至札什倫布諸務。現因班禪額爾德尼年幼。係歲琿堪布代管。凡遇一切公事。亦令一體稟知駐藏大臣辦理。並於巡邊之便。就近稽查管束。庶衛藏事權歸一。積弊可以永除矣。又會奏。爲酌定稽查商上收支。並勸諭達賴喇嘛酌蠲賦納。普惠番衆事。臣等欽奉諭旨。布達拉。札什倫布兩處商上收支一切。應令駐藏大臣綜核稽查出入。不至如從前侵漁。至達賴喇嘛。班禪額爾德尼自用公用各項。仍舊聽其自行支用。不可管束太過等因。欽此。臣等公同查核。達賴喇嘛所屬前後藏地方。較爲寬廣。每年番民交納。係以糧石。或以氈毯。大綿。鹽。飭。酥。酒。奶渣。羊腔。茶葉等項。

作爲租賦。其遠處寒落難以運者。各以銀錢折交。惟番民有牛羊羣者。係每牛二頭。每年交銀錢一圓。每羊十隻。每年亦交銀錢一圓。其隨時布施物件銀兩。並無定數。除交各項本色外。約計所入銀兩。共有十二萬七千有零。凡有交來物件。銀兩銀錢。俱係收存大招庫內。有商卓特巴三名管理。其糴糴、藏香、及稅課罰贖之項。各處布施之物。並番民故後例交一半服飾物件。俱交商上庫內。另有商卓特巴二名管理。所有達賴喇嘛公用等項。悉皆取給於此。計算用項。每年正月內。布達拉與各大寺廟大小衆喇嘛。及前後藏各處喇嘛數萬人。會集大招念經二十日。謂之默朗穆勒布。二月內。復集大招念經八日。謂之錯四勒布。藏俗謂之攢招。按喇嘛名數。賞給銀錢。哈達。支給酥油。茶葉。糴糴。需銀七萬九百餘兩。又每日念經需用酥油。茶葉。及各項賞資。每年共需銀三萬九千二百餘兩。又每年採買布達拉衆喇嘛食用。及各種物料。並酬答布施物件。共需銀二萬四千四百餘兩。所入尙不敷所出。又色拉等大寺喇嘛。均須養贍。若青稞豐收之年。並布達拉布施較多年分。始有贏餘。商上又有小庫一處。另派商卓特巴一名經管。每年出入。如有贏餘物件銀兩。歸入小庫存貯。如遇不敷之年。即將小庫內銀物使用。一切用度。商卓特巴總司出納。亦向噶布倫等呈報。前此駐藏大臣從不過問。而達賴喇嘛親族及商卓特巴等。侵漁舞弊。在所不免。現在商卓特巴等缺。議歸駐藏大臣會同達賴喇嘛秉公揀放。不許達賴喇嘛親族管事。所有商上一切公用。又奉旨令駐藏大臣

總核實可杜絕弊源。敬維聖意以達賴喇嘛係出世之人。不諳俗務。疎於查察。左右用事。或致串通商卓特巴等乘機舞弊。現在商上本非豐裕之時。若再爲人侵蝕。達賴喇嘛出入用度。更形竭蹶。是以仰履聖懷。特命代爲查核。使其管事之人。知所顧忌。達賴喇嘛受此恩慈。自深欽感。等查。濟噶呼圖克圖居住布達拉。耳目更近。一切弊竇。無難就近確查。應交駐藏大臣與濟噶呼圖克圖隨時稽核出納。如有侵漁舞弊之人。濟噶呼圖克圖卽告知駐藏大臣查辦治罪。至札什倫布所管番民。較前藏爲少。所交商上糧賦。多係交納物件。統計折色本色。約合銀六萬六千九百餘兩。而每年所用。約需銀七萬四千六百餘兩。從前各處布施較多。每年總有贏餘。近年以來。布施甚少。又經廓爾喀搶掠。核計每年出入。連布施計算。僅敷用度。班禪額爾德尼年在幼齡。恐爲左右朦混。亦當駐藏大臣及濟噶呼圖克圖實力稽核。以歸畫一。所有達賴喇嘛、班禪額爾德尼平素自奉。以及例應需用各項。自應欽遵諭旨。照舊聽其自便。不敢過於嚴切。以仰副聖慈體恤。再達賴喇嘛商上入項及各處布施。若有贏餘。自應發心施捨。惠及番衆。臣福康安奏明。濟噶聶拉木、絨轄等處。被賊侵擾日久。應告知達賴喇嘛。酌免各該處租賦一兩年。以紓民力。據達賴喇嘛回稱。查明上年被擾地方。除濟噶聶拉木、絨轄三處。酌免兩年租賦外。其餘若宗喀、定日、噶爾達、春堆等處。亦擬酌免租賦一年。休養民力。再闔藏每年俱有欠交租賦。擬將五十六年以前積欠。全行蠲免。仰賴大皇帝洪福。黃教

振興商上一有羨餘。隨時酌量或予緩征。或免衛藏賦納。普惠番衆等語。臣等詳加體察。達賴喇嘛經此一番規勸。極知欽仰聖主恩慈。此後竟能常存此心。使僧俗聯爲一體。同心保護衛藏。自必改觀。等因具奏。奉硃批。欣慰覽之。餘有旨。欽此。

十二月。具奏章程。內開一。達賴喇嘛。班禪額爾德尼與外番通信。應告知駐藏大臣。詳細商酌也。查西藏地方與外番之廓爾喀。布魯克巴。哲孟雄。宗木等處部落。皆係接壤。向來外番人等來藏。或係布施。或係講論事務。達賴喇嘛等發給書信。原無禁例。但立言不得大體。易爲外番所輕。卽如上次廓爾喀滋事之前。曾寄信與達賴喇嘛講論銀錢。辦理不能妥協。致使藉詞尋衅。今廓爾喀業已悔罪投誠。將來遇有稟請之事。均應由駐藏大臣主持。與達賴喇嘛等商同妥協辦理。卽將來廓爾喀部長頭目欲專人來藏。於達賴喇嘛。班禪額爾德尼前呈送土物謝過。亦應令駐藏大臣代爲酌定回諭。方可發給。以昭體例。平日如有關係地方事件。俱應聽駐藏大臣辦理。其餘通問布施書信。亦應報明駐藏大臣查驗。又布魯克巴曾受天朝封號。該部落素信紅教。每年遣人來藏。向達賴喇嘛等呈遞布施。哲孟雄。宗木。洛敏湯等小部落。半屬外番。半屬藏內羈縻。各外番部落差人赴藏。至達賴喇嘛。班禪額爾德尼處布施通問。雖不必概爲禁絕。仍應立法稽查。嗣後各外番部落差人來藏者。由邊界營官查明人數。稟報駐藏大臣。驗放進口。並令江孜定日駐劄備弁。實力稽查。到藏瞻禮。

後。所有各該部落稟駐藏大臣者。由駐藏大臣給諭。其呈達賴喇嘛等稟帖。俱應呈送駐藏大臣譯出查驗。由駐藏大臣與達賴喇嘛將諭帖酌定發給。查點人數。再行遣回。至噶布倫係達賴喇嘛管事之人。不准與各部落私行通信。卽各部落有寄信與噶布倫者。亦令呈送駐藏大臣。與達賴喇嘛商同給諭。噶布倫等不准私行發信。庶內外之防。益昭嚴密。

又具奏。一、蒙古延請喇嘛誦經。應由駐藏大臣給照前往。以資查考也。向來青海蒙古王公等差人赴藏。延請通習經典喇嘛。赴該游牧地方誦經教經。有稟知駐藏大臣前往者。亦有私行前往者。漫無稽考。在青海蒙古等久涵聖澤。備位藩封。與內地臣僕無異。原不必定以限制。但經過三十九族番地。卽與各外番相通。若任其私相往來。恐諸弊卽由此而生。殊多未便。嗣後凡遇蒙古王公等延請喇嘛誦經者。俱令西甯等處大臣行文來藏。再由駐藏大臣給與執照。並咨明西甯辦事大臣。以資查考。其前往各處外番朝山禮塔喇嘛。及赴蒙古地方募化者。亦必須稟明駐藏大臣領照。方准前往。設有私往者。將該管之喇嘛堪布等一體查究。

又具奏。一、駐藏大臣衙門應設譯寫廓爾喀番字通事人役也。查駐藏大臣衙門向設譯字房通事各一名。祇有譯寫唐古忒字之人。從不通曉廓爾喀字跡語言。卽唐古忒番民內。亦惟近邊一帶尙通廓爾喀語。竟無一人能識番字者。查巴勒布與廓爾喀語言字跡雖殊。尙有兼通之人。臣福康安

等進兵時。奏明於巴勒布商人中。擇其誠實可信者。帶往軍營。備譯番稟。其諳習廓爾喀語言之邊界番民。亦酌帶數人。作爲通事。傳譯語言。俱令互相比對。以免舛誤。今廓爾喀投誠向化。按期入貢。自有呈遞駐藏大臣稟帖。應請添設廓爾喀譯字人役一名。通曉廓爾喀語言通事一名。另派唐古忒番民三四名。令其學習廓爾喀番語字跡。以備將來充補應役。查向例。通事譯字二名。每名日支口糧銀六分四釐三絲九毫。仍請照舊例支給。

又具奏。一駐藏大臣衙門繕寫清字滿洲兵丁向來祇設有四名。分派兩衙門。未免不敷。應於成都駐防滿洲兵丁內。再添派四名來藏。應得錢糧分例。換班年分。俱照向例辦理。仍於前藏漢兵內裁去四名。以符額數等因。經軍機大臣議復具奏。奉旨依議。欽此。

謹案乾隆十五年以前。駐藏大臣接任卸事年月。因珠爾墨特那木札爾不法。冊檔無存。今將自十五年起。至五十九年止。奉旨駐藏辦事大臣銜名。按年編纂。

工部侍郎那木札爾

乾隆十五年
年到藏

副都統班

第 乾隆十五年
年到藏

副都統多爾濟

乾隆十六年五月
到任換班第回京

副都統舒春。乾隆十七年七月到任。換那木札爾回京。

成都副都統薩拉善。乾隆十九年五月到任。換多爾濟回京。

將軍、誠毅伯伍彌泰。乾隆二十一年四月到任。換舒春回京。

副都統官保。乾隆二十二年十二月到任。換薩拉善回京。

西甯副都統積福。乾隆二十四年閏六月到任。換伍彌泰回京。

副都統輔鼎。乾隆二十六年四月到任。換官保回京。

都統傅景。乾隆二十七年閏五月到任。換積福回京。

副都統阿彌勒圖。乾隆二十九年六月到任。換輔鼎回京。

都統瑪瑞。乾隆三十年九月到任。換傅景回京。

都統官

保。乾隆三十一年十月到任。
接阿彌勒圖病故遺缺。

成都副都統托

雲。乾隆三十二年到任。
換瑪瑙回京。

護軍統領莽古賚

乾隆三十三年二月到任。
換官保回京。

副都統常

在。乾隆三十五年正月到任。
換托雲同京。

副都統索

琳。乾隆三十六年六月到任。
接常在病故遺缺。

副都統恆

秀。乾隆三十八年五月到任。
換索琳回京。

誠毅伯伍彌泰

乾隆三十九年四月到任。
換莽古賚回京。

副都統留保住

乾隆四十一年二月到任。
換伍彌泰回京。

副都統恆

瑞。乾隆四十二年三月到任。
換恆秀回京。

副都統索琳。乾隆四十四年四月到任。換留保住回京。

副都統保泰。乾隆四十五年七月到任。接索琳病故遺缺。

侍郎博清額。乾隆四十六年九月到任。換恆瑞回京。

誠勇公慶麟。乾隆四十八年八月到任。換保泰回京。

副都統留保住。乾隆五十年四月到任。接博清額病故遺缺。

副都統雅滿泰。乾隆五十一年五月到任。換留保住回京。

成都副都統佛智。乾隆五十三年十二月到任。接慶麟革職之缺。

侍郎巴忠。乾隆五十四年正月到任。接雅滿泰降級之缺。

伊犁參贊大臣舒濂。乾隆五十四年二月到任。換佛智回京。

青海副都統普

福。乾隆五十四年五月到任。換巴忠回京。

阿克蘇領隊大臣雅滿泰

乾隆五十五年十月到任。接舒濂革職之缺。

察哈爾都統保

泰。乾隆五十五年十一月到任。接普福降級之缺。

成都將軍成

德。乾隆五十六年十月到任。接保泰革職之缺。

四川總督鄂

輝。乾隆五十六年十一月到任。接成德出征卸事之缺。

副都統舒

濂。乾隆五十六年十二月到任。接鄂輝卸事之缺。

副都統鄂

輝。乾隆五十六年十一月到任。接雅滿泰革職之缺。

頭等侍衛額爾登保

乾隆五十六年十二月到任。接舒濂病故遺缺。

工部尚書和

琳。乾隆五十七年閏四月到任。接額爾登保出征卸事之缺。

副都統成德。乾隆五十七年十二月到任接鄂輝革職之缺。

內閣學士副都統和甯。乾隆五十九年三月到任換成德回京。

工部尚書都統松筠。乾隆五十九年十二月到任換四川總督和琳赴任。

衛藏通志卷十

錢法

謹案衛藏地方係由廓爾喀鑄造番錢運來行使仍兌換銀兩運回自乾隆五十七年欽奉諭旨。在藏安設鑪座派員監造乾隆寶藏銀錢其廓爾喀番錢永遠停止今照依編纂。

乾隆五十七年十一月大學士公福康安等會奏爲酌定鼓鑄銀錢章程仰祈聖訓事竊上年九月內欽奉諭旨廓爾喀所鑄錢文衛藏竟可毋庸行使莫若西藏地方安設鑪座派撥工匠鼓鑄用唐古特字模鑄寶藏字樣通行使用等因欽此茲復欽奉諭旨藏內設鑪改鑄寶藏字樣銅錢所有廓爾喀銀錢嗣後作爲銀兩用完銷除等因欽此仰見我皇上惠敷遠徼使商利民至意伏思衛藏久隸版圖原應通行國寶若有銅礦可開無難就近採辦設鑪鼓鑄惟是藏地素不產銅向來成造佛像俱用巴勒布商人販來銅器銷毀鑄造每觔價銀六錢零若有不敷再赴裏塘西南二十日路程雲南所屬之吉當番地收買熟銅每銅一觔價銀八錢零每年鑄佛約買熟銅四五千觔卽需價銀三四千兩腳價仍不在內藏地山上並無林木偶有些小柴枝炭質脆薄不能燒煉生銅若設鑪鼓

鑄寶藏錢文銅筋必須運自滇省。而滇銅開採日久。近來礦苗漸欠旺盛。僅敷京局及各省採辦。恐難冀供西藏鼓鑄。自滇至藏。一路崇山峻嶺。不能水運。腳價實屬不貲。計算採買銅價。並柴炭人工腳價等項。較之內地。加至數十倍。更須由內地撥運帑項。添設官員匠役。煩費滋多。即使通行使用。成本已難合算。況藏地拉哩西通各部落。番民習使銀錢。驟難更易。即內地銅錢。亦祇行至打箭爐而止。自打箭爐直至拉哩。全係使用碎銀。藏內鑄出銅錢。仍恐不能行使。磨費更爲不值。查從前商上並不鑄造銀錢。專賴廓爾喀運來易換。因所鑄新錢成色較高。遂而居奇擡價。欲以一圓當作兩圓行使。上年經成德奏明。以軍興需用。由商上鑄造銀錢。一律通行。商民稱便。今廓爾喀畏威悔罪。經_臣福康安堅明約束。不敢再提一圓當兩圓之語。已可永無異議。若藏內自鑄銀錢使用。使廓爾喀無所居奇。即將來仰蒙恩准。復通貿易。商民交易公平。更可經久無弊。至於銀錢成色。向來每錢一圓重一錢五分。總係攪銅成色。過於低潮。今若勒令全無攪雜。按照輕重兌換銀兩。則工價炭火等項。賠貼太多。不免大虧成本。如准其酌量攪銅。即嚴定限制。而日久弊生。更屬難於稽查。應請嗣後商上鑄造銀錢。純用紋銀成造。不得絲毫攪雜。每圓仍重一錢五分。紋銀一兩。祇換銀錢六圓。是銀錢計重九錢。易銀一兩。以多出一錢。作爲鑄錢工本。並另鑄一錢之銀錢一種。每兩易換九圓。五分之銀錢一種。每兩易換十八圓。均有一錢餘賸。成色既無高下之殊。鼓鑄亦免貼賠之累。可期永

遠通行。卽廓爾喀所鑄錢文。同係紋銀。彼此均無所藉口。所有巴勒布舊錢。與商上原鑄錢文。每圓總有銅二三分。成色較低。今若概令繳銷。勢所不能。祇應將商上原錢。及巴勒布舊錢。議令每紋銀一兩。易換八圓。與嗣後鼓鑄足色銀錢。示以區別。以昭平允。至商上鑄錢工匠物料。俱由商上備辦。將易換銀兩所餘之一錢。作爲工本。自行經理。毋庸動用官項。仍交駐藏大臣。派員督同噶布倫等監造。驗看成色。不許稍有摻雜。錢上正面輪廓上。用唐古特字模鑄乾隆通寶字樣。背面用唐古特字模鑄寶藏字樣。以昭我國家同軌同文之盛。並於正面中間。逐年鑄出造錢年分。用資查考。設有摻銅情弊。卽行按年查出。將監造之員。及該管之噶布倫。鑄錢之孜琿。濟仲。並匠役等。從嚴究問。罰賠治罪等。因具奏。奉上諭。福康安等奏藏內鼓鑄銀錢章程。亦祇可如此辦理。藏內既不產銅。所需鼓鑄錢文銅觔。仍須向滇省採買至藏。一路崇山峻嶺。購運維艱。自不若仍鑄銀錢。較爲省便。但閱所繪錢模。正面乾隆寶藏四字。背面鑄寶藏二字。俱用唐古特字模模印。並無漢字。於同文規制。尙爲未協。所鑄銀錢。正面用漢字鑄乾隆寶藏四字。背面用唐古特字。亦鑄乾隆寶藏四字。以昭同文。而符體制。已另行模繪錢式。發去遵辦。欽此。

又會奏。前藏鼓鑄銀錢。最關緊要。應請於前藏內再添糧務一員。於同知。知州。知縣內派來。專管監造銀錢事務。由四川總督揀明白勤慎之人。赴藏佐理。以到藏之日起。一年一換。以便按年稽查銀

錢成色。如果勤慎出力。由駐藏大臣保奏。倘敢徇私舞弊。卽行嚴參辦理。又專派鑄錢仔琿二名。濟仲喇嘛二名。以專責成。又查商上新鑄銀錢。不准絲毫攙雜。成色較高。通行使用。商民稱便。惟查番寨租賦。有以銀錢折交物件者。若商上收納不公。勢必苦累番民。嗣後商上收納銀錢數目。及採買各物。亦照所定兌換之數。按新鑄舊鑄分別折收。不得稍有浮多。以致人心不服等因。經軍機大臣議准在案。

五十八年九月。工部尙書和琳。副都統成德具奏。爲新造乾隆寶藏銀錢。酌量變通。以利番民。仰祈聖鑒事。查從前藏內純用廓爾喀銀錢。以致爲成色高低。滋生事端。去年辦理善後事宜。臣和琳同福康安等遵奉聖明指示。改鑄乾隆寶藏十足銀錢。每銀一兩。換一錢五分重六圓。換一錢重九圓。換五分重十八圓。餘銀一錢。作爲人工火食。其攙銅舊錢。每銀一兩。准換八圓。俱經軍機大臣議覆。奉旨允行在案。臣等初議。原恐廓爾喀商人到藏。唐古特到廓爾喀。彼此交易。皆係足色紋銀。斷不致再有齟齬起見。現在已行一年有餘。廓爾喀貿易之人。在藏買賣。未嘗不用銀錢。臨行皆係易銀而往。卽唐古特貿易之人回藏。亦係易銀前來。是兩處銀錢。彼此皆不出境。亦屬甚便。藏中僧俗番民。及克什米爾巴勒布商人。並內地漢商兵丁等。下餘無知。不論銀之成色高低。單論錢之兌換多寡。自去年迄今。攙銅舊錢與新鑄之一錢重及五分重者。暢行無滯。惟一錢五分重新錢。因換六圓。

之故。竟覺停積。臣等再四思維。錢法原以通商便民。不敢因係臣和琳議奏在前。稍存回護。試令監造銀錢局員。暫將一錢五分重銀錢停鑄。一面出示。每銀一兩。仍准兌換一錢重新錢九圓五分重。新銀錢十八圓。舊錢雖係一錢五分重。亦一例准換九圓。試行一月有餘。現在上下稱便。新舊通行。相應奏明。嗣後毋庸再鑄一錢五分重銀錢。庶商上成本有盈無虧。源源接濟。可以永遠奉行。等因。具奏。奉硃批。知道了。欽此。

衛藏通志卷十一

貿易

謹案衛藏地方爲外番往來貿易人等薈萃之所。南通布魯克巴，東南通雲南屬之番子，東通四川屬之打箭爐，以外各土司，北通青海、蒙古，直達西甯，惟西通巴勒布及克什米爾，纏頭番民，常川在藏居住，設慶與販者最多。自乾隆五十七年廓藩底定，酌議稽查約束章程，統歸駐藏大臣經理，謹照依編纂。

乾隆五十七年十二月，大學士公福康安等會奏，唐古特與外番貿易情形。查上次廓爾喀滋擾，全係沙瑪爾巴主持，實非因貿易啓衅。向來貿易商民，全係巴勒布、克什米爾二種，並無廓爾喀本地之人。藏內一切食用物件，全賴外番，一旦嚴禁商販，實於藏番不便。倘由官爲經理，將貨物等項彙齊運至交界，派員監察，又恐派去員弁藉辭索詐，轉啓弊端。且藏中貿易，俱由巴勒布商夥自行販貨零賣。唐古特又無開行承攬之人，無從代爲經理。前經_臣等再四籌畫，請將外番商人來藏者酌定次數，由駐藏大臣給照往來。江孜定日兩汛官弁稽查人數，其邊界零星交易，彼此常有，令該營

官就近隨時約束。毋許私越。自己可便番情。而示限制。至邊界番民與接壤居住之巴勒布番民。就近易換鹽米。至多不過數包。少至升合。未便定以次數限期。此等窮番零星市易。藉謀口食。實與到藏商民興販貨物者不同。不得不分別辦理等因。經軍機大臣議覆具奏。臣等查唐古特與外番貿易一事。前因番民等彼此爭利。易起爭端。節經奉旨令福康安等會同詳議。或竟行停止。或於一歲中酌定兩次。或四次。准其通市。仍當官爲經理等因在案。嗣經福康安等節次奏到善後事宜摺內。所定貿易次數。及稽查邊界出入。抽收稅課章程各條。均經臣等議以貿易一事。尙未議定。請俟福康安等接奉諭旨。覆奏到日。再行核議。亦在案。今據福康安等奏稱。貿易一事。廓爾喀資於藏地之物無多。而藏番日用。必需邊外物件。如米石、布疋、果品、香料、銅鐵等物。均需向外番購買。似有難於禁絕之勢。臣福康安係辦此事之人。臣和琳係駐藏大臣。必不肯祇顧目前。稍貽後患等語。是唐古特與外番貿易一事。勢難禁絕。自應照舊通商交市。所有福康安等先後奏到貿易事宜各條。一併核議。據稱查明在藏貿易巴勒布商民四十名。商頭三名。克什米爾商民一百九十七名。商頭三名。向俱任其常川興販。往來不絕。駐藏大臣衙門及達賴喇嘛處並無查考。雖經議派第巴一人管理。仍屬有名無實。嗣後應請查明貿易番回。造具名冊。交駐藏大臣衙門存案。每年巴勒布止准貿易三次。克什米爾止准貿易一次。於前赴外番營販貨時。令商頭呈明駐藏大臣。由何路行走。給與印

照稽查出入等語。均如所奏辦理。又據稱請於緊要總路江孜定日二處設立營汛。各添設備弁駐劄。嗣後貿易出口商民。應令該二汛備弁及營官第巴等驗照放行。其有自外番來藏商民。亦由該二汛官員查明人數。稟報駐藏大臣。到藏後一體按名註冊。立法已爲周密。仍應令駐藏大臣隨時查察。如該商民等或有爭占便宜。不安本分。並江孜定日備弁暨駐藏大臣衙門章京筆帖式。以及該處營官書吏通事人等。有藉端需索。及得錢縱容出入等弊。卽行嚴參究治。以昭懲戒。其布魯克巴及哲孟雄宗木等處部落。有欲來藏瞻禮者。往來出入均應一體查察。至所稱邊界番民與接壤居住之巴勒布番民。就近易換鹽米。不過數包。至升合不等。未便定以次數限期等語。此等窮番居住邊界。鄰近外番。不過零星市易。藉謀口食。與出口及到藏與販者不同。若一概定以次數限期。該番等卽不免生理無資。我皇上加惠番黎。一視同仁。自應如福康安等所奏。毋庸定立次數限期。准其照常市易。但此等零星貿易。卽在交界處所互相市販。未免漫無稽查。駐藏大臣遠在前藏。又不能紛紛給照。嗣後應令駐藏大臣飭知該管營官。就近約束。嚴行查核。毋許私越。如此酌定章程。既不致經理非人。藉端擾累。亦不致任聽商民營私牟利。於藏內貿易一事。實有裨益。又據稱濟隴聶拉木抽收稅課。毋庸酌減也。查邊界地方。惟濟隴聶拉木抽收稅課。尙屬無多。向來收稅則例。凡巴勒布商民運米在邊界售賣者。每米一包。抽取一木椀。每年約收稅米一百數十石。俱運交大昭。以

備攢昭念經之用。唐古特番民零星販出鹽觔，每包亦抽取一木椀。該營官復將所收鹽觔，向巴勒布易換製辦藏香之料，及紙張果品等物，運交商上。至巴勒布商民運米來藏，各物除米石外，其餘並不在邊界納稅。祇由該營官記明包數，稟知貨物商上，到藏後，不論粗細，每包納銀錢一圓，卽金花、緞匹、珊瑚、珍珠、細軟之物，亦皆係按包收稅。惟紅花不以包計算，每一克卽納銀錢一圓。詳核所收稅課，爲數本屬有限，日久相安，並無爭論。今旣蒙恩准通貿易，所有抽收稅課一項，並非從前起衅根由。若將往例議減，轉似市恩外番。裁抑唐古特，於體制殊有關係。應請將濟隴聶拉木兩處抽收米石鹽觔，及貨物到藏，按包納稅之處，悉照向例辦理等語。臣等酌議，應如所奏辦理。毋庸另議裁減，仍令駐藏大臣隨時稽核商上，毋得稍有加增，以昭平允等因。具奏奉旨，依議。欽此。